

NATIONAL ASSEMBLY OF SEYCHELLES

Thursday 29th February ,2024

The Assembly met at 09.00am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab. Bonzour nou bann zofisyé Lasanble. E nou piblik ki pe swiv nou. Byenveni pou nou travay ozordi. Nou kontinyen avek repons. E pou komanse mon donn laparol Onorab Norbert Loizeau.

HON NORBERT LOIZEAU

Mersi Mr Speaker. Bonzour tou Manm koleg Onorab. Bonzour tou dimoun a lekout. En bonzour spesyal pou mon zabitan dan distrik Bel Air ki mon panse zot pe espere pou zot ekout mwan avek pasyans.

Mr Speaker, ozordi pou mwan i en privilegez pou mwan kapab fer mon repons lo diskour Leta Lanasyon ki Prezidan Larepublik, Mr Wavel Ramkalawan ti fer Zedi pase.

Mr Speaker, Zedi le 22 Fevriye, Prezidan Larepublik Mr Wavel Ramkalawan, en non ki donn en gou anmer parfwa dan labous serten. Ti fer son 4enm diskour lo Leta Lanasyon kot in fran, e osi adres bokou size enportan. In koz lo bann defi e osi lo bokou bann lakonplisman ki'n ganny arive anba son Gouvernman pandan sa dernyen 3an ki i o pouvwar.

Sa diskour ki Prezidan in delivre, in enn ki'n montre grander lespri en gran dirizan, ki Bondye in avoye pou delivre Sesel dan sa teneb ki i ti ladan. Malgre i annan ki pe sey denigre li, akoz zot zalou e zot groker pou sa bann lakonplisman ki'n arive dan Sesel pandan zis 3an.

Pou mwan son diskour in enn ki'n donn mwan lespwar, ki Sesel i dan en bon lanmen e ki nou annan en lavenir briyan devan nou.

Nou annan en lavenir briyan Mr Speaker devan nou, senpleman akoz nou annan en Gouvernman ki annan son pep aker. Nou annan en Prezidan ki annan en vizyon, e ki anvi pou son pep kot pozitivite i lakle dan tou keksoz ki nou fer.

E ler mon lo sa pwen pozitivite Mr Speaker, i fer mwan mazin sa slogan "Sesel pour tou son zanfan" ki nou ti servi dan dernyen eleksyon.

Kot tou Seselwa, nenport ki apartenans politik, relizye, oubyen kouler lapo i kapab travay dan nou pei.

Spesyalman dan Sekter Piblik kot ek nou, pa ek nou enn fwa pou tou in ganny eliminan e ganny mete dan bin listwar. Malgre ki Lopozisyon pe fer dimoun krwar ki i ankor egziste dan nou pei Sesel.

Dan sa pozitivite ki nou anvi vvar dan Sesel, Prezidan in montre son grander lespri ankor enn fwa. Kot in lans en lapel pou ki nou annan linte nasyonal dan nou pei.

Linte nasyonal dan en pei ki'n divize. Kot laenn, lanmertim, vanzans pa merit annan en plas. Me kot lanmour i ranplas laenn, lanmertim e vanzans. Kot lazwa de viv i reoran son plas dan nou pei. Kot pozitivite i a ranplas negativite, pour ki nou pei i a prospere.

Alor, mon anvi senserman demann tou Lopozisyon dan Sesel, pou zwenn nou pou batir en Sesel ini. Pou nou apre ki nou'n kit sa monn deryer, nou a kit deryer en Sesel ini ki gou pou viv.

Kot nou zanfan, ek nou pti zanfan a kontinyen dan sa lespri pozitivite ki nou ler nou'n kit sa monn nou'n kit deryer. En kestyon alor ki mon anvi

demann avek Lopozisyon, sirtou zot ki dan parti minoriter ki pe aspire pou vin o pouvwar 2000 zanmen. Eski zot anvi en pei ki'n divize? Eski zot anvi en pei ki lo son zenou? Eski zot anvi en kales kase parey Prezidan ti dir ler i ti antre dan Gouvernman ki *LDS* ti zwenn?

Si non Mr Speaker, en konsey mon anvi donn zot. Sanz zot fason fer, akoz zot pou reste - san kwa zot pour reste dan Lopozisyon zot lavi an antye. E zot menm kapab pa egziste koman en parti politik.

Mr Speaker, mon pe koz koumsa akoz mon parmi bann Manm dan sa Lasanble ki'n pas bokou letan dan Lopozisyon. Mon'n dan Lopozisyon koman en Manm dan parti minoriter dan Lasanble. Mon'n en Manm sa Lasanble ki'n pas bokou letan dan Lopozisyon.

Mon'n dan Lopozisyon koman en Manm dan parti minoriter dan Lasanble. Mon'n en Manm ki'n dan Lopozisyon koman en parti mazoriter dan Lasanble e la mon en Manm parti mazoriter dan Lasanble e osi dan Gouvernman. Mon konnen ki mon pe dir.

Mr Speaker, sa i fer mwan rapel dan 6enm Lasanble ler mon ti dir ki nou pe pas sa bann Lalwa, ki zot lot kote latab zot pa ti anvi. Mon ti dir Mr

Speaker, ki nou pe fer li pou servi zot ler zot vin dan Lopozisyon.

Mr Speaker, zot ti riy mwan e ozordi mon parol in ganny son valer, zot trouv zot dan Lopozisyon. Me nou, koman parti ki o pouvwar, nou'n kit nou lizye fikse anver lavenir nou pei. E kontinyen fer bann keksoz pozitiv dan tou bann distrik pou amelyor lavi tou nou sitwayen e fer sir ki zot viv dan dinyite, lape e dan la trankilite.

E mon distrik Bel Air Mr Speaker, nou pa'n ganny eparnye avek sa. I annan bokou keksoz pozitiv ki pe ganny fer dan sa direksyon dan mon distrik Bel Air. Dan tou kwen distrik, lalimyer in ganny mete pou fer sir ki mon bann zabitan i reste an sekirite aswar.

I menm tro bokou kot serten fanmir pe dir pa mete, akoz i tro kler, i kler anndan se zot. Ozordi personn pa koz lo lalimyer dan distrik. Bann papa ek bann manman Mr Speaker, ek bann zenn ki fer *night shift* pa pe mars dan fernwar ler zot fini travay kan in ariv aswar. Pozitivite menm Mr Speaker ankor.

Resurfacing, lo laplipar nou bann pti semen segonder, tousala in ganny fer, i annan plis pou ganny fer pandan sa

lannen. Dapre serten lenformasyon ki mon'n gannyen avek en o zofisyen *land transport*. *Tender* pe ganny mete pou elarzisman semen *Curio Road*, vi ki i en larout ki pe ganny servi par bokou motoris, sirtou dan bomaten ek dan apremidi.

Mon dir mersi davans, akoz sa i en lager ki lontan mon pe anmennen. I annan gran posibilite Mr Speaker, ki en *retaining wall* kot lafanmir Simeon a ganny met lo *tender*. Si i pa'n fini met lo *tender*. Dapre konpran in fini mete e sa proze i a komanse.

Sa i ava Mr Speaker, en rekonpans pou sa fanmir ki apre plizyer lannen ki zot later in ganny pran an malapropro pou fer semen, *bus stop* san zot permision.

Mon dir mersi mon Gouvernman pou rekonnet sa e ed sa fanmir. Proze lakaz Mr Speaker, pou kontinyen sa lannen. Nou'n ganny *6 unit Sans Soucis* lannen pase, ki ti swadizan linisyativ Gouvernman US, me selman mon Gouvernman ki'n fer, nou Gouvernman ki'n fer. Sa in benefisyen Mr Speaker, 6 fanmir ki ti dan bezwen.

Alors mon dir mersi mon Gouvernman, plito sa ki naryen Mr Speaker. Mwan mon konn

dir mersi akoz mon konnen ki *topographie* mon distrik i montre ki mazorite later i dan rezerv. Later pou konstri lakaz pou nou zabitan i limite.

Me kot i annan Mr Speaker, nou pou konstri. E byento i annan ankor *16 unit mid-range condominium*, ki pou ganny konstri kot vye *day care center*, pou ki bann ki kapab finans zot lakaz a kapab ganny en lakaz.

E parey mon ti fer resorti dan mon repons Diskour Bidze, si tou keksoz i al byen dan en demars lesanz ki nou pe fer avek en fanmir *Stevenson Delhomme Road*, plis lakaz pou ganny fer.

Espesyalman bann *mid-range condo* ki a ganny konstri dan rezyon *Stevenson Road*, kot nou bann zenn profesyonnel ava reisi kapab ganny zot lakaz. Mr Speaker, pozitivite partou kote dan Bel Air.

Sa ki mon kontan ek mon Gouvernman Mr Speaker, mon pa zis inisyе proze. Me nou fer bann proze ki benefis Lepep Seselwa. I annan bokou ankor ki pe arive dan mon distrik.

Si mon kontinyen koz lo la fernwar pou fer mwan la, e lezot pa pou ganny sans fer zot diskour. E la mon anvi felisit mon DA Christophe, e son lekip dan Ladministrasyon Distrik ki

pe travay kot a kot avek mwan pou fer sir ki nou distrik i bouz de lavan.

Ozordi Mr Speaker, sa ki enportan *DA* pe konn son vre rol dan distrik. Ki i pou fer e kwa ki i pa fer. E zabitan mon distrik Bel Air i rekonnet sa. Mon'n tann en Manm *US* Mardi pase dir tre for, ki tou sa bann proze ki Gouvernman *US*, ki Gouvernman *LDS* pe fer se Gouvernman *US* ki'n inisyе. Mon krwar Onorab Gill, si mon pa tronpe ki ti dir sa.

Mr Speaker, be sa Manm i bezwen konnen ki pa vo lapenn zis inisyе proze. Me selman zis sa bann bon plan ki dapre zot i bon, i reste dan en tirwar lapousyer lo la.

Nou Gouvernman pa zis inifye proze li, nou fer proze. E mon anvi dir ki si en proze i bon pou Lepep Seselwa, nou pa pou gete lekel ki inisyе. Nou pou pran, nou pou fer li Mr Speaker. Akoz pou nou Sesel i avan tou.

Parey Mr Speaker, proze Ero nou'n fer li e nou'n fer li avek resours ki nou ti annan. E olye dir mersi, nou dir tro pti. Me pourtan tou zabitan Praslin ek Zil Pros pe dir mersi pou sa zoli lasose ki'n ganny fer.

Me Mr Speaker, i annan ankor keksoz ki Gouvernman *US* in inisyе, e nou nou'n erite. Selman personn lo lot kote

latab pa koz lo la. Zot zis senm kalonmni lo tou keksoz. Parey Onorab Aglae ti vin avek en lalis yer, mon osi mon annan en pti lalis bann proze ki zot in inisyé ki ozordi nou nou'n erite.

Mr Speaker, premye delo malpropte La Misere, ti ganny inisyé anba Gouvernman US. Kot nou Gouvernman ozordi ki bezwen trouv larzan pou pey ankor konpansasyon bann zabitan, sa voyaz bann zabitan La Misere.

Dezyenmman, konpansasyon pou zabitan Baie Ste Anne Praslin koze par PUC. Kot Prezidan Ramkalawan Mr Speaker, ti anmenn petisyon. Kantmenm Onorab Gill pe sey pran kredi lo la.

Mon ti dan Lasanble sa letan Mr Speaker. Dan 4eme Lasanble, e mon konnen. La mon tande Mr Speaker, nou'n pran larzan avek Larisi e nou pa ankor peye. Me tousala Mr Speaker, i tonm lo ledo nou Gouvernman.

Fungus Mr Speaker, ki enn ki nou'n erite. Ti inisyé anba SPUP, SPPF, US ozordi Mr Speaker. E ki ozordi in tonm lo nou, pou nou peye.

Det *Air Seychelles* Mr Speaker, kot nou'n bezwen entervenir pou ki ozordi *Air Seychelles* pe anvol avek lafyerte. Ozordi nou vwar bann

cabin crew pe tir portre avek Prezidan, pe poste Mr Speaker. Kot preski 800 travayer ti pou *end up* san en lanplwa, si LDS pa ti vin o pouvwar.

(APPLAUSE)

HON NORBERT LOIZEAU

Mr Speaker, dan tousala nou'n sov en lasyet manze pou 800 fanmir. Be pa pozitivite sa Mr Speaker? Sa personn lo lot kote pa koz lo la. E pa blyie Mr Speaker, TRNUC kot ozordi Gouvernman LDS pe ganny demande pou pey bann viktim. E sa i kapab kout pei sepa konbyen milyon Roupi *taxpayers money*.

Dernyen fwa dan deba lo TRNUC, LOTO Onorab Pillay ti demande ki Gouvernman i pey tou viktim. E i ti fer en pledwari ki Gouvernman fodre i pey tou viktim.

Eski pa ti pou bon Mr Speaker, si sa parti osi, ki'n responsab, ki'n afilye avek sa bann keksoz, li osi i fer ser ten kontribisyon? Parey Onorab Georges ti fer resorti Mardi pase. Apre si fodre Gouvernman a fer larestan. Deza Mr Speaker, Gouvernman in komans fer son bout, kot bann later ki'n ganny pran malapropo pe al ganny rann avek bann propriyeter la ki Lalwa *State Land and Rivers*

Act in pase. Fer zot bout, e sa i a montre ki vreman zot anvi linite nasyonal dan Sesel.

Mr Speaker, bokou in ganny fer e ankor pe ganny fer pou byennet tou kous nou popilasyon. Renovasyon partou kote, lo tou bann lenfrastriktir, swa sportif oubyen gouvernmantal ki vre Mr Speaker, zot ki'n fer. Gouvernman US ki'n fer.

Me selman zot pa'n *Maintain*, ki'n fer zot in les tonm an rin. E sa pe kout nou Gouvernman de milyon Roupi pou nou kapab retourn li dan son leta ki i sipoze ete.

Sirtou bann lenfrastriktir sportif, i annan tro bokou pou nonmen. Ek sa Mr Speaker, sa ki fer lapenn se ki ozordi politik pe ganny fer, pe ganny servi dan sport pou fer. Kot si lord depi lontan pa ti'n ganny mete avek bann federasyon, e osi bann Lasosyasyon Sport, keksoz ti pou diferan ozordi.

Me keksoz ki mon anvi dir avek bann *sportsman*, bann *sportswomen* ek bann atlet ozordi. Zot pe ganny dir ki si US i o pouvwar larzan ti pou ganny devide fasilman. En keksoz mon anvi dir zot, mazin byen ler zot pou gannyen pti kwiyer i annan ki pou pran en pli gran kwiyer, akoz koumsa i ti ete lontan.

Mr Speaker, aprezan permet mwan adres en lot size dan sa laliny pozitivite ki pe arive dan nou pei. Semen *West Coast* ki enn parmi bann pli gran proze semen ki nou Gouvernman pe fer, byensir avek lasistans nou bann pei zanmi parey *Abu Dhabi*.

Nou dir zot, nou dir sa pei mersi bokou pou ed nou. E la Mr Speaker, *tender* pe ganny mete lo plizer semen. Parey lo semen segonder dan Anse Royale, ki mon krwar Dan Lafous. Mr Speaker, *tender* pe ganny mete. Sa se bann keksoz pozitivite ki pe arive dan Sesel pandan sa dernyen 3 lannen.

Me Mardi Mr Speaker, mon'n tann Onorab Elekte pou Anse Royale dir ki i annan koripsyon ki pe arive en pe partou. Be Mr Speaker, nou ki pas Lalwa dan Sesel ozordi. Okenn endividé ki santi ki i annan en loder koripsyon par la, i kapab al rapporte kot *Anti-Corruption Commission* e en case i ava ganny ouver. Mon dir tou Seselwa Mr Speaker.

Si en dimoun i annan soupson ki mwan Norbert Loizeau i annan detrwa milyon ki'n antre lo mon kont. Mr Speaker, be pa nou ki ti pas *AML Bill?* Raporte, pa zis fer spekilasyon, e tou dimoun i kapab rapporte.

Nou tou la anndan Mr Speaker, nou ti fer deklarasyon nou bann *assets*. Tou Lapwentman Konstitisyonnel ti fer. Alors, nenport ki endividé i kapab ale e demande pou vwar lanvlop Norbert Loizeau.

E menm Sandy Arissol, mon nomm son non akoz mon kapab non son non. E tou bann *Constitutional Appointees*, nenport travayer Gouvernman ki'n fer sa deklarasyon pou vwar si sa ki zot in dekouver i annan ladan.

Sa i kapab ganny fer par nenport endividé ozordi dan Sesel. E pa blyie Mr Speaker, *comme dir* Onorab Labrosse, *Chairman FPAC* i zis a kote li. Be fer li travay, e pa blyie i annan R50 milyon, \$50 milyon ki ti dir li i pou al rode.

Pa ankor rode Mr Speaker, nou pa ankor vwar naryen. Mr Speaker, fodre pa blyie ki Prezidan Wavel Ramkalawan se li ki ti anmenn sa lager pou ki *Leader Lopozisyon* ki vin *Chairman FPAC*.

Prezidan Mr Speaker, malgre tousala, zot ti lager zot ti dir non. Me selman a lafen nou ti reisi e *Leader Lopozisyon* ti vin *Chairman FPAC*. Prezidan ler i ti dan sa *post Chairman FPAC*, i ti travay Mr Speaker, i pa ti fer pares nou ti vwar dan bann *hearing*.

Alors Mr Speaker, la zot sans pou anmenn en ka parey li i ti fer. Si zot rapel byen *NDEA* dirize par bann *Irish, FIU*, tousala ti ganny anmennen devan. Akoz ti annan bann magouy ki ti a pe pase kot menm Kontra ti disparé e ti aparet, e ganny mete dan loto Oditer Zeneral sa letan si mon pa tronpe.

Tousala nou ti kouver Mr Speaker. Alors fer zot travay e anmenn rezulta. Pa zis asize pa fer naryen, me zis konplent. Delivre dan sa pos, se sa ki'n fer Mr Ramkalawan vin Prezidan.

Parey Peter Tosh i dir dan son sanson, "*live clean let your works be seen*". Prezidan in fer egzakteman sanmenm, e ozordi in arive dan sa gro sez *State House*.

Mr Speaker, fer sa travay olye maltret nou bann teknisyen, nou bann profesyonnel ki'n al fer en pti *training* Mr Speaker. Me pourtan tou sa bann teknisyen Mr Speaker, ti ganny *train* oparavan anba zot ladministrasyon.

E ozordi sa bann menm teknisyen i ankor pe travay dan nou Ladministrasyon. E ozordi zot ganny ensilte koman enkonpetan e pa kapab fer naryen me pourtan zot ti travay dan sa Ladministrasyon avan.

Ozordi tou dimoun i kapab koze, laliberte lekspresyon pe rennyen dan nou pei ozordi. Dimoun i koz ouvertman san lafreyer konpare ek oparavan. E mwan Mr Speaker, mon fyer ler mon vwar sa.

Rezon ki mon fyer se akoz mwan mon enn ki'n lager pou sa arive byensir anba direksyon nou Prezidan ki sa letan ti *Leader Lopozisyon*.

Me mon sagren pou mwan tann bann ki pa ti reisi arive pou dir ki nou pe viktimiz dimoun, e nou pe anpes zot koze. Sa i fo, i zis en taktik politik pou fer krwar avek Lepep Seselwa ki Prezidan i en move dimoun.

Lekel ki ti vot kont Lalwa *POA*? Kot menm Lakour ti bezwen mele. Mon anvi dir avek Lepep Seselwa pou pa les zot ganny anbete avek bann ki swaf pouvwar. Akoz sel keksoz ki zot anvi fer, se vin o pouvwar pou zot kontinyen donn bal dan nou larises, dan nou larzan parey ti leka dan lepase. Mr Speaker, Seselwa i nepli dormi boner.

Avan terminen Mr Speaker, mon anvi partaz mon soutyen avek Onorab Arissol, Onorab Esparon, Onorab Hoareau ek Onorab Monthy pou zot devosyon anver zot distrik apre sa gran dezas ki ti

arive dan zot distrik an Desanm lannen pase.

Mon anvi osi pas mon senpati avek tou bann fanmir ki'n perdi enn zot pros pandan sa letan. E ki Bondye i a donn zot lafors e kouraz pou zot sirmont sa sityasyon.

Mon lev *chapeau* avek Onorab Monthy Mr Speaker, pou sa determinasyon ki in montre nou i annan.

(APPLAUSE)

HON NORBERT LOIZEAU

Nou'n tande, e nou'n tande Merkredi ki sa ki ti arive kot CCCL pa ti en leksplozyon, ti en bonm.

Ler mon'n fer mon refleksyon Mr Speaker, mon'n mazin bonm dan tant vakwa kot Radyo Sesel. Bonm *Reef Hotel*, bonm dan loto Simon Denousse ek Mike Asher. Mr Speaker, mon a kit sa la ziskan ler lenvestigasyon a fini e nou a ganny en vre lakoz, laverite i ava sorti.

Pou konklir, mon anvi remersi tou dimoun ki'n siport mwan dan en fason ou en lot. Pou bann ki'n anvoy en pti lapriyer, parfwa dan bomaten e dan lazournen pou donn mwan kouraz ek lafors pou mwan kontiny sa lazournen. Pou ki nou a kontinyen travay ansanm

pou fer bouze nou distrik e nou pei.

Mon anvi dir avek Lepep Seselwa pa bezwen per, zot dan bon lanmen. Pa les zot ganny anbete avek bann kalonmni ek mansonz. Sesel i pour tou son zanfan, alors annou travay pou Sesel. Nou kapab fer li Mr Speaker, wi nou pou fer li. *LDS* Sesel, e mwan Mr Speaker, mon pa pou zanmen les tonbe. Mersi.

(APPLAUSE)

MR SPEAKER

Mersi Onorab. Laparol aprezan pou onorab Terence Mondon.

HON TERENCE MONDON

Mersi Mr Speaker. Bonzour Mr Speaker. Bonzour tou koleg MNAs. Tou zabitant mon distrik Takamaka, tou dimoun ki pe ekout nou Lasanble ozordi bomaten.

Ser, frer Seselwa mon sezi sa loportinite pou remersye Prezidan Larepublik pou son diskour lo Leta Lanasyon. Diskour Prezidan in tous larealite nou lavi toulezour.

Prezidan in donn nou legzang konkret, lo bann travay ki son Ladministrasyon pe antreprann pou anmenn plis devlopman pou byennet Nasyon Seselwa. Prezidan in osi abord

plizyer size ki demann refleksyon pli profon.

Mr Speaker, Sesel ozordi i annan li en Prezidan ki pe travay a ker pou tou Seselwa. En Prezidan ki reste angaze anver byennet son pep. Ler i dir nou ki 2024 pou en lannen aksyon, i pe senpleman reasir nou son langazman pou fer bokou plis pou Nasyon Seselwa.

Prezidan in fer lapel pou ki limite i rennyen dan nou pei, pou nou travay ansanm pou benefis nou pep e nou pei. Sa moto “Sesel pour tou son zanfan” i enkilke sa lespri travay ansanm dan lonnekte e lentegrite nasyonal.

Annou pa les diverzans lopinyon vin en rezon pou divizyon. Annou ansanm kree sa latmosfer kot i annan dyalog kot nou kapab fer sa konversasyon limite avek respe mityel.

Mr Speaker, mon parkour politik in permet mwan konn sa 2 parti ki preznan dan sa Lasanble ozordi. Mon kapab konpar tou lede parti lo zot prensip e fason fer.

Mon santi mwan byen plase ozordi, pou dir avek pep Seselwa ki nou pei i definitivman dan bon lanmen.

(APPLAUSE)

HON TERENCE MONDON

Mr Speaker, ler nou travay drwat san okenn lapliferans e faver, ler nou partaz sa ki nou rekolte avek tou nou pep san eksepsyon. Ler nou rekonnet en travayer baze lo son merit, olye son krwayans politik sa i montre ki nou pe fer progre koman en nasyon.

Mr Speaker, lensidan le 7 Desanm 2023, i montre nou ki nou en nasyon ini e ranpli avek konpasyon. Seselwa i touzour pare pou vin ansanm dan bann moman difisil. Se sa konpasyon imen ki devret pe kontinyen gid nou koman en pep.

Mr Speaker, mon salye mon 4 koleg dan sa Lasanble Onorab Sandy Arissol, Onorab Monthy, Onorab Espanon e Onorab Hoareau ki'n la a kote zot zabitan pandan sa peryod difisil pou montre nou ki savedir vre konpasyon.

Me ler en politisyen i swazir divizyon dan plas linite, e ler zot viv avek mansonz olye laverite zot pe detri leker Nasyon Seselwa. Mon mesaz pour sa bann politisyen, fodre pa zot souzestim lentelizans nou pep. Seselwa i nepli viv dan linyorans.

Mr Speaker, mon'n vreman apresye ki bann Sef Egzekitiv dan Servis Piblik in ganny loportinite fe en sesyon

lantrennman *UAE*, tou dernyerman. Nivo e kalite *leadership* dan Servis Piblik, i bezwen ganny ranforsi pou reponn nouvo legzizans Ladministrasyon *LDS*.

Apre tou se nou bann Sef Egzekitiv ki pou diriz sa transformasyon nou Servis Piblik. Tou profesyonnel dan Servis Piblik pou bezwen kontinyen ganny valorize, e devlop kapasite neseser pou delivre lo lekspektasyon nou pep.

Mon oule demann nou bann profesyonnel pou kontinyen les zot ganny gide par sa lespri pozitivite dan zot landrwa travay pou asir byennet nou pep - pou asir byennet nou pei e nou Nasyon Seselwa.

Mr Speaker, sa Ladministrasyon anba *leadership* nou Prezidan pe travay dir, pou ekliersi limaz nou pei lo lasenn enternasyonal.

Prezidan i dir nou ki bokou progre in ganny fer dan limaz pou retir Sesel lo Lalis Nwanr ki Linyon Eropeen i ti'n enpoz lo nou.

Se sa kalite langazman ki pou sofgard nou lentegrite koman en pep. Sa nouvo kad legal pour *virtual asset* ki pou vin devan nou Lasanble

Nasyonal byento, i osi enportan dan sa demars modernizasyon e diversifikasyon sistenm finansyel nou pei.

Mr Speaker, annou aprann koz laverite e donn plis valer laliberte lekspresyon. Pou plizer deseni, Seselwa pa'n vreman konn laverite lo sa ki'n arrive dan nou pei.

Alor annou sezi sa moman pou ranforsi mesaz laverite dan tou sa ki nou fer. Koman en nasyon, nou bezwen sirmont sa ki diviz nou e ranforsi tou sa ki ini nou ansanm.

Seselwa i ankor rapel lalit ki nou Prezidan in anmennen pou retir nou pep dan lafreyer e met nou pei lo en semen laverite. En lalit ki'n anmenn laklerte pou nou pep e ozordi nou kapab rezouir laliberte lekspresyon.

Mon napa dout ki sa nouvo lekspresyon laliberte pou ranforsi nou lekonomi. Sa ki nou'n aprann atraver *TRNUC*, in fer mwan konpran ki mannyer listwar nou nasyon ti ganny manipile pou kasyet laverite.

Mr Speaker, Zedi le 22 Fevriye 2023, in mark en zour enportan dan prosesis rekonsilyasyon nasyonal. I sa zour kot Prezidan Larepublik ti demann en pardon lo non Leta Sesel. Avek tou viktim bann

atrosite ki ti ganny komet par ansyen Ladministrasyon.

Sa i reprezent en moman eksepsyonnal dan listwar nou pei. Sa zes senbolik i osi amplife karakter nou Prezidan. Napa plas pou laenn dan nou nouvo Sesel.

Mr Speaker, nasyon Seselwa i konn tre byen kote nou pei ti ete an Oktob 2020. Seselwa i konnen kwa ki'n ganny fer dan sa dernyen 3an ki'n pase. Seselwa an mazorite i rekonnet ki Prezidan pe fer tou pou elimin sa kiltir lese fer dan nou pei.

Ozordi larzan ki nou pei i rekolte, i pe ganny zere avek disiplin. I pe ganny servi pou amelyor lavi tou Seselwa. Nepli annan bal dan larzan piblik.

Mr Speaker, Prezidan in dir nou ki sa lannen son Ladministrasyon pou fer plis akson ankor pou soulaz nou pep. Mon pou admet ki i reste bokou pou fer, me mon annan konfyans ki avek en lekonomi performan, nou pou kapab fer bokou plis ankor.

Pep Seselwa i annan konfyans dan sa Ladministrasyon, akoz zot konnen ki zot larzan i dan bon lanmen.

Mr Speaker, Prezidan in dir nou ki tou det eksteryer in ariv 54poursan pour lannen

2023, avek en sirplis bidzeter plis ki 3poursan. Sa i depas lekspektasyon ki Minister Finans ti'n prozekte pou sa lannen.

Anmezir ki nou lekonomi i perform byen, nou to det eksteryer lo *GDP* i ava kontinyen redwir a en nivo bokou pli soutenab.

Mr Speaker, lemonn pe regard Sesel pli pre avek bokou lapresyasyon. E lavwa Sesel pe *echo* bokou pli for dan bann *forum enternasyonal*. Wi, nou Prezidan i reste angaze avek lemonn lo sa size vilnerabilite bann Pti Leta Zil.

Lafason ki Prezidan pe diriz nou pei, i enspir konfyans parmi bokou dirizan. Wi Mr Speaker, Sesel i lo bon semen. Mr Speaker, nou pa kapab elimin koripsyon dan son totalite. Me sa ki diferan ozordi se ki akssyon i ganny pran kont nenport dimoun ki enplike dan koripsyon.

An plis ki sa, sa Ladministrasyon pe kontinyen ekip nou bann lenstitisyon avek zouti neseser pou lalit kont sa fleo ki'n ronz nou sosyete. Bann lenstitisyon pe ganny ranforsi, pou zwe zot rol koman gardyen nou demokrasi.

Fodore pa ki zot eksprim laglwar pou dir ki koripsyon i ankor egziste dan nou pei. I

enportan ki zot reflesir byen, lo sa ki zot dir. Si zot vreman annan sa pep aker, zot devret pe anmenn bann ka ki zot konnen devan biro anti-koripsyon.

Si zot in tandem, me zot pa asire, demann *FPAC* pou intervenir e rod plis laklerte atraver Lofis Oditer Zeneral. Les mwan rapel mon bann koleg, se nou pep ki perdi ler nou soutir koripsyon. Se ou ek mwan ki bezwen peye pou bann frod ki arive dan nou pei. Koripsyon i kontribye pou fer lavi vin pli ser.

Alors ler nou koz lo kou lavi, nou bezwen osi pare pou lager kont sa fleo ki pe enpakte lo lavi nou pep.

Mr Speaker, mon konpran akoz Onorab Aglae in dir nou ki i santi loder koripsyon dan proze sid was. Larepons i senp, akoz Ladministrasyon *US*, ti oule ki sa larzan sa proze i vin dan zot lanmen. Pou zot donn bal parey labitud.

(APPLAUSE)

HON TERENCE MONDON

E sa msye ti annan rezon pou pa fer zot konfyans. Mr Speaker, lafanmir i reste pilye, pli enportan dan en sosyete. E dan en fanmir for zanfan i aprann ki savedir responsabilite, ki savedir

partaze e ki fason pou konport zot dan lavi toulezour.

Fodore nou zanfan i aprann pou viv responsab - pou vin responsab.

Annou aret sirkil bann lensidan negativ lo rezo sosyal. Annou fer plis pou protez fabrik nou sosyete. Nou sosyete i bezwen fanmir bokou pli for. E dan kominate bann fanmir i devret zwenn ansanm pou protez nou zanfan.

Mon oule salye tou bann dimoun ki pe donn en koudmen fer en diferans pou lezot. Lafason ki nou konport nou e respe ki nou donnen anver lezot, i fer en gran diferans dan en kominate.

Mr Speaker, mon mesaz pou nou etidyan se sezi tou loportinite pou aprann. Ler ou met zefor e reisi dan ou letid ou lavi pou transform pour le meyer, e nou sosyete i benefisyé.

Wi, mon salye tou bann zefor ki'n ganny fer pou retir labi dan byennet sosyal. Alor bann dimoun ki vreman pa kapab travay - ozordi bann dimoun ki vreman pa kapab travay pe resevwar soutyen neseser. Sa logmantasyon dan benefis sosyal in anmenn en soulazman pou bokou fanmir.

Mr Speaker, Seselwa pe byen apresye travay ki pe ganny

fer lo proze semen sid was. E parey nou konnen, sa proze pou elev bann distrik sa rezyon. Plis konfor e sekirite pou motoris e pyeton, plis fasilité *bus stop*, lalimyer e *bin site*.

Mon profite pou salye Minis Transpor avek son lekip pou zot langazman, pou delivre sa proze pou nou nasyon.

Mon oule zwenn Minis dan son lapel avek bann proprieter pou donn permision neseser ki ava fasilité lenplimantasyon sa proze. Developman nou lenfrastriktir semen i esansyel pou developman ekonomik nou pei.

Mr Speaker, Takamaka pou byento akerir en lotel 7 zetwal. Malgre tou ki'n ganny dir, en tel developman i vin avek plizyer benefis direk e en direk.

Mon konn plizyer travayer ansyen *Banyan Tree* ki pe atann sa moman pou retourn travay dan sa landrwa. Mon profite pou demann bann zenn ki pe fer formasyon lotelri, pou sezi loportinite pou aprofondi zot konesans ek leksperyans dan sa lendistri.

Mr Speaker, Seselwa in apresye sa reportaz lo lanmar Intendance. En size ki mon'n osi anmenn devan nou Lasanble pou rod plis lesplikasyon.

En reportaz ki'n devwal serten defayans dan bann differan letap devlopman en proze. Depi son planifikasyon, letid lenpak, lanvironnman e lenplimantasyon.

I pou enportan ki nou bann departman konsernen NGOs e lakominote an zeneral i travay pli pros ler nou annan bann gro proze devlopman. Wi, nou bezwen retir lesion pou adres bann mankman. Nou lanvironnman i nou biznes, e nou bezwen fer tou sa ki neseser pou protez li.

Sa ki osi enteresan, se kontaminasyon lanmar Intendance ti ariv depi lepok *Banyan Tree*. E sa anba *watch ansyen* Ladministrasyon US. Mon kontan ozordi ki zournalis i kapab fer en travay o profon, lo bann size ki konsern nou pep.

I domaz ki sa reportaz pa'n ganny fer ler *Banyan Tree* ti ankor an loperasyon. Avek travay ki pe ganny fer pou reabit sa landrwa. Mon ekspekte ki sa lanmar i ava retourn dan son leta naturel. I pou enportan ki nou ganny en lot reportaz, dan enn de lannen pou evalye progre ki'n ganny fer dan sa landrwa.

Mr Speaker, mon rekonnéte lenportans travay en zournalis dan en sosyete

demokratik, e mon toultan vot lo Bidze SBC zisteman pou asir sa sipor ki zot bezwen.

Sa Ladministrasyon pou kontinyen fer desizyon brav, e anmenn sanzman kot i neseser. Dan en fason for, Prezidan in eksprim son dezir pou ranvers sa tandans negativ dan nou sosyete. E fer en lapel solanel avek sakenn de nou, pou zwenn li dan sa zefor pou anmenn en kiltir pozitivite dan nou sosyete.

Dan son mesaz Prezidan pe osi apel nou, pou fer viv en kiltir responsabilite e respe dan tou sa ki nou fer. Nou bezwen en sanzman dan nou fason viv e dan lafason ki nou fer keksoz.

Mr Speaker, lakaz i reste en problem mazer. E malgre tou zefor ki Ladministrasyon pe fer, sa defi i enn ki reel. E bokou fanmir pe vvar zot dan bann sityasyon difisil.

2enm faz proze *ex-Desaubin* ki sipoze komanse sa lannen, pou anmenn en gran soulazman pou plizyer fanmir Takamaka ki pe esper en lakaz. Sa Ladministrasyon in fer bokou dan sa 3an. E mon napa dout ki sityasyon lozman i ava amelyore, anmezir ki nou lekonomi i grandi.

Alor mon ekspekte ki sa proze *mid-range condo* lo *ex-Desaubin* Takamaka, i kapab demare dan bann lannen ki pe

vini. Mr Speaker, travay pe kontinyen pou demar semen Jean-Louis, Jean-Louis Estate sa lannen.

I annan plizyer deseni ki sa bann fanmir pe esper sa semen. E sityasyon sa bann fanmir i vin deplizanpli kritik. Serten dimoun in bezwen kit zot lakour an atandan ki semen i ganny konstri. Mon konpran zot difikilte, e mon reste angaze pou realiz sa proze.

Mr Speaker, permisyon *wayleave* i reste en lot lobstak mazer pou nou bann semen. Travay pe kontinyen pou adres problemm *wayleave* pou bann fanmir Onezime ek Bristol dan leo Quatre Bonne. Plan semen pou bann fanmir Belle in byen avanse, e byento i ava kapab finaliz- nou kapab finaliz *wayleave* pou sa proze.

Nou reste angaze pou konstri semen konvenab pou nou zabitant, malgre defi ki nou fer fas avek tel ki *wayleave*, teren difisil e kou konstriksyon.

Pou sa lannen nou osi ekspekte vvar komansman serten travay lo semen Bougainville, ki pou enkli drenaz, resirfas semen. Nou pe osi organiz pou asiste fanmir Monthy e Sinon avek zot proze semen.

Wi Mr Speaker, sa i anmenn mwan lo nou

Lenstitisyon Lezislatif, ki bezwen evolye pou anforsi nou demokrasi. Nou lenspirasyon pou lotonomi ladministrativ e finansyel i bezwen vin en realite, e mon aport tou mon sipor anver sa demars.

Pou konkliir Mr Speaker, limite i en eleman enportan dan en sosyete. E parey nou konnen lafors i mars avek limite. Si nou oule en sosyete ki for nou bezwen limite.

Nou fitir zenerasyon pe depann lo nou sazes, e nou grander lespri pou fer sa ki meyer pou Sesel. Alor annou travay ansanm koman en nasyon, annou travay dir avek dedikasyon pou kree sa Sesel kot i ava annan lape, lanmour e prosperite.

Finalman Mr Speaker, mon oule asir tou Seselwa ki Sesel pou reste pour tou son zanfan. Akoz Ladministrasyon LDS ki pou ankor la an 2025 and beyond. Mersi Mr Speaker.

(APPLAUSE)

MR SPEAKER

Mersi Onorab. Laparol i prezan pou Onorab Wallace Cosgrow.

(APPLAUSE)

HON WALLACE COSGROW

Mersi Mr Speaker. Bonzour Mr Speaker. Bonzour tou koleg Onorab. E en bonzour spesyal pou tou oditer, telespektater ki pe swiv nou sesyon Lasanble Nasyonal ozordi.

Koman en Manm nou Lasanble Nasyonal i touzour en loner, i en privilegez pou mwan fer mon kontribisyon an repons diskour Leta nou Nasyon fer par Prezidan Larepublik o komansman en lannen travay.

Mr Speaker, apepre en pti pe plis ki 3an depi ki Gouvernman *LDS* pe diriz nou pei Sesel. E 4 diskour Leta Lanasyon pli tar, mon krwar ki Seselwa dan son gran mazorite pou dakor avek mwan ler mon dir ki Sesel e Seselwa ozordi i pli dan mal.

(APPLAUSE)

HON WALLACE COSGROW

In annan tro bokou fo promes e ozordi nou annan nou en Gouvernman o pouvwar ki preski pa kapab performen, pa pe travay dan zentere pep Seselwa. E bokou sitwayen pe dir ki zot in fatige, e zot in ganny ase 2025 pe tro tarde.

Sa Mr Speaker, i santiman zeneral parmi nou popilasyon ozordi. Me si nou pep pe santi koumsa, akoz ki Gouvernman i refize reazir pou adres sa

miltitud problem ki pe afekte Seselwa an 2024.

Pou preski 2erdtan, nou'n antann en Diskour Leta Lanasyon ki pa reflekte ditou vre larealite Leta Sesel e pep Seselwa ozordi. En diskour ki'n sey penn en portre ki tou keksoz dan Sesel i ok.

En diskour ki ranpli ek kontradiksyon larealite. En diskour ki'n tous serten size dan en fason tre siperfisyel me ki osi pa adres vre problem ki nou pe fer fas avek.

Tousala Mr Speaker, i bann siny en Gouvernman fatige, ki napa ledwa lo pou son pep. Se pourtan Mr Speaker, pa zis nou lo sa kote latab ki eksprim fristrasyon ver lafason ki Gouvernman pe delivre.

Apre ki mon'n ekout diskour sorti lo lot kote latab pandan sa 2 zour, mon kapab konstate ki zot osi zot realize ki i annan en pake problem dan sa pei. Me diferans ant nou avek zot, se ki nou oze dir lekel loter tou sa bann problem.

(APPLAUSE)

HON WALLACE COSGROW

Mr Speaker, souvandfwa nou regard Leta Lanasyon zis dan perspektiv ladres Prezidan e fonksyonnman Legzekitiv. Me ozordi mon oule komans mon

analiz lo Leta nou Nasyon, dan en perspektiv Lezislatif e sa se nou Lasanble Nasyonal.

Ozordi Mr Speaker, nou annan en brans Lezislatif ki son motto se “*Serving a modern democracy*”.

Me ki a latet sa Lenstitisyen Leta i en *Leader* ansarz en parti Politik, ki aktivman fer politik partizan e ki admet ki i asiste *Caucus meeting* son parti politik.

Nou annan a latet en pilye enportan promosyon lademokrasi, en Speaker ki pa ankor kapab dezasosye li avek politik partizan. Nou konnen ozordi ki i annan bokou presyon lo Gouvernman *LDS*, e lo ou menm Mr Speaker lo sa size enternasyonalman sirtou a nivo SADC.

Me malerezman se sa leta lademokrasi dan Sesel ozordi. Koman en Brans Leta enportan dan promosyon lademokrasi, legzanp i devret komans kot nou. Nou devret kapab annan latolerans dan nou diverzans. Me tro bokou fwa nou vwar kot lawwa minorite isi menm dan nou Lasanble i ganny siprimen.

Mon lans en lapel ozordi o debi travay nou Lasanble Nasyonal pou lannen 2024. Ki enn fwa pou tou, pou pran en desizyon ant sa 2 desizyon - ant sa 2 ki mon pe al donne.

Mr Speaker, swa ou *resign* koman *Leader LDS* ouswa ou *resign* koman Speaker. Mon kit sa avek ou.

(APPLAUSE)

HON WALLACE COSGROW

Mon kit sa avek ou, desizyon i reste pou ou Mr Speaker. Me mazin byen ki Lepep pe note e letan pa dan faver personnn.

Linite Mr Speaker, parey latolerans i osi enportan pou nou kontinyen bouze koman en nasyon. E Prezidan in koz lo limite dan son diskour.

Me mon bezwen dir Prezidan, ki pou nou kapab annan vre limite dan sa pei nou bezwen aret e kondann tou bann aksyon malis e vanzans ver enn a lot.

Ki mannyer pou annan limite parmi parti politik e politisyen ler ou persekit ou oponan politik zis pou denigre, sali son zimaz, pou ki i pa kapab debout kont ou dan eleksyon?

Ki mannyer nou kapab annan limite kan i annan viktimizasyon politik dan Servis Piblik? Ki mannyer nou kapab annan limite ler ou maltret e abes *cleaners*?

Ki mannyer nou kapab annan limite ler en Manm Elekte, en Depite Speaker

Lasanble Nasyonal i tret en sitwayen koman nwizans zis akoz i eksprim son lopinyon. E i menm dir si ou pa kontan *toughen up*, akoz li ki pe *rule border*.

Ler *Leader* Biznes Gouvernman dan son *speech* ki dabor pou mwan pa'n empresyonnant ditou, i koz lo pran byen *United Seychelles*. Ki dapre li *US* i en *perpetrator*, e i oule *US* i pey viktim *TRNUC*. Be oli sa lalis *perpetrators*? Kan ki Prezidan pou pibliy sa lalis?

(APPLAUSE)

HON WALLACE COSGROW

Ki ou pe espere? Pibliye. Annefe, pa zis nou ki pe rod sa lalis, viktим osi pe rod sa lalis.

Onorab Georges, i dir ki *perpetrators* ki bezwen peye. E Onorab Hoareau dan son diskour Mr Speaker, atraver ou i dir ki Gouvernman pou kree en Komite pou vwar ki mannyer pou peye. Ki ou kapab konpran? Parey Prezidan zot oule zis bat latet bann viktim, e zot pe *buy time*.

(APPLAUSE)

HON WALLACE COSGROW

E la nou tande i fer 2enm fwa i dir, la i le pran *Maison Du Peuple*. Me selman i le pres

linite. Be vini ou! Mon pe esper ou mwan! Vini, vin pran *Maison Du Peuple*. Vini! Vin zot menm !

(APPLAUSE)

HON WALLACE COSGROW

Ek sa i a ganny lodas dir ki *US* pa pou ganny ankor eleksyon.

Me Mr Speaker, i kontan dir sa! I kontan dir sa! Akoz in menm dir dan son piknik aktivis lo zil ki Wavel zanmen pou ganny ankor eleksyon akoz i tro pa oule ekoute. Si mon lalang, si mon lalang sa aktivis ki'n koz lalang. Pa i vre Onorab Georges?

E la mon lenkyetid Mr Speaker, i se ki Prezidan pe servi leskiz sabotaz e trenn lipye pou possibleman target sertern travayer Servis Biblik. I difisil pou annan linite kot i mank tolerans ver enn a lot, e kot politisyen pe kontinyen bat latet zot pep.

Travayer Servis Biblik pa sours problem Ladministrasyon ki pe fel. Me se zeran sa servis ki pa pe marse. Annou get en legzanp konkret. An Desanm zot in fer en nespes gaf avek fermtir korperativ *cleaners*. Si pa Prezidan li menm ki responsab pou sa soufrans ki bann *cleaners* in pas ladan pandan sa 2 mwan, lekel?

Sete Mrs Mohideen li menm ki ti vin dan *meeting* avek sa bann *cleaners*, ki apre ki zot in ganny – e dir zot ki apre ki zot in ganny re-deplwaye, tou keksoz pou reste parey. Apre ki nou vvar? Bokou zot bann *allowance* in ganny koupe.

E la mon pe demann Mrs Mohideen pou fer en keksoz senp. Premyerman prezant ek leskiz avek bann *cleaners*. E dezyenmman mon pe demann Gouvernman si zot annan en leker, donn bann *cleaners* en konpansasyon omwen R5000mil pou sa soufrans ki zot in pas ladan.

(APPLAUSE)

HON WALLACE COSGROW

Mr Speaker, ler ou vvar Prezidan i lev tou son bann Minis, e Sef Egzekitiv e trenbal zot *Dubai* pou en *leadership course*. E parmi sef Servis Piblik ki en profesyonnel dan *Public Administration*, ki ti ansarz Lenstiti *Management* Sesel. Vre nou dan , konmsi sa msye Roche Caiman.

(APPLAUSE)

HON WALLACE COSGROW

I malere pou dir ki leta nasyon Seselwa ozordi, i parey sa pti miray ki zot fek demoli lo

Terminal Bis Anse Aux Pins. Zis lobstak ki pe bar Seselwa, e kot souvandfwa nou pri e pe anpes nou bouze.

I sifi Mr Speaker pou zis regard leta Cascade, Petite Paris pour nou konpran vre Leta nou Nasyon. Sa i enn bann pli gran konsern ozordi ki Prezidan pa'n adresse dan son diskour. Ki ti vreman arive sa zour? Lekel ki vreman responsab pou sa kalamite le 7 Desanm? Kan eski lavi bann zabitan sirtou Petite Paris pou retourn normal?

Oli CCCL e akoz zot pa ankor vin devan? Akoz ki zabitan ki'n ganny deplase pou ki zot lakaz i ganny repare, i bezwen pey lokasyon kot zot pe reste tanporerman ?

Sa i detrwa dan plizyer kestyion ki bokou sa bann zabitan pe demande. Nou, nou kapab dir sa bann zabitan e pep Seselwa ki tou zot bann kestyion i kapab ganny reponn par sa msye. I annan tou fe e larealite otour sa lensidan. Me i pa pe dir nou tou laverite.

E se sa ki enportan annan en lanket endepandan. I enportan ki bann zabitan i okouran ki tou laverite lo stokaz leksplozif pa'n ganny devwale. Nou konpran Mr Speaker, ki ti annan omwen *4 container* lo site CCCL 2 pou CCCL li menm, en

lot pour Lapolis e en lot pou *SDF*.

Se pou sa rezon ki Mardi Onorab Lemiel ti refer lo bonm. Akoz dapre tou lendikasyon ti annan lezot kalite eksplozif apard dinanmit lo sa sit. Lapolis pa pou kapab donn en rapor lenvestigasyon emparsyal akoz i annan konfli lentere dan sa zafer.

(APPLAUSE)

HON WALLACE COSGROW

Si mon *statement* pa korek, e la mon dir si mon *statement* ki mon'n fer dan Lasanble Nasyonal pa korek. Mon demann CCCL ouswa Lapolis, ouswa *SDF* pou koriz mon *statement* e met o kler laverite.

Nou pa devret zanmen aret demann leklersisman dan sa lensidan ziska ler ki tou laverite i ava o kler. Si Gouvernman *LDS* pa pare pou fer li, 2025 US pou fer li.

(APPLAUSE)

HON WALLACE COSGROW

Leta bann biznes Providence sirtou bann pti biznes ki'n osi ganny severman afekte le 7 Desanm 2023 i osi enn ki sever e kritik.

Providence pe dousman retourn normal, par

determinasyon bann biznes selman. Me avek bokou difikilte, pert e det e vreman tre pe led dan lasistans Gouvernman.

Letan Prezidan i fer referans lo pourswiv Gouvernman, petet dan son lespri i pe mazin bann sirkonstans otour sa lensidan. E kwa ki en *case Ankour* i kapab devwale.

Mwan mon dir avek bann zabitan ek bann biznes ki'n ganny afekte pa bezwen abandonn zot resers pou laverite ek lazistis. Prezidan li menm i pa'n zanmen ezite pou pourswiv Gouvernman kan i ti santi li neseser. E i pa'n zanmen ezite ankouraz son bann siporter pou pourswiv Gouvernman.

Kwa ki'n sanze ozordi dan son fason panse? Ler li in byen anmas larzan lo Gouvernman, la aprezan en sel kou i sanz son *tune*.

Mr Speaker, ou konnen ler mon asize mon ekout Prezidan, mon annan lenpresyon, i en dimoun avek plis ki en personnalite. E sak personnalite i manifeste a diferan letan.

Ou pa kapab dir en keksoz lo en size, demen ou dir en lot, apre ou dir non Prezidan pa'n dir sa. Legzanp i senp, ferm

ACCS, koup pye dibwa Beau Vallon, eksetera, eksetera. Tro bokou Mr Speaker, pou kontinyen nonmen.

Dan en lesey pou sey rekonsolid son sipor ki i a pe perdi de zour an zour. E pou kontinyen retenir pouvwar, Prezidan in anons lentrodiksyon en 11enm, lentrodiksyon lamannman, en 11enm lamannman Konstitisyonnell an 2024. Pou etablir dat *fix* pou eleksyon. Retir lartik ki permet Prezidan dan milye en manda, demisyonnen dan milye en manda e kot Vis-Prezidan i kapab kontiny sa manda.

Nou, nou pe dir *set* dat 2024, *set* 2025. Nenport ki dat Seselwa in pare pou met ou ek ou Gouvernman enkonpetan deor!

(APPLAUSE)

HON WALLACE COSGROW

Mesaz i kler Mr Speaker. Lekritir i lo miray. 2025 nou pe tir li! *Enough is enough! LDS, never again.*

(APPLAUSE)

HON WALLACE COSGROW

United Seychelles Mr Speaker, in pandan 2023 pas dan tou distrik Mahe, Praslin ek La

Digue. E enn bann size ki'n domin diskisyon kot bann lakour avek bann zabitan se kou lavi.

Annefe kou lavi ozordi Sesel, pe afekte nou tou san eksepsyon. Sesel i tro ser, kou lavi pa senpleman kou marsandiz dan laboutik. I enkli kou elektrisite ek delo egzorbitan ki nou peye.

Kou transportasyon piblik ki'n ogmante. Kou Servis Piblik tel ki logmantasyon pri bato, ki swa tiket ouswa *cargo* pou bann zabitan Zil Pros.

Tousala i kontribye pou tir larzan dan nou pos. Me lekel ki ti promet, me lekel ki ti promet pou fer desann kou lavi e met larzan dan nou pos? Sete *LDS* zot menm, Seselwa pa ankor oubliy sa fo promes.

La mon mazin en msye Plaisance ki dir mwan ki ozordi sel keksoz ki sa Gouvernman in reisi met dan nou pos, se lenfirmite avek lanmizer nwanr.

(APPLAUSE)

HON WALLACE COSGROW

An 2019, Mr Ramkalawan ti dir ki zot annan solisyon pou fer desann kou lavi. Annefe i ti fer referans avek en Mosyon par Onorab Gervais Henrie. Kot zot ti annan solisyon pou fer desann kou lavi par omwen

30poursan. Sa ti zot seval batay pou ganny vot pep Seselwa an 2020. E lakle dan sa bann propozisyon sete STC.

Me ki nou'n aprann tou resaman ? Ki STC ki sipoze kle dan sa misyon pou redwir kou lavi, in fer R66milyon profi lo ledo Seselwa. R66milyon profi. Mwan mon pa vvar sa drol mwan. Akoz tou keksoz ozordi, tou keksoz ozordi dan STC, pri in pet plafon.

R500 kommisyon pres pou pa ranpli en pannyen. An 2019, problemm ti *middleman*, me ozordi nanryen pa'n sanze pep Seselwa. *Middleman* i reste en problemm. Sel diferans se ki la i annan nouvo *middleman*.

Les mwan eksplike. Ler *Chairman* STC olye donn direksyon sa lakonpannyen, i angaz direkteman koman en *middleman*, e fer biznes avek STC. Son laferm *Green Rooster Farm* i en *supplier* avek STC, e i en konpetisyon direk avek lezot *supplier*.

(APPLAUSE)

HON WALLACE COSGROW

E mon pe mazinen byento, i pou *supply* lasos tomat avek STC. Ler ki son lizin ava pe fonksyonnen Ile Du Port lo sa bout later ki fek pas bay.

(APPLAUSE)

HON WALLACE COSGROW

Ki mannyer Mr Speaker, ou kapab koz Leta nou Nasyon e pa koz lo sityasyon servis lasante o profon. Kan ozordi, problemm servis lasante i lo lalev tou Seselwa.

Lendi bomaten menm mon zwenn en madanm kot laboutik Dalon La Misere, i dir avek mwan, 'Onorab koz en kou lo problemm mank latizann, napa latizann pou tretman kanser'. Se pourtan mon'n deza koz lo la oparavan. Me sa problemm mank latizann i kontinyen persiste.

Mardi en siporter LDS i *text* mwan la dan Lasamble, i pe koz linefikasite kot *casualty* pou degaz lasasen. I dir mwan, i dir mwan, ekoute i dir mwan "li LDS zanmen ankor". Kot SOPD sa ki nou apel Trwa Zonn, manman problemm laba. Spesyalis i manke akoz zot move desizyon pou fer bann *Cuban ale*. E ozordi letan espere i tro bokou.

Laliny apwentman, avek laliny bann ki pe vin vvar spesyalis i melanze akoz sanzman ki zot in fer. Laliny i ariv ziska dan semen, e pasyan pe konplent. Napa tapi, napa tetedorye, napa rido. Bann zenn dokter napa en bon programm

spesyalizasyon. Problelm lanbilans, servis lasante ozordi i pli pir ki zanmen.

Menm si mon dir sa, mon konnen sa pa problem travayer. Me plito en mankman dan bann ki'n ganny responsabilite pou *manage* sa servis lasante. Ler mon dir Minis *resign*, zot oule ankoler avek mwan.

Dan milye tou sa problem Prezidan i swazir pou vin koz lo novo lopital, ki napa ni en konsep, e ki pou swadizan kout en bilyon Roupi. Sa i zis en taktik pou tir latansyon lo sa litani problem ki US pe koz lo la. Lopital i en proze fitir. Adres problem ki la deor ozordi silvouple.

(APPLAUSE)

HON WALLACE COSGROW

Bokou Seselwa ti pe ekspekte Prezidan koz lo langazman Sesel an sa ki konsern *WHO Pandemic Treaty*. Ler i deside reste trankil, nou krwar ki i annan kek keksoz ki i a pe kasyet.

Minis in fini dir ki pou siny sa Trete e sa menm san ki in angaze dan konsiltasyon avek pep Seselwa. Apre Prezidan a dir ki zot en Gouvernman ki konsilte. Sa pep i bezwen konpran vreman kwa sa Trete.

E ki lenpak pou annan lo bann dwa fondamantal nou pep.

Ki i pe kasyet? *Leader* Lopozisyon dan son ladres in fer tre kler, ki nou dan *United Seychelles* nou pou fer Minis vin eksplik pep Seselwa lo sa bann komitman ki zot pe fer kont laliberte sa pep.

(APPLAUSE)

HON WALLACE COSGROW

Nou pa pe al antre dan okenn konversasyon deryer rido. Tou pou bezwen pas isi lo *floor* Lasanble Nasyonal. Si i krwar ki in fini *surrender* nou souvrennte, nou dir li rekalkile. Si fodre fer en lot demann pou li *resign*, nou pou fer li.

(APPLAUSE)

HON WALLACE COSGROW

E mwan mon asir zot ki sa voyaz nou pa pou tousel. Si en size. Sa osi Mr Speaker, i en size *referendum* pou met devan pep Seselwa Onorab Larue.

En lot skandal ki sa Gouvernman enkonpetan in met nou ladan e ki pe fer nou ganny ridikilize lo lasenn internasyonal, se sa skandal *Red Sea Coalition*. Ankor Prezidan in deside pou kit sa lwen laba e pa donn leklersisman lo la. En desizyon

ki'n met sekirite Sesel e pep Seselwa a risk.

Ozordi nou'n vin en lennmi, en target bann rebel *Houthi, Yemen*. I serye sa, sitan serye ki resaman menm ki *Air Seychelles* ti'n apre pou fer vol Izrael, Gouvernman in per pou donn laprouvason. Nou pa konnen si en problem diplomatik, ouswa si presyon bann pei Arab ki'n anpes sa vol.

Sa Gouvernman enkonpetan in dan 3an, retir sa stati en pei non alinyen ki nou tenir pou bokou lannen. E ki bann pei ti respe nou pou sa. Parol la deor se ki ni menm Minis *Foreign Affairs*, ni menm Minis *Internal Affairs* pa ti o kouran sa komitman pou zwenn sa koalisyon. I paret ni menm Prezidan pa ti okouran ki in angaz nou dan sa koalisyon.

Zot tou zot in tann lo televizyon. Kote sa komitman ti ganny fer? E pou ki rezon zot in al anpay Sesel dan sa zafer. Sa i pa kler ditou.

Ankor Onorab Larue, petet sa i a en size ki ti a bon fer *referendum* pou konn pwennvi pep Seselwa.

An sa ki konsern lekonomi Mr Speaker, i kler ankor. An sa ki konsern lekonomi Mr Speaker i ankor kler ki Prezidan pa'n adres problem fondamantal ki bann akter e

kontribiter dan lekonomi pe fer fas avek.

Mazorite bann pti e mwayen biznes pa pe eksperyans menm krwasans ki Gouvernman pe koz lo la. Bokou i dir ki biznes in tonbe, an rezulta en popilasyon ki son pouvwar aste in ganny severman afekte.

Bann operator *Taxi*, loto lwe, *boat charters* e osi bann pti *guest house* ek *self-catering* pa pe eksperyans sa logmantasyon ki nou pe ganny dir dan lakantite kliyan ouswa reveni.

E mwan mon krwar i relye avek lefe ki en gran poursantaz sa bann viziter se plito bann ki vin par bato krwazyer, e bann travayer bato ton. I kler dan rapor biro statistik ki pa tou sa ki kalifye koman viziter ki bann viziter ki reste, e depans Sesel.

Tou resaman i donn en novo devlopman ki kapab anmenn reperkisyon negativ lo lekonomi Sesel. E mwan mon tre konsernen. Boner avek yer mon'n tann koz lo det ki Sesel i annan avek Larisi.

Petet la mon devret klersi en pti kou Mr Speaker, akoz mon ti ekout Nouvel. *Loan* ti \$6milyon. An 2020 Sesel ti komans re peye, an 2018 nou ti *default* akoz ti annan problem ekonomi. Ozordi i reste \$1 milyon, \$1.8 milyon pou Sesel

peye, apre ki ti annan negosyasyon avek *Paris Club* avek Larisi. Avek *Paris Club*, e nou sipoze pey 35poursan sa det.

So, letan nou koz lo sa bann zafer nou bezwen a size rod fe, pa zis dir Seselwa nenport kwa. Me sa novo devlopman Mr Speaker, i enn ki tre konsernan. E i annan relasyon pou fer avek Larisi. I paret ki Sesel in koup relasyon banker avek Larisi e ki bann labank pe nepli kapab aksepte ouswa fer transfer ver Larisi.

Eski Sesel in zwenn bann pei was, pou enplimant sanksyon finansyel lo Larisi? Silvouple vin eklersi nou.

Mr Speaker, ti pou enteresan konnen osi par egzanp ki zistans nou ete avek sa gran plan diversifikasyon ekonomik ki zot in koz bokou la lo. Ki ti pou evantyelman tir nou depandans lo Sekter Tourizm ki en sekter tre *volatile*. Lagrikiltir ti sipoze kle dan sa transformasyon, ziska aprezan Lendistri Kannel ek Lavannir i ankor tel lekel. Nouvo *bloodline* kabri pa ankor arive, e fasilité Grand Anse konstri pou abit bann *small ruminants* i reste vid.

Annefe lagrikiltir ozordi lo en pwennvi sekrite alimanter, i en sekter ki non performan e pe

pran en lapant kolaps dapre bann teknisyen dan sa domenn. Sa i an rezulta mank lenvestisman e Polisi kler pour sa sekter.

Annefe depi Gouvernman *LDS* in vin o pouvwar, serten desizyon mal kalkile pe severman afekte sekter prodiksyon zannimo. Kot bokou laferm in vwar zot bezwen redwir lo lakantite prodiksyon ki zot pe fer, zis pou zot nobou *manage zot cash flow*, e kit zot biznes marse.

Rezulta ki'n fini komans montre se en bes dan prodiksyon pou ek *pork* lokalman. Me Prezidan li dan son adres, i dir ki sa problem manze zannimo in rezourd e ki i en problem lepase. Kan nou konnen manze zannimo pa ti pe vann. E se selman Mardi ki bann fermye in ganny *text* pou dir zot ki manze pe rekomans vann. Ki ou kapab konpran? Dan tou sa ki Prezidan i dir, zis kontradiksyon.

An sa ki konsern lasistans sosyal, Prezidan in dir ki zot in ogmant lasistans sosyal ki en lakour i kapab kalifye. Pou li sa i en lakonplisman. Mwan mon dir li i kapab fer mont pli o posib. E ki sa logmantasyon pou selman fer sans si dimoun i kapab ganny akse avek sa lasistans.

An se moman mazorite aplikan pou lasistans sosyal i fristre, akoz sa lazans pa kapab soulaz zot soufrans. Zot laplikasyon swa i tarde, swa pa pe ganny aprouve. Sa ki'n pas dan sa sityasyon i konpran ki mon pe dir. I difisil la deor pou bokou fanmir.

An sa ki konsern benefis - statiter sekirite sosyal, wi in annan logmantasyon dan serten sa bann benefis. E menm kreasyon en novo benefis. Prezidan be dir mwan, kan eski ou pou ogmant benefis retret pou nou bann pansiōner?

(APPLAUSE)

HON WALLACE COSGROW

Kan ou pou onor sa promes ki ou ti fer?

Nou bann dimoun aze i bezwen re ganny zot bann *la joie de vivre*. Zot bezwen viv dan dinyite. Dernyen logmantasyon ti an 2019. Pandan sa dernyen 5an, Minis in ganny logmantasyon *allowance*, me nou bann retrete pa ankor vwar okenn logmantasyon. Silvouple get dan zot *welfare*.

Ler ki mon lo sa size benefis ek pansiōn, mon profite adres en konsern reel la deor parmi bann pansiōner ki pe ganny zot pansiōn retret avek Fon Pansiōn. Lalwa Fon

Pansiōn i dir ki i devret annan revizyon dan sonm pansiōn ki ganny peye tou le lannen baze lo to lenflasyon. Me pou 2024, in napa okenn logmantasyon e personn pa pe eksplik sa bann pansiōner. Fon Pansiōn i bezwen sorti e donn leksplikasyon sa gran group pansiōner.

Mr Speaker, sa zafer drog i mars avek koripsyon. Me nou a tous koripsyon apre. Lalit kont drog in vin en fars anba sa Gouvernman, zot in met en tim ki pe teroriz nou bann zenn dan bann kominate. Kas lakaz dimoun, tir grenad karoutsou dan salon, kas tou keksoz dan lakaz. Bokou sa bann dimoun se zis bann viktim, zot napa en sou programm avek zot sa 3an o pouwarr.

Nou'n retourne an aryer dan programm avek reabilitasyon. Bann paran ki zot zanfan in pri dan sa fleo, mon annan sa mesaz pou zot. Napa okenn solisyon avek *LDS*, zot in la 3an napa okenn solisyon.

Sel opsyon pou ou zanfan se en Gouvernman *United Seychelles* ki pou met an plas en programm konpreansiv pou nou bann zenn ki'n pri dan ladikasyon.

(APPLAUSE)

HON WALLACE COSGROW

Dayer, nou ti'n deza fer li, nou ti'n deza komans fer li.

Mr Speaker, ler ou ekout tou sa bann zafer ki mon'n dir i kit en kantite dout dan nou lespri. Bann proze ki ozordi pe ganny donnen san bann bon sistenm *tender*.

Bann proze ki ozordi gro, gro larzan ki ozordi pe ganny donnen avek serten kontrakter. Bann zil ki ozordi pe ganny fer bann proze lo la, san bon konsiltasyon.

Tousala Mr Speaker, i donn nou rezon pou krwar ki poudir i annan koripsyon. E nou, ki nou pe dir. Nou dir an 2025 enn bann premye keksoz ki nou pou fer pou lalit kont koripsyon, nou pou retourne sa Lalwa *Declaration of Assets*.

Tou dimoun politisyen, madanm, msye, zanfan, pou bezwen kapab deklar zot bann assets. Akoz se sa landrwa ki dimoun i al kasyet larzan malaki.

(APPLAUSE)

HON WALLACE COSGROW

Mr Speaker, lozman pou pep Seselwa in toulstan en *challenge* pou Gouvernman. Gouvernman *United Seychelles*, in fer bokou

lakaz, in fasilit bokou later pou konstriksyon lakaz.

Tousala ti vin avek en programm byen kalkile. Legzanp resan se 24/24/24, inisyé par Prezidan Faure. Tou sa bann proze lakaz ki ou vvar Gouvernman *LDS* pe fer louvertir sete proze anba 24/24/24.

Ozordi tou zot proze i ankor lo *computer*. 3an in pase, e mon vreman enkyet, napa gran konstriksyon ki pe ganny fer. E sa lalis *back log* pou lakaz pou retard bann aplikant ki pe espere lannen an aryer.

Leta nou sistenm ledikasyon i pa bon ditou. Premyerman tou sa bann gran, gran plan ki Minis ti vin elabore dan Lasanble o komansman zot manda, tousala i ankor lo papye ouswa dan limazinasyon Minis.

Problém mank resours i grav. *Teachers* i bezwen rod sponsor pou li fer en pti *maintenance* kot lekol. Mankman sez ek latab. Rezulta performan lekol in desann, *teachers* in demoralize. E la fek devlope, mon pe sey ganny en konpran ki mannyer zot mazinen.

Pou programm *technical* sa ki nou apel *TIVET*, zot oule fer dan bann lekol ki deza egziste e pou komanse la 2enm term. Zot oule koup letan lekol zanfan S1

ziska S3, pou fer li fini 1er. Apre fer *TIVET* antre 3er. Ki pou arive avek sa bann zanfan apre 1er? Konbyen peryod lesion pou bezwen ganny koupe? Sa pou annan en lefe direk lo performans akademik a lavenir.

Mr Speaker, Leta Lanasyon Seselwa an 2024 i enn ki sonm. Ler ou pran letan pou koz avek dimoun, ou pou vitman realize ki bokou pe viv dan dezespwar, pou diferan rezon.

Sakenn i annan son konsern ki pe preokip li. Ki swa zot lakour, zot zanfan ki'n pri dan fleo drog. En pti renovasyon ki bezwen ganny fer kot lakour, me napa finansman. Zot biznes ki pa pe fer byen, e napa sipor e bokou lezot ankor.

Dan lavi i normal pou annan konsern. E pa tou keksoz ki mars parey nou anvi. Me problem ozordi se ki bokou dimoun pa pe vwar en solisyon. Bokou i dir ou ki lontan mon ti tap en laport isi, tap en laport laba e mon ti vwar en laklerte.

Seselwa Mr Speaker, in perdi lespwar. In perdi lespwar ki i pou annan ase larzan lafen dimwan Fevriye, pou anmenn li ziska lot lafen dimwan.

MR SPEAKER

30 minit Onorab.

HON WALLACE COSGROW

In perdi lespwar...

MR SPEAKER

Mersi.

HON WALLACE COSGROW

Wi Mr Speaker, mon pe terminen.

In perdi lespwar ki kou lavi pou kontinyen afekte - pa pou kontinyen afekte son Bidze an 2024. In perdi lespwar ki i kapab ganny en pti lasistans kan in bite. In perdi lespwar ki tre byento i kapab ganny en trwa lo son latet. In finalman perdi lespwar dan son Gouvernman e son dirizan.

Prezidan mon dir ou sa pti parol ozordi. Annou aret zis dir nou pe fer byen, nou limero enn. Dimoun pe soufer la deor, annou atrap zot lanmen. Mon osi anvi dir ek pep Seselwa, ki menm ki i paret difisil e ki ou pa pe vwar opsyon devan ou, kit ou lespwar vivan. 2025, nou pou tir li, akoz *United Seychelles*...

ALL US MEMBER

Sel opsyon pou Sesel!

(APPLAUSE)

MR SPEAKER

Mersi Onorab. Nou a pran poz la e nou a reprean repons 11er.

(BREAK)

MR SPEAKER

Nou a reprean. Laparol i pour Onorab Regina Esparon.

HON REGINA ESPARON

Mersi Mr Speaker. Bonzour tou dimoun a lekout. Spesyalman bann zabitan Glacis. Mersi pour donn mwan laparol pou kontribye mon panse lo Diskour Prezidan lo Leta Lanasyon.

Premyerman les mwan konmanse par felisit sa de novo Manm madanm, ki'n ganny swazir pou vin zwenn nou dan Lasanble.

Zot in aksepte pou pran en responsabilite ki vreman enportan e nob pou deservi zot pei. E vin ede dan sa lalit pou promouvwar e defann drwa nou bann madanm, pe enport dan ki kad lavi i sorti.

Mon swete ki zot vin bann Anbasader e legzanp pour lezot madanm. E ki zot lavwa a enfliyans bann desizyon ki afekte lavi bann madanm dan sosyete.

Bonn sans dan sa parkour politik Onorab Bistoquet e Onorab Spiro. Zot nominasyon i fer ki poursantaz madanm dan

Lasanble i kontinyelman ogmante pou vin plis ki 26 poursan, pandan ki nou kontinyen rod sa 50 poursan reprezantasyon parey Protokol SADC i demande.

Mr Speaker, mon pou dir ki devan mwan mon vwar en Gouvernman dinamik, ki pe kontinyen met bezwen son pep premye, kot i ede dan tou sirkonstans. Sa i malgre bokou kritik, diferan defi e sok ekonomik mondyal ki kontinyen tap en pe partou kote dan lemonn.

Kot nou osi konman en pti pei, nou pa ganny eparnyen. Me nou kontinyen annan sa rezilyans. Nou lekonomi i reste solid e nou reste for anmezir ki nou solider ek larestan pei ki pe fer fas ek bokou plis difikilte.

Wi Mr Prezidan, nou en nasyon dinamik e rezilyan parey ou menm, ki'n fer fas avek bokou dan 2023. Be ou'n debout solid akote sa pep ki'n fer ou konfyans.

Nou fyer pou annan en *Leader* parey ou ki demonstre sa rezilyans e get lavenir ou pep ek en lespri pozitiv, fas a nenport ki kalamite.

Nou'n vwar ou 4er bomaten pe vizit dimoun ki ti dan maler, pou rod en solisyon. En legzanp tipik se bann lensidan ki'n ariv le 7 Desanm

2023, kot soudan nou ti vwar nou fer fas avek en leksplozyon ki ti arive kot CCCL.

Yer nou'n soke pou tann dir ti en bonm. Ek zot mon a konnen. Ki'n detri lakaz e afekte bokou fanmir e osi kit bann biznes dan lenzirditan.

Nou'n vwar kot Gouvernman in debout for ansanm avek Onorab Monthy, akote sa bann ki ti'n ganny afekte, malgre tou sa ki'n ganny dir.

Ti osi annan sa kalamite gro lapli ki'n afekte nou bann distrik dan nor. E lo sa size, premyerman mon senpatiz ek bann lafanmir ki'n perdi enn zot pros. Mersi pour bann ki ti kit zot fanmir e vin ed bann lezot ki ti pli dan bezwen.

Mersi DA Christelle ki'n la akote mwan pou soulaz sor bann fanmir. Mersi Justin ki'n ed nou avek *excavator*. Mersi lezot DA ek mon 2 koleg MNA, Onorab Arissol ek Onorab John Hoareau, ek zot brigad dirzans dan rezyon nor ki'n travay konman en lekip akote lezot lazans pou ed bann fanmir dan detres.

(APPLAUSE)

HON REGINA ESPARON

Parey Prezidan ti fer resorti dan son Diskour, e parey nou'n osi

vwar lo rezo sosyal kot i annan dimoun ki'n dir Gouvernman pa ti'n devret antre pou ed personn.

Me parske Gouvernman i annan leker pour tou dimoun. E dan lespri Sesel pour tou son zanfan, zot in fer tou sa ki zot ti kapab pou ede.

E mon apresye ki bann fanmir ki ti ganny afekte in ganny ede. Sakenn dapre son gravite e bezwen dan limedya. E mon konsyans ki i annan ki ankor bezwen led lo en peryod pli lonterm. E mon asire ki personn pa pou ganny kit deryer.

E pour lafanmir Marianne dan distrik Glacis, ki zot lakaz malerezman in andomaze, ki'n bezwen ganny deplase dan en lot labri. Lotorite konsernen pe fer tou posib pou rezourd zot difikilte pou antre, pou repar zot landrwa.

Mr Speaker, mon osi oule koz lo medya, tout an rekonnnet ki zot rol i enportan dan lasosyete e ki pep i kont lo zot pour lenformasyon kredib. Be ki nou vwar?

Souvan, lenformasyon pa balanse, kot bokou fwa nou pa pe ganny en revi antye. Kot nouvel i mank bout, mank lenformasyon e menm parfwa donn fo lenformasyon.

E si ozordi zot rapport lo en keksoz, e demen sityasyon i sanze, zot sourd oubyen zot aveg. Parfwa ou demann ou lekor, kwa ki anpes zot al *the extra mile* pou kit nou pep byen enformen? Zot kapab dir ki nou'n toulstan anvi en medya endepandan.

Wi sa in toulstan nou swe. Me sa ki nou pe demande ki osi enportan, e senpleman konn balans nouvel. Parske nou rekonnet ki rol medya dan en demokrasi i primordyal. E sa pa rezon pour zot azir konmsi zot en lot parti politik dan Lopozisyon. Konn balanse silvoule.

Annou get en kou leta nou bann zom e fanm dan liniform. Mr Speaker, nou bezwen rekonnet ki in annan en gran amelyorasyon dan servis Lapolis.

Me an dizan sa, mon osi rekonnet ki i annan ankor bokou pou fer pour nou ganny en Departman Lapolis ki pli efikas e pli profesyonnel. Kot i annan konfidansyalite a tou moman dan levidans ki piblik i donn zot.

An menm tan, mon felisit bann Zofisyen Lapolis ki pe delivre alaoter, e swete ki zot vin bann model pour zot lezot koleg.

E en keksoz toudmenm Mr Speaker ki bokou dimoun i apresye, ki Lapolis i servi son paz lo rezo sosyal pou partaz lenformasyon avek piblik. Sa i ede pour dimoun ganny lenformasyon e prevwar dan en fason pli vitman.

Parey letan i annan en semen piblik ki fermen ouswa en aksidan ki arive. Oubyen propaz lenformasyon kan en dimoun i manke e met zot portre.

E la mon oule senpatiz ek lafanmir Francis Olivia dan mon distrik ki ankor manke pour plis ki en mwan. Nou swete ki i ganny retrouve sen e sof. E mon salye sa linovasyon pou asire ki piblik i ase enformen. En linisyativ ki ti a osi kapab en lapros ki ganny adopte par lezot lazans ou Minister lo zot paz. Zis konman en fason *alert*.

Annou ankouraz bann lapros inovativ pour nou amelyor komunikasyon e lafason ki nou pas lenformasyon kredib avek piblik.

Mr Speaker, letan ki mon lo sa size Lapolis, mon oule remersi Gouvernman ek Komisyoner Lapolis pou konmans prosedir pou reouver Kordgard Glacis, kot travay in fini demare.

Sa i a re-anmenn sa vizibilite Lapolis dan kominote, kot i a met en pe lord. E osi a dekouraz lezot aktivite antisosyal ki pe afekte nou kominote.

Sirtou la o bor lekol ek Legliz, kot zot groupe vizavi sa laboutik Endyen. Vin en nwizans, *disturb* zanfan dan lakkas ek gro, gro betiz, *harass* bann madanm ki pase.

E la ki distrik in koup en pe sa bann pye dibwa, e retir sa bann gro ros kot zot ti groupe, zot al pli o dan simityer. E bokou fanmir pe konplent ki zot bwar lo latonm. E ler zot sou, zot dormi lanmenm e kraz po fler.

Mon panse ki avek louvertir Kordgard, i a anmenn en pe plis lord dan sa landrwa. Mersi pour sa bon linisyativ.

Mr Speaker, ozordi nou an fas en pep ki depi 2020 zot in ganny laliberte pou eksprim zot libreman. E menm kapab kritik sa Gouvernman ki zot menm zot ti elekte. Sa i montre ou nivo demokrasi ki *LDS* in etablir dan sa pei.

E mon apresye ki ler zot koze, Gouvernman a son tour i ekoute, i analyze e i balanse. Nou'n vwar ki Gouvernman in antre pou pran swen ek son pep. E sa in ganny demonstre

par revizyon bann kad lasistans sosyal atraver ASP.

Wi, ti annan en pe tapaz ler ti pe met en pe lord dan sa dezord. Ti enportan pou ferm en kou sa tiyo labi. Analyze, balanse, e pran bann desizyon brav e ferm.

Kot sa enn ki ti kapab travay, ti ganny ankouraze pou al travay, oubyen ede pou ganny en lanplwa. E sa lasistans ti al anver en lot son frer ki ti dan bezwen.

Pa blyie ki avek US, ler tiyo ti ouver pour eleksyon, zanmen i fermen. E sa ki ganny loportinite i kontinyen abize.

Lekel sa pei ki ler Gouvernman pe ed ou atraver en kart STC, ou kapab akimil plis ki R15 a R20mil lo ou kart? Eski ou ti vilnerab e dan bezwen? Larepons i non, ou ti pe zis abize. E rezulta sa legzersis in prouv pour li menm ozordi apre sa revi. In annan lasistans ki'n ogmante par plis ki 200 poursan.

E in osi permet Gouvernman vin ek novo lasistans, parey dan ka kot en manman i delivre plis ki en zanfan. Omwen i a konnen ki i annan sa lasistans la pou ed li. Kot i pa bezwen kas latet pou rode ki mannyer i pou pran ka avek son bann pti trezor ki'n vin an plis. Sa i montre ki

Gouvernman pe kontinyen met lanfaz lo byennet lafanmir.

De lot kote, mon pou dir Mr Speaker, mazorite Seselwa ki mon'n koz avek i ankoler. I ankoler pou tandé ki 54.1milyon larzan Lepep Seselwa in ganny depanse dan sa zafer *TRNUC*, pou konn laverite e konnen ki ti vreman pase dan sa sapit nwanr listwar nou pei.

En sonm ki si ti'n napa sa bann forfe, ti ava kapab ganny servi pour byennet sa pep. Ki swa pou fer plis proze lakaz. Donn plis lasistans sa ki merite. Anbelir bann pti proze dan distrik pou amelyor lavi nou bann zabitant. Ensi ki anvoy plis dimoun trete aletranze.

I malere, ki sa larzan in bezwen ganny gaspiye dan sa fason. E la ankor ozordi nou vvar ki bokou det Gouvernman lepase pe tonm lo zepol Gouvernman dizour.

Det ek Gouvernman Larisi. Peyman pour *fungus* kot – konpansasyon *fungus* kot Libreri Nasional. Peyman delo kontaminen La Misère ek Barbarons. Domaz kot Stasyon Elektrisite Praslin. E la, konpansasyon pour zot bann atrosite komet anver nou pep letan zot ti o pouvwar.

Prezan Mr Speaker, zot menm zot ganny lodas vin fer

pledwari ek figir pitye, pey *IOT* son 13enm mwan. Kan Gouvernman in fini donn son *share* e se *IOT* ki'n swazir ki mannyer pou distribye.

Zot koz labous plen e bliy det ki zot prop Gouvernman in kit deryer. Lafous pe mir la. Zot konmans lager pou vin defrise. Kan se akoz zot ki 54.1milyon in bezwen ganny gaspiye pou konn laverite, pour ki sa manman i konnen ki zot bann dirizan in fer ek son garson. E ki mannyer zot bann dirizan ti donn lord pou tortir sa pep, koup parti morso met dan sak plastik.

Se sa ki'n kout Gouvernman *LDS* ser Onorab Gill, atraver ou Mr Speaker. 54.1milyon ti a repar tou sa defayans kot Lopital Baie Ste Anne ki ou pe demande. Ensi ki aste plis lekipman medikal pou met dan sa lopital. E ou ti a menm kapab ganny 2 lasose. E ti ava kapab pey sa R5mil ki Onorab Wallace pe demande pou pey bann *cleaners*.

Letan mon lo sa size *TRNUC*, mon felisit Prezidan Ramkalawan ki'n ganny sa liminite e kouraz pou vin devan sa pep. Sirtou la dan sa letan karenm, e demann en leskiz lo lapar ansyen Gouvernman, avek bann viktim e lezot dimoun ki'n sibir labi e

viktimizasyon anba zot pouvwar.

Sa i montre ki i en zonm ki ranpli ek lasazes ek liminite. E mon salye li pour sa zes kouraze.

Kestyon i reste Mr Speaker, ki mannyer ki Gouvernman pou antreprann repeyman pour konpansasyon bann viktim dapre rekomandasyon dan sa rapor final?

Santiman bokou piblik se ki pa devret tous okenn larzan tax dan kof Gouvernman pou pey viktim avek. Me plito, anmenn en Lalwa pou sezi zot bann asset, oubyen fer en *referendum* parey Onorab Larue ti pe propoze. E sa ki enplike oubyen ki'n partisip dan sa bann atrosite, a kontribye anver sa konpansasyon.

En lot size ki Prezidan in touse dan son diskour, se pou annan en dat *fix* pour eleksyon, ki ti osi en promes eleksyon dan *manifesto LDS*.

Mr Speaker, en tel linisyativ i pou ed nenport Gouvernman dan son plan a lavenir. E apre eleksyon, tou dimoun a konnen egzakteman kan lot eleksyon.

Akoz i pou dan Konstitisyon e personn pa pou bezwen desann kot Lorloz ek son boutey *Jameson* pou dir

“mon oule eleksyon”. Oubyen deklar son lekor Prezidan, kan ni lo papye vote i pa ankor arive. Mon poz sa la.

Mr Speaker, i annan en dikton ki dir “linyon i fer lafors”. E kan en pep i ini, sa i fer li pli for. Set avek sa lespri limite ki depi avan nou pe pou devan. Se sanmenm ki pou fer nou vin pli for. Regard nou pti pei Sesel kot deplizanpli nou pe vin vizib dan lanvironnman global.

Mr Speaker en senp legzanp. Lo kote SADC, ou menm ou, ou a latet SADC, kantmenm zot pa kontan. E Sesel i okip 2 pozisyon *Chairman*. Enn okipe par mwan menm, e enn ki ti ganny okipe par defen Onorab Bistoquet. E la ki mon felisit Onorab Samynadin pou pran sa plas.

Dan *PAP*, 2 nou Manm in ganny pozisyon kle. *IPU* menm zafer. E la mon vwar ki Madanm Quatre fek ganny en pozisyon kot *AU*, e mon felisit li. Sa i montre ki Seselwa i ranpli avek talan. Annou met divan anba zot lezel.

Nou sanpyon Lekonomi Ble e Sanzman Klima pour bann Pti Leta Zil, kot Prezidan menm ki a latet. Nou lavwa pe ganny tandee Mr Speaker. Pe ganny tandee lo lasenn enternasyonal. Nou bezwen

annan linite, rezilyans pou fer nou vin pli for e pli vizib.

Les mwan get en pe Mr Speaker, ki pe arive dan mon distrik atraver zefor ki sa Gouvernman pe fer pou anmenn ankor plis lespwar e amelyor sityasyon nou sitwayen lo nivo kominoter.

Mr Speaker, mon kapab dir onnetman ki anba sa Ladministrasyon, mon pe vwar distrik Glacis pe bouz lo sa lavites. Wi i vre ki in annan serten keksoz ki'n ganny fer dan lepase. Me avan, souvandfwa proze ti trennen. E sete selman ler eleksyon ki ou ti vwar en mouvman.

Ozordi sa i pa leka. Depi zour ki Gouvernman *LDS* in pran labar an Oktob 2020, mon lekip ansanm ek Ladministrasyon Distrik, nou pe bouze avek sipor Gouvernman e nou pe vreman fer en gran diferans dan Glacis.

Mr Speaker, mon'n touzour met lanfaz lo nesesite adres problem delenkan dan kominote. E ozordi mon fyer pou dir ki avek nide sorti kot kominote, nou'n inisyé serten proze ansanm avek bann lezot lazans oubyen avek endividé prive. E ki sa i deza konmans annan serten lenpak pozitiv.

En legzanp se sa proze servi materyo resikle ki Mr

Mervin Mathieu pe al antreprann o bor lanmer North East Point, zis akote laplenn. Dan milye en landrwa ki oparavan ti delapide e kot tou sort kalite aktivite anti sosyal ti deroule.

Ozordi menm si sa proze i ankor dan son staz konmanse, deza bann aktivite anti sosyal par bann delenkan in preski disparet dan sa landrwa.

E la mon oule felisit Mr Mathieu konman en zenn envestiser lokal pour sa linisyativ. Ki non selman in netway sa landrwa e fer li pli atiran. Me osi pour lefe ki atraver son zenerozite, pour lemoman, dimoun ki frekant sa landrwa i kapab santi zot konfortab akoz in annan ban ek latab an bwa fer avek palet ki zot kapab servi.

Sa proze ki pou osi annan en galeri dan sa pti batiman 2enm *Guerre Mondiale*, zis akote lo bor lanmer, pou ed nou distrik pran en pa aktiv dan devlopman touristik, akoz i pou ofer viziter en lot latraksyon. E i pou osi kree lanplwa pour dimoun zanmerant.

Mr Speaker, zis akote sa devlopman, i annan sa laplenn ki o paravan ti dan en leta ki pa ti alaoter e i ti napa bokou aktivite sport lo la.

Mersi Gouvernman Lokal pou *refence* sa laplenn. E avek partisipasyon nou kominate e serten volontier, ozordi dan *weekend* i annan zanfan ki ganny sans aprann zwe *volleyball* e menm foutbol. Tousala avek bi ofer nou zenn en opsyon pli an bonn sante ki ava anpes zot tonm dan delenkans.

Ankor dan sa zanmerant Mr Speaker, i annan sa pli vye batiman 2enm *Guerre Mondiale*, ki zot apel li batiman Makarios ki la akote lopital o bor *supermarket*, ki'n tonm dan labandon. Ki in vin en *hotspot* pour aktivite antisosyal. Ki'n ganny *allocate* ek en *businessman* depi 2015 anba ansyen Gouvernman.

Finalman apre bokou negosyasyon e kestyion ki mon'n anmennen menm isi dan sa Lasamble pou met en pe presyon. De semenn pase plan detaye in ganny prezante ansanm ek Leritaz ek Lotorite Distrik. E byento nou a vwar en nouveau latrakson touristik dan sa landrwa. E sa pou osi fer nou bann artizan – pou ofer nou bann artizan en posibilite, en lokasyon pou vann zot prodwi.

E i pou osi en loportinite lanplwa pour nou lazenes, e artizan ki anvi lwe en kyosk, pou kapab fer li. Kot i

pou osi ofer lezot servis, parey facilite ATM e kyosk pour peyman bill.

Ozordi North East Point i annan li son bazar legim ek fri. Touzour dan sa menm lanplasman o bor lanmer. La i pre avek lakominote ki vann prodwi sorti dan zalantour.

Nou osi annan sa *mini hall* dan vilaz North East Point ki'n tonm an rin. E en vizit in fini ganny fer boner sa lannen par Gouvernman Lokal, pou vwar ki fason Gouvernman i anbark lo en plan renovasyon pour benefis zabitan sa vilaz.

Mr Speaker, devlopman ekonomik en pei pa selman responsabilite Gouvernman santral, me bann aktivite dan distrik i osi pou lekonomi pei. E nou'n toulstan ankouraz e felisit nou zabitan ki pe fer byen.

La mon mazin Mr Jimmy Banane ek son frer Nicole ki dan lagrikiltir anler dan leo Lillot. E mon osi mazin Mr Teophane Azemia anler O'Kanbar ki fer elevaz zannimo.

Mon kontan ki Minister Lapes ek Lekonomi in rekonnent nesesite pour nou bann peser annan en nouveau bazar dan Glacis. E la mon lans ankor en lapel avek bann peser dan nou distrik. Zot in demann bazar. Lotorite konsernen in

enplimant proze. Alor silvouple, servi sa fasilite ki la pour zot.

Nou'n fini met premyer pyer pour en *store* lekipman lapes pour zot. Annou montre sa lapresyasyon e servi o maksimonm bann fasilite pour ki nou kapab asire ki nou bann zabitan i ganny akse avek pwason fre dan nou kominote menm.

Mon'n toultan met lanfaz lo laspe sosyal dan nou devlopman. Ozordi mon pe repet mon lapriyer. E la mon osi *echo* sa ki Prezidan in dir. "Pou ou kapab okip en zanfan, fodre ou kapab okip sa manman avan".

Dan sa laliny Mr Speaker, permet mwan fer sa refleksyon. Gouvernman in met an plas en kad pou ranmas bann dimoun ki ganny konsidere konman *homeless*. Nou apresye sa linisyativ.

Me, mon sel konsern se ki sa lasistans an se moman, pe selman adres bezwen bann msye ki napa en landrwa reste. E nou vwar bann madanm in ganny kit deryer.

Mon konnen ki dan Bidze in ganny et en sonm pou fer en *halfway home*. Mon swe se ki Gouvernman i konman en konversasyon pou gete ki mannyer nou osi kapab inisyé en tel fasilite pour bann

madanm e zanfan ki *homeless* pour en rezon ou en lot. En pe parey nou pe ofer pour bann msye.

Par kont Mr Speaker, pour en madanm kapab elve son zanfan, i bezwen en lankadreman ki permet li fer sa. I tris pou dir ki ozordi i annan manman ki pe pas kaz an kaz, port an port e pe rod en landrwa lozman. E i osi annan ki pe dormi en pe partou.

Pour en rezon ou en lot, sa bann madanm napa en landrwa reste. Swa zot pros in met zot deor, pour en rezon kelkonk. Swa zot in tonm dan bann move lenfliyans. Oubyen zot napa mwayen pou pey lozman.

I annan ki lo lalis pe esper en lasistans lakaz avek Gouvernman. Me menm avek *part rental*, zot ganny difikilte. Nou bezwen get en pe pli o profon dan sa sityasyon, e rod solisyon ansanm. E la mon mazinen poudir ledikasyon osi i en konponan ki bezwen ganny adrese dan sa bann sityasyon.

Mon pa pe demann konstrir en gro batiman, me en lozman tanporer ki ava fer ki nou a evit bann sityasyon tel parey prostitisyon, lansentman anba laz, vyol e lezot danze ki kapab ariv ek bann madanm ki'n trouv zot dan sa bann sityasyon.

Bokou in ganny realize anba Ladministrasyon LDS. Lo kote SLTA mon ti a kontan remersi zot pou donn nou distrik plis lalimyer. Plis *crash barrier* ki'n ganny enstale pour proteksyon pyeton e osi transpor dan landrwa danzere.

I annan ankor ki lo proze pour sa lannen. Parey met ankor plis *crash barrier* an desandan *Carana* apre lotel kot *Villa Falcon*, anler loter Lilot kot semen nef, e lezot ankor.

E nou pe osi esper enstalasyon laglas dan semen montanny Bamboo, Carana. Semen leo Lilot, Sorento kot laboutik e lezot ki lo proze pour sa lannen. Nou'n ganny en pe. Nou'n ganny en pe. E eskiz mwan si mon pe demann ankor.

Mr Speaker, mon ti a osi kontan dir mersi sa 2 *businessman* prive ki'n pare pou finans sa *bus shelter* o bor laboutik *Shanu*, Sorento. Pour *bus stop* Lilot, nou ankor pe negosye *wayleave* ek en proprieter prive.

Nou osi konstate ki nou distrik in vin pli prop. E pour sa mon remersye *LWMA* ki pe rann sa servis lakominote. E mon felisit bann kontrakter ki pe delivre byen lo zot kontra. Parey Anabelle – parey Amanda avek

Cecile. De madanm serye dan zot louvraz.

Me selman Mr Speaker, i reste en defi kot sertern kontrakter pa pe delivre alaoter e pa pe onor kondisyon dapre zot kontra. La mon oule lans en lapel ek bann kontrakter *LWMA* ki ankor pe trenn lipye, pou pran zot travay o serye pour ki i a kit nou distrik dan lapropte.

E menm zefor pour piblik ki servi *bin site*. Annou vin pli responsab e depoz nou salte byen. Parske kan ou, ou pa pran ou responsabilite e ou pa servi byen *bin* piblik, li sa dimoun ki'n donn permision pou plas sa *bin* lo son later pour ki kominate i ganny sa servis pli pre ek li. I oblize demann Lotorite pou retir sa *bin* lo son propriete. E demen se lakominote ki perdi.

Mr Speaker, proze lakaz *ex-Ferrari* in demare tar lannen pase. E nou ekspekte ganny 12 *unit* 2 lasanm disi lafen lannen. De lot kote nou kontan ki Gouvernman in aste sa bout later anler La Gogue e pe fasilit - pou fasilit proze semen, pou akse sa morso later *ex-SACOS*, pou demar sa proze 48-unit anba *Saudi Fund*.

E in osi finaliz sa lesanz ek Mr Hoareau pou fasilit en proze semen pou deservi lafanmir

Bertrand, Brizilia, Estralle, Figaro e lezot dan leo La Gogue.

Vizit in ganny fer Sanmdi pase ek tou lazans konsernen ek bann propriyete, pou konmans sa bann demars. Mon osi kantmenm dousman, dousman dan sa fore, mon'n monte, mon'n grenpe, zot in vwar mwan.

Travay lo semen Hoareau Machabee pou konmanse semenn prosen. E negosyasyon i ankor Ankour pour lezot proze semen, parey semen kot lafanmir Azemia ek Bamboche. E semen kot lafanmir Barreau ek Antat e lezot.

Mr Speaker, mon kontan ki semenn pase ansanm ek tou lazans konsernen, nou'n finaliz konsiltasyon ek bann *tenant* lo *Malaysian Flat*, pour sa travay sanz twatir lo tou bann *flat*. E mon oule remersi Minis Rangasamy pou pouss sa devan.

Mr Speaker, letan mon pe fer letour mon distrik, mon pou dir mersi Gouvernman pou re-aranz sa bus stop o bor *Rehabilitation Center*, North East Point.

E osi renovasyon ki'n ganny fer lo *Vocational Training Center* ki'n konplete, e nou swete ki byento dan mwan Mars, bann etidyan a refer zot larantre laba dan plis konfor ki sa facilite pou ofer.

E la mon anvi lans en lapel avek piblik, ki anvi donn en koudmen pou vin ede pou netway sa landrwa. Apartir demen pou annan en legzersis netwayaz ki pou ganny fer, demen ek Sanmdi dan sa landrwa. Piblik ki enterese zot kapab zwenn laba apartir 8er bomaten pou vin donn en koudmen.

Letan mon pe arriv a lafen, mon oule lans en lapel ek Minister Lasante pou regarde si nou kapab ogmant konsiltasyon dokter, pou fer li vin omwen 3 fwa par semenn Klinik Glacis, e re-aranz servis distribisyon latizann.

Mon dir osi mersi DA Christelle pour sa bon korporasyon travay ki nou'n annan ansanm.

Mr Speaker, mon ti ava osi kontan felisit bann atlet madanm ki'n fer byen dan lannen 2023. E la mon felisit tim madanm ARSU ki'n tonm dan semi-final *La Reunion e City Ladies* pour en bon performans. Zot pe kontinyen montre lafors nou bann madanm dan larezyon e fer monte paviyon Sesel.

Pou konklir Mr Speaker, mon pou tre kourt an dizan. Ki dan nenport pei demokratik, en Prezidan i pase i ale. E son pep

i touzour reste. E sa i osi leka isi Sesel.

US ozordi i vin dir nou zot annan leksperyans ki mannyer pou diriz en pei. Wi *US* i annan en kantite leksperyans. Annou gete.

Leksperyans akimil det parey dan ka det Larisi.

Leksperyans fer koudeta.

Leksperyans met bonm dan tant vakwa.

Leksperyans fer dimoun disparet.

Leksperyans fer koup nou bann frer ek ser Seselwa par pti morso e met dan *bin liner*.

Leksperyans sezi later dimoun ki pa siport zot.

Leksperyans viktimiz dimoun akoz zot kouler politik.

Leksperyans dan fer koripsyon. Pa blyi skandal Parmalat en.

Leksperyans fer disparet 50milyon.

Leksperyans fer dimoun al egzile.

Leksperyans abiz bann madanm dan *State House*.

Leksperyans vann nou pei ek etranze.

Doktora dan koripsyon e master dan anbet dimoun.

(APPLAUSE)

HON REGINA ESPARON

Ek tou sa leksperyans ek doktora Mr Speaker, si *LDS* – si *LDS* pa ti vin sov nou...

(Interruption)

HON REGINA ESPARON

Be les mon a koze.

Ek tou sa lekspertiz ek doktora Mr Speaker, si *LDS* pa ti'n vin sov nou, *US* ti'n fini koul sa pei!

(APPLAUSE)

HON REGINA ESPARON

Mwan anvi dir ek zot frer ek ser Seselwa ki pe ekout mwan; *US* ankor pou diriz sa pei...

ALL LDS MEMBERS

No way!

(APPLAUSE)

HON REGINA ESPARON

Dir zot dirizan kontinyen reve ek son dalon Ali Ali. Akoz pouvwar blyi, plito nou mor ki viv dan lesklavaz.

(APPLAUSE)

HON REGINA ESPARON

E mon pou dir for an terminen Mr Speaker; *LDS* Sesel! E mon remersi ou.

(APPLAUSE)

MR SPEAKER

Mersi Onorab. Mon a donn laparol Onorab Francois Adelaide.

HON FRANCOIS ADELAIDE

Mersi Mr Speaker. Bon bonzour tou dimoun, espesyalman zabitan Baie Lazare.

Ankor enn fwa mon ganny sa privilez pou koz lo ki mannyer mon vwar leta nasyon Seselwa ziska prezan.

À mon avis, mon trouve ki Gouvernman an zeneral pa pe mal fer ditou lo *manage lekonomi* pei. Nou pa pe mal fer ditou lo sa ki konsern atrakte envestisser nasyonalman, menm enternasyonalman.

Nou pa pe mal fer, lo ekspoz nou bann valer sportif kiltirel lokalman e menm enternasyonalman. Nou pei pa pe mal fer ditou, lo bann lendeeks enternasyonal. E nou souvandfwa en legzanp pour bann lezot nasyon.

I kler ki Gouvernman dizour pe fer sa ki zot santi i meyer pou kontinyen elev standar lavi tou Seselwa. Menm si par ler nou vwar nou bezwen fer fas avek serten lafors negativ.

Me parey nou *motto* sa lannen, nou inyor distraksyon e nou konsantre lo fer bann bon

keksoz pour ki nou pep i benefisyé.

Mon osi admet ki parfwa, bann desizyon ki Gouvernman i kapab ananse, ouswa anvizaze pran, merit plis konsiderasyon. Keksoz i dinamik.

Nou isi kot Lasanble, si i annan okenn bann rezervasyon, nou touzour kapab fer tande lavwa nou pep. E kot i merite, lazisteman i ganny fer.

Mon konnen sa Gouvernman napa move lentansyon ler i fer bann desizyon. Me parfwa nou pep i egzize ki tou bann desizyon e aksyon i ganny byen depouye e analize pour ki napa labi ouswa reperkisyon negativ.

Mon pou kontinyen siport sa bann tel fason fer akoz mon konvenki ki ler ou, ou reprezent lavwa ou pep, ou bezwen reste atantiv, pour ki ou vreman konpran zot laspirasyon e direksyon ki ou pep i anvi ale.

Me i enportan osi pour pep konpran ki parfwa pou annan bann desizyon ki pou bezwen ganny pran, menm si i pa popiler. Nou pa fer li akoz nou ki pe *rule border*. Me nou bezwen pran li pour benefis lonterm.

LDS i en Gouvernman responsab. E byensir ler ou responsab, ou bezwen azir avek

tout lonnekte. Fer sa ki byen pour ou pep, menm si zot pa pou vwar rezulta toudswit.

Me nou sa bann dimoun ki pe pran sa bann tel desizyon, nou bezwen reste asire ki se pour byennet nou pep a lavenir, non pa zis pou ganny re elekte apre en manda 5an.

Nou rikord in montre ki Gouvernman LDS in brav ler ti annan bann desizyon serye. E byensir pli tar, Lepep in trouv son merit. Nou bezwen kontinyen enstrir nou pep ki lavi la deor pa sitan fasil. Me ki i vreman depan lo tou nou korporasyon.

Pour nou arive realiz tou nou bann rev, i enportan ki Seselwa i inifye. Aksepte nou bann diferans. Travay lo tou bann keksoz ki pou ini nou plis.

Tou dimoun i diferan avek diferan mantalite e fason panse. Se sa ki fer lavi en *challenge* e enteresan. Nou devret anbelir lo tou bann bon keksoz ki fer nou viv en lavi pli prodiktiv e pozitiv.

Mr Speaker, konman en Manm Elekte pour distrik Baie Lazare, mon pa per pou koze e fer pase mon lopinyon. Menm si pli tar sa ki anvi enterpret mon parol dan nenport ki fason, zis pour zot rod son kote negativ. Zis pour zot donn lokipasyon.

Zot lib osi pou fer sa ki zot anvi. Sa pa afekte mwan dan

okenn fason. Otan ki gran met i permet mwan sa loportinite pour mwan eksprimen, mon pou kontinyen fer li.

(APPLAUSE)

HON FRANCOIS ADELAIDE

Sa ki deside met lapat ek mon parol e fer li marse, fer li marse. Sa ki deside met lezel ek mon parol pou fer li anvole, kontinyen fer li anvole.

Mr Speaker, mon pa zis koze. Mon osi mon met mon lenerzi pou fer sa bann parol transform an aksyon. E levidans pour ki sa ki'n ekoute i kapab osi evalye e deside si mon en vre barik vid, ki fer tapaz parey bann Manm parti minoriter. Ouswa si mon serye e mon pe delivre.

Nou tann swadizan *Leader* minoriter pe fer pledwari avek Mr Speaker, pour ki zot ganny sans koz en pe dernyen. Ki pour mwan, en tel demann napa okenn sans. Si ou parol i senser, i laverite e fer sans a sa moman ki ou pe koze, dimoun zanmen pou blyie.

(APPLAUSE)

HON FRANCOIS ADELAIDE

Me ler ou en mansonzer e koz zis fo rimer, fer propagann e lezot lakizasyon pa fonde,

byensir ou pou bezwen konsantre lo *damage control*. E byensir, ler ou pou koz premye, sa pa pou fer ou ditou dibyen.

Mwan depi ler mon'n vin dan Lasanble Nasyonal, dimoun in kapab konstate ki mon pa zis en barik vid ki zis fer tapaz pou donn lenpresyon ki mon pe travay. Kontrerman avek sa Manm dan Lasanble Nasyonal ki ti kriye à *haute voix*, "mon pou rode sa \$50milyon !"

(laughter)

HON FRANCOIS ADELAIDE

Eski vreman in gard son parol?

Depi lepok 15 lo 10, Seselwa in kapab konstate lekel sa parti ki son MNA i angaze e lekel sa parti ki zis koze e pa fer naryen.

Mon bezwen fer sa pti letour, zis pou ankor enn fwa dir avek Lepep Seselwa, inyor tapaz e konsantre lo nou travay pour byennet nou nasyon.

(APPLAUSE)

HON FRANCOIS ADELAIDE

Dan sa menm konteks ki Prezidan in koz lo limite, mwan mon lobzervasyon i koumsa.

Si *United Seychelles* ti ankor en sel parti dirize par en Gouvernman ki ti realize ki

byennet Sesel i pas premye, mon konvenki ki nou ti pou vwar en pe plis limite.

Me la prezan ki sa parti in divize ant US avek sa lot ki nou pa kapab nonmen, keksoz i vin pli kler. Ler ou ekout bann lentervansyon sa bann Manm parti minoriter, ou a krwar ki Sesel i en pei ki'n fini pour li. Ou a krwar ki Sesel in vin en *ghost town* kot lavi nepli egziste.

Lenpresyon ki zot pe donnen, konmsi Sesel i lo en *standstill*. Eski sa i leka? Zot lizye in bouse avek negativite. Zot ankor rankinen akoz zot in perdi tou privilez.

(APPLAUSE)

HON FRANCOIS ADELAIDE

Zot annan ankor laenn akoz Prezidan Wavel Ramkalawan in reisi vin Prezidan Sesel e parti LDS i vin parti mazorite dan Sesel.

(APPLAUSE)

HON FRANCOIS ADELAIDE

Dan zot vokabler, sa pa ti kapab arive. E zot pe fer tou sa ki zot kapab pour zot sey *curse* sa ki Bondye in *bless*. Me sa pa posib. Se pour sa rezon ki zot kontinyen senm zot pouritir partou ki zot kapab arive.

Rod tou fason pou denigre nou pei. Rod tou loportinite pou fer Sesel e Seselwa tonm ba e anmenn tou sort malediksyon lo nou pei, lo nou lekonomi e nou zanfan. Menm servi bann mannev satanik.

Sey anmenn en nonmen Ali Ali angiz. Sa zwer i kapab fer gri, gri pou fer zot retourn o pouvwar.

(APPLAUSE)

HON FRANCOIS ADELAIDE

Kan an larealite sa zom i zis en zardinyen. Me tantasyon larzan in fer li tant son sans pour li vin Sesel avek en davans \$5mil e pas pour en kler vwayan.

Kestyon mon bann zanmi. Eski si ou ti en kler vwayan, ou pa ti trouve kot ou lanpayaz pe vini?

(laughter)

(APPLAUSE)

HON FRANCOIS ADELAIDE

Mr Speaker, atraver sa bann fo krwayans koumsa, i fer ki serten Seselwa osi, zot trouv zot pri dan bann mannev gri, gri. Sa topik i enn ki alarman.

E mazinen, si dimal ti ankor annan pouvwar lo dibyen, an 2025 kot nou pou ete? Erezman gran met pa pou

zanmen permet sa arive avek en nasyon beni parey Seselwa.

Sa ki ankor pe reve, reveye dan zot son sonmnabil e revwar realite devan zot. Sesel i bezwen sanz pour le meyer. Pour lemoman, se zis *LDS* ki kapab fer sa travay!

(APPLAUSE)

HON FRANCOIS ADELAIDE

Nou bezwen koz for e direk. Nou bezwen reste touzour vizilans. Akoz avek sa parti bandi, limite i preski enposib.

Mr Speaker, i kler ki Leta nou Nasyon pe vvar bokou amelyorasyon. Nou nasyon pe vin enn pli matir politikman.

E parfwa mon reste bete Mr Speaker, ler mon vvar bann siporter *US* dan mon distrik, ki mon pa ti pou mazinen zanmen zot pou *call* mwan. E rapport sa bann mannev sal ki sa parti pa nonmen pe fer e panse fer, pour zot kapab reganny pouvwar.

I kler ki sa parti minorite pe pli ale vin an minorite. Mr Speaker, mon pa zis koze, me mwan mon pe dir, ki si sa se en lot malediksyon ki nou pou kapab met lo nou zanfan e lo nou pep a lavenir?

Non Mr Speaker, eskiz en pti gin, mon papye in sote, wi. Premye legzanp i la akote mwan. *LDS* in akeyir en zenn fiy

dinamik sorti lot kote laba kot zot.

(Interruption)

HON FRANCOIS ADELAIDE

Taler i osi i pou fer son *maiden speech*. Me mon asire ki i pa pou noye dan negativite parey sa enn oparavan.

Mon osi parey tou mon bann lezot koleg, mon dir Onorab Bistoquet byenveni e tou de bon dan ou demars pou fer ou kontribisyon pozitiv pour ou pep e ou pei.

(APPLAUSE)

HON FRANCOIS ADELAIDE

2enm legzanp ki sa parti pe kontinyen perdi siporter, se sa enn. Nou'n vvar le 25 Novanm 2023, apre zot ti'n groupe san pitye. Depi zot zournalist, zot bann *MNA*, komite santral, Manm e siporter, pou target mon angiz pour zot kapab detri mwan.

Zot ti mont Baie Lazare avek tou konfidan ki zot pou anmas ase sinyatir pour zot fors en *by-election* dan Baie Lazare.

(Interruption)

HON FRANCOIS ADELAIDE

Menm avek zot ta mansonz, kalonmni e lespri visye, zabitan Baie Lazare an mazorite ti fer

zot konnen ki Baie Lazare se Francois ki zot in elekte e zot pe siport li avek tou zot kouraz.

(APPLAUSE)

HON FRANCOIS ADELAIDE

Menm larzan ti pe ganny ofer par en nonmen Cosgrow...

(Interruption)

HON FRANCOIS ADELAIDE

...zis pou kapab ganny environ 700 sinyatir. Menm avek larzan zot pa'n reisi. Zabitan Baie Lazare i entelizan...

MR SPEAKER

Onorab, arete.

(Interruption)

MR SPEAKER

Onorab, ekout mwan en kou. Mon konnen ou pa'n spesifik, me selman ou'n nonm Cosgrow. E Cosgrow, i annan en Manm....

(Interruption)

MR SPEAKER

Ekout mwan Onorab! I annan en Manm Lasanble ki apel Cosgrow. So, i pou ganny – i pou ganny enterprete konmsi ou pe nonm li.

E mon'n dir deza, poudir pa fer lakizasyon kont Manm

dan Lasanble. Pa fer lakizasyon. Ou pa pe anmenn laprev. Zis les li dekote. Mersi. Kontinyen silvouple, me selman obzerv sa.

HON FRANCOIS ADELAIDE

Wi Mr Speaker, parey Bob Marley i dir “*if the cap fits, you wear it, Mr Speaker*”.

HON FRANCOIS ADELAIDE

Zabitan Baie Lazare i entelizan e azour avek realite. Menm nou ti trouve en *Leader* parti tre fatige, dekonserte, demoralize, ki ti bezwen al rod refiz dan lavarang en tantin pou rod en pe *vitamin*.

2025 ankor en pe letan, si zot swadizan kandida prezidansyel napa stamina koumsa, mon pa konpran ki zot pe sey met dan latet sa pep, ki sa msye i se sel opsyon pou diriz Sesel. Me mwan mon vwar zot pe vann Seselwa kabri dan sak.

(APPLAUSE)

HON FRANCOIS ADELAIDE

Mwan mon pe dir ki sa mannev set en lot malediksyon ki nou kapab met lo nou zanfan e lo nou pep dan lavenir.

Si Baie Lazare zot pa'n kapab ganny en tyer sinyatir pour zot kapab fer en *by-*

election parey zot ti ava anvi, menm apre aste en bon pe sinyatir, eski sa pa laprev ki zot pe vreman disparet?

(APPLAUSE)

HON FRANCOIS ADELAIDE

Le 24 Oktob 2020, parti US ti ganny 1,080 *vote* dan distrik Baie Lazare. Le 25 Novanm 2023 ni 700 ekek sinyatir zot pa kapab gannyen pou zot fer en *by-election*

(APPLAUSE)

HON FRANCOIS ADELAIDE

Eski zot pe vreman vin o pouwwar an 2025? Zot pe vin tro fay pour lakoup.

Parey Onorab Aglae in eksplike, vreman zot kapab mars touni 2025. Si zot kontinyen andoktrin zot lekor avek tou sort negativite e kontinyen krwar dan gri, gri.

Mr Speaker, nou lasante i nou responsabilite e nou bezwen fer en fason pou rod lezot alternativ pour sa ki vreman enterese avek son lasante, i kapab konmans envestir dan son lavenir.

Enn mon fitir zabitan Mr Auguste, in konmans abord sa topik ki Sesel i bezwen konmans entrodwir en tel Polisi Lasirans Lasante, pour tou

Seselwa ki kapab fer en kontribisyon pour son lasante, ava kapab konmans fer li.

Mon okouran ki bokou Seselwa i deza pe kontribye anver zot lasante. Me avek plis lankourazman e plis linisyativ, pli bokou Seselwa ava kapab envestir dan zot lasante e i ava fer li.

Ki zot leta lespri ava bokou pli an pe, ler zot santi ki zot bezwen akse sa servis. Nou'n tro tann bokou konplent lo sa size lasante. E sa ki kapab ede, kapab kontribye, byensir i ava tir presyon lo nou sistenm lasante Nasional.

E sa i a fer ki vreman bann ki bezwen i ava kapab ganny akse avek sa tel servis parey i ete kommela.

Mr Speaker, Servis Piblik i en domenn ki vreman bezwen latansyon apropriye pour li kapab delivre selon lekspektasyon sa pep.

Sa demars pou akse en programm *leadership, Dubai* i en linisyativ tre enportan. E mon apresye ki Gouvernman in sezi loportinite e donn sa bann travayer sa sans pou aprofondir zot konesans, avek bi donn en pli bon servis.

Si mon pe get byen, laplipar bann dimoun ki'n kapab benefisyе avek sa tel

lesanz se bann ki ti la dan Gouvernman presedan.

I kler ki nou bann o zofisyе gouvernmantal in o paravan pa'n ganny *empowered* pour zot pran bann bon desizyon ki ti pou bouz zot lenstitisyon pli devan e fer zot vin pli performen.

Sa set akoz oparavan, tou desizyon ti ganny pran par en sel dimoun. E mon konnen ki ziska ozordi zot bann menm zofisyе ki ankor dan sa *mindset* lepase. E zot pa pe oze fer sa sanzman.

Gouvernman *LDS* i respe bann profesyonnel, e nou anvi ki zot konmans pran bann bon desizyon pour lepanouisman zot departman. Sa kour byensir pou ed zot dan zot travay.

Parti minoriter, i paret ki zot zalou. Konman en Lopozisyon serye, sa ti lemoman pour Lopozisyon zwe zot rol *oversight*. E demann leksplikasyon avek sa bann *senior staff* lo ki zot in gannyen atraver sa *training*.

Sa ti ava en pli bon legzanp pou evalye si sa lesanz ti vo lapenn ouswa non. Dan plas kraze e denigre, parti minoriter ti kapab fer pli byen.

Mazinen, laplipar sa bann profesyonnel se bann dimoun ki ti siport zot oparavan. Mr Speaker, mon poz sa la.

Konstitisyon i permet annan en *post Leader Lopozisyon*, ki sipoze en *post prestizye e tre enportan pou mentenir en demokrasi solid dan en pei.*

Mon konnen ki i pou difisil pour en novo *venue* tenir sa bar sa oter ki ansyen *Leader Lopozisyon* ti fer.

(APPLAUSE)

HON FRANCOIS ADELAIDE

Me pour lemoman, mon vvar sa pozisyon pe ganny mal antretenir. Seselwa pe pey bokou larzan tou le mwan pour sa *post*. Seselwa nepli vvar anvi en nwizans, byen malelve, arogan ki napa okenn respe ek kalib.

MR SPEAKER

Onorab, Onorab, Onorab arete. Onorab, mon'n dir ou pa fer latak personnel lo bann Manm Lasanble.

(Interruption)

MR SPEAKER

Refer – ler ou refer lo en Manm silvouple, evit bann mo ki kapab...

HON FRANCOIS ADELAIDE

Ki ofanse?

MR SPEAKER

...enterprete konman en lensilt. Mersi.

HON FRANCOIS ADELAIDE

Ok Mr Speaker, napa problem.

Petet en pledwari kot Lasanble Nasyonal, sey anvoy parti minoriter li osi *Dubai*, li osi i ava benefisyé avek sa Programm *Leadership*. E sa ava petet rol. E i ava aret vin en nwizans dan nou Lasanble Nasyonal.

Mr Speaker, mon pou vin en kou lo leta mon distrik. Pour ou kapab evalye vre Leta en Nasyon, enn bann lendeks se son bann lenfrastriktir. I pa drol ki nou distrik Baie Lazare pe ganny bokou piblisite.

Apre ki Prezidan ti mansyonn nou distrik dan Leta Lanasyon, laplipar bann Manm minoriter pa'n ezite pour zot anmenn zot kontribisyon, menm ki i ti negativ.

Parmi bann topik ki lo *news* Sesel konmela, se sa proze ki apel *West Coast Development Project*. Ozordi mon asize dan Lasanble Nasyonal, mon santi mwan tre fyer, akoz mwan mon'n enn sa bann Manm ki'n koze e ki pa'n aret koze ziska ler sa proze in finalman demare.

En proze ki si ti ankor anba Ladministrasyon US,

zanmen e zanmen sa proze ti pou materyalize. Akoz mon dir sa? E Seselwa fodre zot konpran. Mon'n anmenn sa topik plizyer fwa dan *Question Time* e lezot deba avan nou vin dan Gouvernman.

Sa ki kapab rod *verbatim* 6enm Lasanble, silvouple ekout bann larepons ki mon ti gannyen. Annandler mon zis demann mon lekor, eski dimoun avek sa bann tel pozisyon. La mon pe koz bann ansyen Minis ki ti kapab koz mansonz ziska sa degre.

Zabitan Baie Lazare e Seselwa an zeneral i bezwen konnen ki si i pa ti *LDS* vin o pouvwar, zanmen. Mon repete, zanmen nou distrik ti pou ganny en tel devlopman parey.

Si ozordi sa tel devlopman pe arive dan nou distrik, se gras a Gouvernman *LDS*. Si zabitan Baie Lazare pou kapab *enjoy* sa facilite trotwar, se gras a en Gouvernman *LDS*.

Si byento nou bann zanfan ki pe al lekol i kapab benefisy e santi zot pli an sekirite ler zot pe servi larout piblik, se gras a Gouvernman *LDS*, avek en *MNA* ki annan zot zentere aker.

E ki annan sitan lenerzi. I anvi ki zabitan Baie Lazare i ganny tou sa ki pour li e

benefisy. E nou pran tou sa ki pour nou.

Sa ki pli fer nou ankoler avek sa parti minoriter, get lanpler sa proze ki nou pe gannyen. Zot in pare pou sabotaz sa travay, azir dan en fason malisye e anpes nou ganny sa tel proze.

Mr Speaker, ler mon tann parti minoriter pe koz lo loder koripsyon, mon kapab konpran. Ler ou dan en groupman ki zot tou zot benny dan lesans koripsyon, eski pa i normal pour ou santi menm loder? Plis ki 40an zot in benny dan sa lesans koripsyon. Zot nennen in bezwen fini abitye avek sa loder.

Seselwa i bezwen osi konnen akoz ki Gouvernman *US* ti pe zwe sourd lo sa proze. Tre senp mon bann zanmi. Zot ti anvi ki donater i donn zot sa larzan direkteman. E sa larzan ti pou dabor aparet, apre disparet. Zis parey sa fame \$50milyon e osi larzan konpansasyon La Misère.

Vreman zot ti'n santi loder larzan *West Coast Development*, me zot pa'n kapab met lanmen lo la. Vwala zot lakoler. E vwala akoz zot pe mazinen zot kapab mars touni an 2025.

Zot ti pe tro fye lo sa larzan *West Coast Project*. E finalman, zot pa pou kapab met lanmen lo

sa larzan. E dan lakoler, zot devwal zot fristrasyon.

Me apre tou, si zot vreman annan laprev ki sa proze *West Coast* i annan koripsyon, i annan en lenstitisyon Sesel ki annan pouvwar Lakour, ki zot kapab met zot konplent pour en revi. Akoz zot pa fer li?

Ozordi sa bann menm dimoun ki tou keksoz ti dan zot lanmen pou anmenn sanzman dan Baie Lazare e ki pa'n fer li, zot sitan zalou e gro ker, akoz Bondye in vey lo Baie Lazare e donn nou loportinite pour nou pran tou sa ki pour nou.

Zot in sey en lot taktik pou sey blok sa proze e met retar dan devlopman nou distrik. I pa drol demen si nou tande ki zot par deryer bann mannev pou fer pa siny *wayleave*.

Mr Speaker, negativite pa pou kapab aret Baie Lazare devlope. Zabitan Baie Lazare, okenn mannev pou blok devlopman dan nou distrik, fodre pa ki nou soutire.

Azir responsab e defann sa bann tel devlopman pozitiv dan ou kominote. Sa pou ed ou, ou zanfan, ou fanmir, ou zanmi e bann viziter.

Si parti minoriter i apel sa bann devlopman koripsyon, apele. Nou, nou apel sa bann devlopman konstriksyon pozitiv pour lakominote.

Ler mon lo sa size, mon pa oule mank loportinite pour mwan kontinyen fer demars, fer demann pou ensiste lo sa proze kot bis *SPTC* pou fer viraz e kolekte bann pasaze dan zanmerant Anse à La Mouche, Baie Lazare.

Sa demann i enn ki vreman esansyel pou asiste tou bann Seselwa e etranze ki pou bezwen servi servis *SPTC*. Mon demande ki latansyon imedyat i ganny mete lo sa proze. Sa i ava vreman redwir lenkonvenyans ki mon souvandfwa vwar nou bann Seselwa pe pas atraver.

Mr Speaker, linondasyon dan Anse à La Mouche. Ler mon lo sa sou distrik Anse à La Mouche, i vreman enportan pou averti Lotorite konsernen ki leta lasante mantal nou bann zabitan Anse à La Mouche dan plato, i souvandfwa ganny tourmante. Sirtou ler gro lapli i tonbe.

Laplipar lakaz dan sa rezyon i inonde, e fason deplase i ganny afekte. Sa bann pov rezidan zot vwar zot bezwen depans bokou pou metod mitigasyon pour zot kapab kontinyen zot lavi.

Mon kontan pou aprann ki lagrandisman pon kot *Blue Lagoon* pe al konmanse. E mon ti ava osi kontan ki demars i ganny fer pou amelyor

sirkilasyon delo lanmar dan sa rezyon.

Mon panse ki i ti a kapab met devan nouvo Lotel *Canopy* pou ed nou dan sa demars. Vi ki mon pe obzerve, mannyer zot pe antreprann travay reabilitasyon lo en bout lanmar dan sa rezyon. E mon konvenki ki zot annan menm annan lekspertiz pour zot ed sa kominote.

Mr Speaker, lalimyer dan semen. Tou dernyerman dan sid was Mahe i annan en devlopman enteresan. Nou pa devret ferm lizye lo la. E petet bokou dimoun pa pe eksperyans sa set akoz petet zot antre kot zot tro boner.

Si ou pe servi sa bann semen dan aswar, ou pou konstate ki Gouvernman *LDS* pe fer tou sa ki byen pour li kapab met *street light* lo semen.

Baie Lazare osi pe osi pran tou sa ki pour li. E bokou zabitant i vreman satisfe ki sa pe vreman vin sa abrevyasyon *LDS*. Savedir lalimyer dan semen.

Ou ki pa ankor ganny sa facilite, pa trakase. Nou pe kontinyen fer demars pour ki ou osi ou ava benefisyé tre prosennman.

Devlopman sportif dan en distrik i en lot lendeeks ler ou pe evalye leta ou distrik e en

nasyon. E Baie Lazare pa pe zet son par osyen. Ozordi nou fyer nou tim garson *volleyball* in kapab ganny promote dan premye divizyon dan *league* Sesel.

Kominote Baie Lazare i devret santi zot tre fyer avek sa lakonplisman. Me nou demande ki plis sipor lo nivo kominote pou kontinyen apiye e siport dan anmenn plis pozitivite dan nou distrik.

Baie Lazare osi i tre fyer pou vvar ki nou'n kapab met en lekip foutbol dan *League 1* Sesel. Ozordi sa ki pe pas kot laplenn Baie Lazare, zot kapab vvar ki sa laplenn pe konmans vin tro pti pour lakantite zwer ki pe frekant sa landrwa.

I bon note ki nou tim pa pe mal fer ditou, e nou'n kapab met en rikord kot Federasyon Foutbol Sesel, konman tim ki'n met plis *goal* dan en sel *match* Sesel.

Ankor enn fwa, nou demann tou endividé, lakonpannyen e lorganizasyon, kapab asiste nou bann lekip sportif ki promot pozitivite dan nou kominote.

Reabilitasyon lakot Anse Gaulette. Apre en pe letan ki zabitant dan plato Anse Gaulette ti montre zot lenkyetid lo degradasyon lakot, finalman

ozordi zot leta mantal i bokou pli anpe.

Sa ki'n pas Baie Lazare dan zanmerant *ex-Greenways Discotheque*, in sirman apersevwar enn parmi sa pli zoli miray ki zanmen okenn Gouvernman, depi ler Sesel in vin en repiblik, in deza antreprann. Ankor Gouvernman *LDS* in delivre e nou zabitan nou dir, mersi bokou.

Apre ki bokou vezetasyon, propriyete, lenfrastriktir, servis, litilite, fason viv bann zabitan ti pe ganny menase, afekte, Gouvernman *LDS* pa'n lour. E ozordi nou satisfe.

Mr Speaker, mon anvi remersi tou propriyeter ki'n korpere pour sa proze abouti. Mersi bann zabitan ki'n reste obzervan e rapport lo bann lensidan ki kapab andomaz nou leritaz. Si nou kontinyen koumsa, mon pa vwar okenn distrik ki pou bar nou dan lavenir.

Konstriksyon nouvo Sant Lasante. Pandan ki nou Gouvernman pe sey nou mye pou konmans konstriksyon nou nouvo Sant Lasante, nou tann tou kalite parol e mannev dekourazan sorti kot parti minoriter.

Zot tou zot pe swiv e pe priye pou sa proze pa abouti,

akoz zot ganny pwen pour zot konpannyen politik lannen prosenn.

Apre lanons par Prezidan Larepublik dan Diskour Leta Lanasyon ki kontra in ganny donnen avek en lakonpannyen konstriksyon. Nou'n vwar en lekspresyon dezespwar lo figir Manm parti minoriter, akoz ankor en kart dan zot pake konpanny in tonbe.

I paret ki i annan en landrwa ki fermal avek zot ler Baie Lazare i benefisy'e avek en proze. Sa i fer zot revolte e rabase. Me nou, nou kontinyen priye pour nou ganny plis benediksyon.

I bon note ki sa proze pa fek vin lo proze Gouvernman 2020. Plito depi an 2017. Zanmen parti minoriter in donn Baie Lazare son vre valer. Zot in plito anvi servi nou bann resours mannyer zot anvi. Abiz nou bann abilite e mazin nou zis ler zot bezwen ganny vote. Mon kontan ki zot pou ankor vivan ler nou Sant Lasante ava ganny realize.

E dan Lasable Nasyonal detanzantan mon pou donn en *update* lo bann staz konstriksyon pou kontinyen fer zot zalou e kit zot gro ker bate. Fotespere zot pa anvoy personn fer sabotaz, ouswa vin met bonm ler konstriksyon in

konmanse. Mwan mon konvenki ki Baie Lazare pou gannyen zot kado avek Gouvernman LDS.

(APPLAUSE)

HON FRANCOIS ADELAIDE

Mon pa pou bezwen fer en pledwari pour mwan koz dernyen akoz *action will speak louder than words*. E nou dan LDS nou konnen ki nou senser. E nou pou delivre.

Mr Speaker, lagrandisman semen Baie Lazare i enn nou priyорите. Langazman LDS se fer sir ki Baie Lazare i kontinyen devlope. Ki nou bann sitwayen i kontinyen epanouir e viv en lavi avek *minimum stres*.

I annan en senaryo ki la pour en bon pe letan, e nou pou bezwen rod fason entervenir e esey remedye sa sityasyon.

MR SPEAKER

30 minit Onorab.

HON FRANCOIS ADELAIDE

Mr Speaker, ou'n pran 4.

MR SPEAKER

30 minit.

HON FRANCOIS ADELAIDE

Ok, napa problem.

Sa ki pe servi sa semen pou mont Val D'en Dor, zot

souvandfwa rankontre lenkonvenyans vizavi balizaz Msye e Madanm Flosel Henderson. Sa i akoz sa bout semen i etrwat e kapab permet zis en loto sirkile a la fwa.

Me nou distrik, nou'n deside met sa konman en proze priyорите pour nou ed sa bann dimoun, e fer sir ki Msye e Madanm Flosel Henderson ler zot ariv zot bann laz *platinum*, zot a kapab annan en lespri an pe.

Mon demann tou departman pou siport nou dan sa demars. Dernyen pti proze Mr Speaker, ki bon met a latansyon...

MR SPEAKER

Onorab, konklir.

(Interruption)

HON FRANCOIS ADELAIDE

Mr Speaker...

MR SPEAKER

Onorab.

HON FRANCOIS ADELAIDE

...nou dernyen proze se...

(Interruption)

MR SPEAKER

Onorab, ou'n sot. Ou'n sot 30 minit. Mon'n donn ou en

avertisman. Prezan fer ou konklir.

(Interruption)

MR SPEAKER

Onorab.

HON FRANCOIS ADELAIDE

Ok, yes Mr Speaker.

Mr Speaker, pou konklir mon napa gran keksoz pou dir. Baie Lazare nou pe byen devlope. E parey mon pe dir, nou annan tro bokou keksoz pou dir ki fer Lopozisyon ankoler.

Me mon ava aret la. Mon ava aret la. Baie Lazare, kontinyen swiv bann devlopman ki pou annan dan zot distrik. E kot zot kapab donn nou lanmen pour nou fer sa bann devlopman vin en realite. E parey nou dir, nou pa zanmen les tonbe Baie Lazare! Mersi.

(APPLAUSE)

MR SPEAKER

Mersi Onorab.

Madam Clerk i enform mwan ki tim teknik i pe ganny en pe problemm avek *microphone* e avek transmisyon.

Ki nou pou fer, nou pou pran en poz teknik la. Mon pou demann transmisyon pou

koupe pour nou regarde si zot kapab aranze.

Si zot pa kapab aranze, nou pou bezwen *adjourn*. Silvouple, nou a pran en poz teknik. Mersi.

(Technical Adjournment)

MR SPEAKER

Bon, nou'n reoran transmisyon. Me selman mon bezwen anonsé ki problemm i en pe pli konplike.

Nou pou *adjourn* pou permet teknisyen travay e nou pou reoran Lasanble 2er. Mersi.

(BREAK)

MR SPEAKER

Bonn apre midi tou dimoun, Manm Onorab, zofisye, nou piblik. Nou a reoran. Nou'n ariv dan dernyen *round* nou repons lo Leta Lanasyon.

Mon konnen in long e probableman tou dimoun in en pe fatige, *stressed*. Be selman mon a fer lapel pour respe, kot i neseser dan bann entrevansyon ki reste. Laparol i pour Onorab Johan Loze.

HON JOHAN LOZE

Mersi Mr Speaker. Mr Speaker, mon note ki mon le sel *MNA* ki son *speech* in ganny prefase par

en lapel pour respe. Me toudmenm...

MR SPEAKER

Onorab Loze, mon'n koz pour tou Manm ki la! Mersi.

HON JOHAN LOZE

Lefe i reste Mr Speaker, ki napa personn ankor ki son *speech* in ganny *prefaced* par en lapel pour respe. Se tou ki mon ti pe dir.

Mr Speaker, mon le komans par remersi e felisit tou bann Manm *United Seychelles*. Sa 10 Manm ki'n koz avan mwan.

Mon krwar tou Manm lo nou kote in etal en largiman, in fer le pwen ki ti annan pou fer e zot in reprezant pozisyon parti *United Seychelles* dan sa deba lo Leta nou Nasyon. Menm si sa lannen nou pa'n ganny prezante avek en diskour lo Leta nou Nasyon.

(APPLAUSE)

HON JOHAN LOZE

Mon oule felisit nou bann Manm, akoz depi *Leader Lopozisyon* ziska Onorab Cosgrow ki'n konklir nou deba. E in *sum up* tou sa ki ti annan pou ganny *summed up*, nou'n gard en sel largiman kot nou'n

vin devan pou debout e defann sa pep ki apel Seselwa.

E mon'n note Mr Speaker, ki letan nou vin devan pou defann sa pep. Letan nou anmenn sor Seselwa devan, nou ganny trete negativ.

E nou ganny dir ki nou pa pe anmenn limite. Mon konpran ki dan zot lizye pour zot, ler en dimoun i defann sa ki pli pov, i debout for pour sa ki dan bezwen, zot vwar sa konman negativ. So, *it is what it is* Mr Speaker.

Me mon ti a kontan felisit tou Manm US ki'n koze e demann zot pou aplodir zot lekor silvouple Mr Speaker.

(APPLAUSE)

HON JOHAN LOZE

Mr Speaker, mon pran laparol ozordi apre midi e mon le komans par dir sa.

Mon ti a kontan si Lepep Seselwa zot al reget diskour Onorab ki'n koz avan mwan. E mon anvi zot port atansyon partikilye lo ki kantite lenerzi in ganny envestir, ki kantite letan in ganny envestir pou defann lakizasyon lo koripsyon dan *West Coast Project*.

Gete e zize pour zot menm, pa mwan ki pou dir zot. Gete kantite lenerzi sa Onorab in mete pou defann lakizasyon,

alegasyon koripsyon dan *West Coast Road Project*.

Dikton nou granmoun i dir nou poudir, sa ki kakaye. E mon krwar ki Onorab Porice, yer ti dir nou lekel ki'n ponn. I bezwen konnen lekel ki'n ponn. Alors sa ki kakay premye, li menm ki'n ponn.

Mr Speaker, nou pa'n annan en nou Nasyon sa lannen. Prezidan in vin devan nou, in tourn an ron, in vir lanmenm. In tir la met la, me in plito donn nou en leta son leta li Prezidan.

In etal en leta lenkonpetans. En leta dezord. En leta mank bon desizyon e bon fonksyonnman. Sa ki nou'n vvar se en lenkonpetans kronik a latet nou pei.

Nou'n ganny dir pou dir son bann zanmi Gramps Morgan. Me la ozordi, Ricky Ras i donn 24er. Ou vvar ki arive ler nou al fer novo zanmi? Ozordi Ricky Ras i donn nou 24er. Me sa ki sa pep pa'n vvar set en *proper State of the Nation Address*.

(APPLAUSE)

HON JOHAN LOZE

Mr Speaker, in osi annan en lapel pour limite. E nou koman Manm *United Seychelles*, nou pe ganny akize ki nou pa pe ini,

nou pa pe anmenn aport limite. Be les mwan dir en keksoz.

LDS zot ti antre lo en lelan kales kase. Zot pa ti antre lo en lelan limite zot. Zot ti antre lo en lelan kales kase. Lapel limite ti'n devret ganny fer 3an pase. Me 3an pase, zot ti fer lapel kales kase.

La ozordi letan LDS in pli fay ki zanmen, letan zot in final maf, la ozordi zot apel pour limite. Mr Speaker, letan zot ti ankor for, zot ti arogan. Letan zot ti kapab. Letan zot ti ankor pe bwar dan bar kourpa, zot ti annan tou zot kouraz. Zot pa ti fer lapel limite zot. La ozordi zot in fay? Zot le koz limite. Sa...

MR SPEAKER

En Manm i annan laparol. Onorab Loze kontinyen.

(Interruption)

HON JOHAN LOZE

Mon pe sed la plas...

MR SPEAKER

Onorab Loze kontinyen avek ou speech.

HON JOHAN LOZE

Mr Speaker, mon krwar *LOTO* i annan en keksoz enportan pou dir. Mon ava sede.

MR SPEAKER

Onorab Loze, kontinyen avek ou *speech*.

(Interruption)

HON JOHAN LOZE

Onorab *LOTO* pe dir ki mon *speech* pa pe *broadcast*, pa pe ganny transmet Mr Speaker.

MR SPEAKER

En moman. Madanm Clerk, ou a regarde silvouple. Madanm Clerk, ou annan okenn rapor? Kontinyen avek ou *speech* Onorab Loze.

HON JOHAN LOZE

Mr Speaker, ou ava pardonn mwan si mwan mon krwar la a sa moman ki i annan serten sabotaz pe ganny fer konsernan mon *speech*.

(APPLAUSE)

HON JOHAN LOZE

Mon konvenki ki i annan serten sabotaz pe ganny fer konsernan mon *speech* aprezan. Parske boner mon ti sipoze koz dan en *slot*. Mon'n ganny tire dan en *prime slot* pour rezon teknik, mon'n ganny anvoye pour apre midi.

La misteryezman mon *speech* pa pe pase. Tou - personn pa konnen. E mon ganny dir koze menm mwan,

menm si mon *speech* pa pe pase.

MR SPEAKER

Kontinyen avek ou *speech* Onorab Loze.

HON JOHAN LOZE

Anyway, mon ava kontinyen ek mon *speech* ki pa pe *broadcast* Mr Speaker. Mersi.

Mr Speaker, en lapel pour limite ki'n ganny lanse a en moman kot zot parti i pli fay ki zanmen. E sa lapel pour limite nou pran li pour egzakteman sa ki i ete. I en mannev de zot par.

Tou bann metrik lo lekel zot kapab ganny zize, ki kapab ganny mezire zot performans in bese. *Be it ledikasyon, lasante, lozman.* Performans Gouvernman in bese.

Be i annan en keksoz ki pa kapab ganny mezire. Linite. E kwa ki limite i permet zot fer? I permet zot atak Lopozisyon, ki li i pa dan Gouvernman, konmkwa li i pa pe anmenn limite.

E zot bezwen tir latansyon lo zot bann *failure*. Zot bezwen tir latansyon lo ledikasyon. Zot bezwen tir latansyon lo lasante e anvoy li lo Lopozisyon, atraver sa zistwar limite ki zot in evante la lo tar. 3an pase selman zot pa ti oule limite.

Be mon poz sa la, e mon pou dir ki nou lo sa kote, nou pare pou fer linite. Be sa ki nou pa pare pou fer se pou aret koze. Sa ki nou pa pare pou fer se aret lite. Sa ki nou pa pare pou fer se aret debout pour sa pei.

(APPLAUSE)

HON JOHAN LOZE

Seselwa i kapab fer linite e inifye nenport ki moman, nenport ler ki zot anvi.

Me nou, nou pa pou aret koze. Zot pa pou vin bat nou latet avek sa mannev linite, an krwayan ki nou, nou ava sede, nou ava kalme konmsi zot pe donn nou en dilo *cool easy*. Non. Pa pou arive Mr Speaker.

Lot size mon anvi touse Mr Speaker, sa zistwar FPAC. Tou keksoz ki leve isi anndan, anmenn kot FPAC. Onorab LOTO ki Chair FPAC.

Mr Speaker, be bann menm dimoun ki vin dir anmenn kot FPAC, ler LOTO i anmenn devan FPAC, zot *vote* kont sa ki LOTO in anmennen kot FPAC. Tan ki nou annan nou en mazorite LDS lo Komite FPAC, napa nanryen ki pou kapab ganny fer.

(APPLAUSE)

HON JOHAN LOZE

Zot ti dir anmenn sa zafer koripsyon dan *West Coast Road Development* devan FPAC. LOTO ti anmennen e zot ti *vote* kont.

E menm dimoun ki'n *vote* kont i asiz dan Lasanble i dir "anmenn ankor devan FPAC". Selman in *vote* kont li. Tan ki zot *hold* mazorite lo FPAC, nanryen pa pou avanse.

Mr Speaker, lot pwen ki mon anvi touse. Prezidan in koz nou lo son Gouvernman koman en Gouvernman ki ekoute. Mr Speaker, i annan en pwen enteresan mon le leve la, lo Gouvernman ki ekoute.

Diran 6enm Lasanble, Gouvernman Prezidan Faure ti annan serten azistaz ti fer. I ti aziste. I ti re kale, i ti sanz desizyon, e i ti *reverse* serten desizyon ki ti'n ganny pran.

Ou konnen ki ti ganny dir isi dan sa Lasanble par *Leader Lopozisyon* sa letan? En Gouvernman kanmaron ki pe fer mars aryer! Menm keksoz ki li ozordi i pe apel en Gouvernman ki ekoute.

Menm keksoz. Egzakteman menm keksoz. Yer ti en Gouvernman kanmaron ki pe fer mars aryer. Ozordi i en Gouvernman ki pe ekoute.

Prezan ou, ou pe fer 12 fwa plis ou. Tou pti keksoz ki ou fer lannmen i sanze. *Bills* i vini

lo *Bills Committee*, i antre par laport devan, i sorti par laport deryer. Manm *Bills Committee* annan de fwa nou pa ni konnen ler Gouvernman in tir son *Bill* nou. I annan fini table, fini arriv la, tire menm. Zot en Gouvernman kanmaron.

La ozordi mon pou dir zot lekel loter sa mo “Gouvernman kanmaron”. Nou ler nou dir zot sa la, nou pe zis rann zot, zot prop propriete. Pour zot sa. Pran silvouple. Mersi.

Mr Speaker, en lot pti pwen ki mon'n note, sa zafer latak lo zournalist. E la mon le dir en keksoz bann zournalist Seselwa. Pa pran li kont. Ler i atak zot i dir zot isi, i dir zot. Pa pran li kont. Pa ekout li. Pa *bother*. *Its not you, it's him*.

I pa novo sa. Depi dan 5enm Lasanble letan i ti pe mont *State House* diran detant pou al kot Prezidan Michel. Zot konnen akoz i ti arete ale? SBC ti filmen li pe asize o bor Prezidan Michel. E en kankan ti leve Senyer.

Lafot ti zournalist! Si zot al lo *verbatim* Lasanble zot pou menm vwar en *speech* ki Madanm Gamatis, mon krwar en *speech SONA* ki Madanm Gamatis ti fer, ti lev sa size ladan. Akoz i ti pe lager kont zournalist menm.

So, mwan mon pou dir zournalist Sesel. Ki ou en zournalist SBC, ki ou en zournalist endepandan, konmsi pa pran sa msye kont ler i fer sa bann keksoz.

I dan son natir sa. Pour li. Li ki koumsa. Son problem i pour li. *Zis be professional, do your work*. Kontinyen fer zot travay. Pa ekout li silvouple. Koumsa i ete li.

Mr Speaker, en keksoz ki enportan ki nou koz lo la se lord avek lape. Isi anndan mwan mon'n deza poz kestyon lo kriminalite an relasyon avek lapovrete.

Partou atraver lemonn letan ki lapovrete i ogmante, sirtou letan ki lapovrete i ogmant sibitman, ou annan en mont dan to kriminalite.

E Minis Fonseka pa ti ni *bother* ek mwan li. I ti anvoy mwan vire. Akoz zot, zot pa le aksepte ki i annan lapovrete Sesel. Dapre zot nepli annan lapovrete Sesel.

Be, nou pe vwar en mont dan kriminalite. Nou pe vwar li Corgat Estate. Nou pe vwar li partou. E sa ki pe pase Corgat Estate *au fait* i annan 2 keksoz. Enn, i annan en mont dan to lapovrete.

Dezyenm, *LDS* zot in sistematikman *dismantle* tou

sipor reabilitasyon ki annan pour bann adikt.

La ozordi zot tou “pe fer *MAT Clinic*. Nou pe al fer...” Be zot in kas sa ki ti deza la. La *right now* napa landrwa pou anmas sa bann toksikomann. Si ti'n fer fasilite, ti kapab anmas en 50enn zot. Zot pa ti pou lo semen Corgat.

Be lot *issue* ki nou annan. Zabitan kominote i ganny pran otaz par bann konportman anti-sosyal. E vre zabitan pa anvi vwar sereng dan peron. Zot pa anvi vwar dimoun pe pike. Zot pa anvi vwar personn pe dormi lo zot peron.

Be sa, i pa eskiz lefe ki ler zot in ganny pran otaz par konportman anti-sosyal, aprezan zot ganny teorize par tim ibou. Ou deza annan ou en problemm. Ou adisyonn lo la dizyemn lamannman Konstitisyon, kot ou'n met solda dan semen. Ou adisyonn lo la kot *bodyguard* entel i osi i al melanz dan travay Lapolis lo semen, i fer en sel problemm.

Be, zabitan kominote i deza annan son problemm li. I pa pe dir ou balans grenad karoutsou pour ou desir lebra *daddy*. I pa pe dir ou balans en grenad o bor pti zanfan enn zot bann prop aktivis *LDS* ki pe desann dan semen avek son manman.

Zabitan pa pe demann sa li. Zabitan pe demann lord, lape e trankilite *and you LDS you're going about it the wrong way*.

(APPLAUSE)

HON JOHAN LOZE

E zot pe aplodi.

Ler pti prens i al dan Kan Gard i balans grenad parmi zanfan. Be sa bann zanfan, zot ti dan zot lakour zot. Grenad ki'n vin kot zot. Zot pa ti lo kan drog zot. E sa ti pas gran lizour, pa ti pas 8er diswar silvouple. So, konnen ki nou dir ler nou koze isi anndan.

Mr Speaker, en lot size ki mon oule touse. Nou'n ganny dir ki nou pe rod loportinite pou koz dernyen. Nou, nou pa pe rod sans koz dernyen nou. Sa ki nou ti anvi se en balans.

Ozordi in ariv en staz kot *LDS* in sitan fay ki zot per nou. Zot pa kapab annan en *one on one debate* avek nou. Pour zot santi zot *validated*, pour zot santi zot byen, zot bezwen koz 5 dimoun apre ki mon'n koze.

Be sa i ok, akoz nou, nou konnen ki avek ou dan sa *Chair* zanmen nou pou ganny okenn form balans, Mr Speaker. Nou konnen sa. I ok pour nou. Nou'n abitye...

MR SPEAKER

Mwan ki'n fer lalis pour lord ki dimoun i koze. I pa en *case* sez ki ou kapab kestyionnen. E silvouple respekte Speaker. Mersi.

HON JOHAN LOZE

Mersi Mr Speaker. Mr Speaker, en lot *issue* ki'n leve, se ki Prezidan dan son Ladres. Mon pa konnen si zot in remarke, in *basically* koz zis lo lotel 5 ek 7 zetwal.

Prezidan in oubliye tou sa bann biznesmenn Seselwa ki'n lager pour li pandan tou sa lannen. *Sponsor* li e met li la. In bliy zot tou. Kit zot tou ater. E sa bann dimoun i dan bann sityasyon difisil Mr Speaker.

Ozordi nou pe koz zis lo bann gro lotel nou bann pei zanmi, e nou oubliy sa *mom-and-pop business*, sa biznes sa Seselwa ki li i *backbone* lekonomi Sesel.

Ozordi ou koz avek en biznesmenn Seselwa, i dir ou li i annan 2 bato *Eden Island*. 4 mwan i pa ankor ganny okenn biznes. E la SMSA pe dir li i annan R5mil pour li peye, i pa konnen kot i pou rode.

Ou annan ou biznesmenn Seselwa ki pe lwe en *guesthouse* avek en propriyeter pour li fer biznes. I pe bezwen rann akoz napa biznes.

Ou annan ou *guesthouse owners*, Seselwa ki annan *loan* labank lo zot latet ki zot pa konnen ki mannyer pou sirmonte. E Prezidan i vini i koz bon labous zis lo lotel 5 e 7 zetwal.

E zot, zot pe sey espere si i kapab annan en propo pour zot. Si i kapab annan en *scheme*. *Anything*. En pti *life jacket* ti a balans avek zot. Zot ti ava aksepte nenport kwa dan sa klima difisil. Me Prezidan in konpletman oubliy zot legzistans.

Mr Speaker, en lot pwen. Nou ganny anvoye kot Anti-Koripsyon. Tou pti keksoz zot dir nou al kot Anti-Koripsyon. Ozordi pli gro sours koripsyon dan Sesel se Anti-Koripsyon li menm.

La right now nou annan en sityasyon kot ou annan ou 6 mersener Angle ki ti pe marse Sesel, arme avek fizi, ki'n fer larestasyon nou sitwayen Seselwa. Ki'n form zot en nespes lakonpannyen pou *investigate* 50milyon. Pa konnen konbyen milyon zot in gannyen zot menm.

Mon krwar dan pe rod 50milyon nou pou depans en lot 50milyon. E la oli zot ozordi? Zot in aprann tou trik avek Irlande. Zot in *copy paste*, zot in met laba dan ACCS.

(APPLAUSE)

HON JOHAN LOZE

Tou sa ki yer zot ti dir nou ti mal ki Irlande ti pe fer, ozordi zot pe fer sanmenm. Koripsyon in en! avek zot. Prezan zot a vin dir nou al kot ACCS, kan ACCS li menm li i basen koripsyon. Non. Non, non, non, non, non. *I'm sorry.* Sa bann kalite zafer koumsa la, swazir zot dimoun pou koz avek.

Mr Speaker, i annan en pwen ki mon le met devan, e sa i pour tou bann dimoun ki'n *vote LDS.* E mon anvi zot pran sa konsiderasyon byen. Pa pran mon mal.

Mr Speaker, tou *PPB* prezidansyel *LDS* 2020 pour zot kanpanny prezidansyel in ganny tire lo *YouTube.* Tou! Napa enn. Ni enn pa reste. Tou promes kanpanny prezidansyel ki ti lo *YouTube* nepli la. Ou a dir mwan akoz en?

Konmsi apre ki ou ganny pouvwar, akoz ki ou bezwen kasyet promes ki ou'n fer ek ou siporter letan ou ti pe rod zot *vote* pou ganny pouvwar? Akoz napa?

Akoz napa okenn siporter *LDS* ozordi ki'n *vot* lo baz possibleman enn sa bann Programm *PPB* ki kapab ganny akse avek. Pou al refrwadir son

memwar. *Ah, ti dir mwan tel keksoz, mon ti vote lo sa baz.* Napa. Pa egziste. I enteresan sa. Mon krwar Seselwa pou bezwen konmans ouver byen lespri.

Toudmenm, i annan serten pwen mon le fer la. Mr Speaker, apre 2025 *declaration of assets pour spouse* ek zanfan politisyen pou retournen. Nou *United Seychelles* nou pe fer li retournen.

(APPLAUSE)

HON JOHAN LOZE

Garanti sa. Napa kestyon.

Lot keksoz. *Meeting* deryer rido avek zot. Ki kwa ki lo *Houthi*, lo *WHO*, lo *CCCL*, nou pa pe vini. Nou pa pe fer okenn *meeting* deryer rido avek zot.

Okenn *issues* ki annan pou diskite avek nou konman en parti politik, *whether* i *ASP*, okenn lot, fer li la anndan lo *floor.* La nou dir la! Pa rod nou akoz nou pa vin *meeting* deryer rido ek zot. Nou fer kler la. Koz ek nou la anndan kot dimoun i trouve.

Mr Speaker, e la sa zafer fer *referendum* la. Be avan nou koz fer *referendum*, konmsi annou get en pe. Be zot pa le fer *referendum* lo lager dan Lanmer Rouz konmsi? Zot pa le fer *referendum* lo *WHO*, lo *Pandemic Accords*? Zot pa le fer

referendum pour nou ganny en *public enquiry* dan sa ki'n arive kot CCCL? Zot swazir kwa ki zot le fer *referendum* lo la?

Fer *referendum* lo sa bann issues ki pe tous Seselwa. Apre a vin dir nou, nou pe protez nou pye diri dan Lanmer Rouz. Be *La Reunion* in al protez son pye diri li? Moris in al protez son pye diri? *Madagascar* pa proteze pye diri li, zis nou? Nou, nou pli bay, nou pli gro nou? Anr ok! Nou pli for nou. Mersi.

Lot keksoz mon krwar nou pou fer *referendum* tou. Ler ou vini avek ou term prezidansyel sorti 5an pou al 7an la, sa osi nou pou fer *referendum* lo la!

(APPLAUSE)

HON JOHAN LOZE

Nou pou *referendum* ou avek ou term prezidansyel. Nou ava gete.

Mr Speaker, CCCL sa ki kler e ki tou zabitant Cascade bezwen konnen, ti annan leksplozif. *Container* leksplozif CCCL ki pour Lapolis. Ti annan *container* leksplozif CCCL ki ti pour Larme.

Prezan, zot, zot pe dir nou ki Lapolis pou *investigate* en leksplozyon dan lekel ti annan son prop *container* leksplozif.

E ziska prezan in napa personn sorti kot zot ki'n annan

kouraz pou vin devan pou dir be gete, Lapolis osi ti annan leksplozif laba. Selman li i pe *investigate* leksplozif ki'n arive. E son leksplozif i parmi. E sa zabitant Cascade i bezwen ganny kler.

Lapolis pa kapab *involved* dan en lenvestigasyon leksplozyon kot li in annan leksplozif stoke dan sa landrwa. Zot pe pran nou pour fou bet la. Pa fer keksoz koumsa.

E pour zot lenformasyon, leksplozif ki nou ti ganny dir lo televizyon, mwan mon ti war lo televizyon pou dir in met dan *bunker* Petit Barbarons, i deryer 3 montanny, i 4 kilomet avek lakaz. I anba langar sarpantye.

I anba langar sarpantye dan plato bor lanmer an alan kot Mr Rene. I pa dan okenn *bunker*. Zot in pran leksplozif zot in mont avek Petit Barbarons, zot in met anba langar sarpantye.

Zot lenkonpetans i kontinyen, i kontinyen. I pa pe arete. Sanmenm sa mon dir zot, zot annan en lenkonpetans kronik dan *leadership* pei.

Ozordi Mr Speaker, dir mwan sa ki zot oule, nou'n vin pti toutou *New World Order*. Nou'n vin pti toutou *New World Order*, nou isi Sesel nou. Nou siny keksoz. Pa konnen si nou

siny azen, si nou siny dan sou. Personn pa konnen.

Selman sa ki mon konnen, nou'n perdi tou nou dokter Kiben. Nou'n perdi tou nou spesyalis Kiben. An retour nou'n ganny *band* meriken, *brass band* Ameriken pe zwe tronpet anba Lakour.

(APPLAUSE)

HON JOHAN LOZE

Sistèm lasante pe degrade. Sistèm Ledikasyon pe degrade. E zot dir non, i bon, fantastik. Pli bon ki zanmen. E sa ki pe sant laglwar evolisyon pandan sa dernyen 3an. Pei i fantastik.

Son madanm in al demann *permanent residence Canada* li. Son madanm in rod *permanent residency Canada*, selman i dir nou fantastik evolisyon pandan sa dernyen 3an. *Very good. Be, ou vwar? Ou vwar kot nou ete?*

Mr Speaker, mwan mon pou dir zot, sa zafer *WHO Accords* la, konn vini. Konn vini! Nou pou fer en konversasyon piblik, akoz nou lo sa kote, nou pa pti toutou *WHO*, nou pa pti toutou *New World Order* nou.

Nou pou fer konversasyon piblik. Si konversasyon pa

satisfézan, Seselwa pou mont lo semen pou revolte avek zot!

(APPLAUSE)

HON JOHAN LOZE

Fer ganny sa byen kler sa en. Konnen. Akoz ozordi nou bezwen konpran en keksoz dan sa pei. Zot asize zot dir nou *fungus* ki nou'n kit deryer. Nou'n kit *fungus* ek zot.

In the same breath, zot asize zot sant nou Lekol Lasante ki zot in fer. Ti'n abandonnen. Gras a mazik ki Prezidan in fer, la in ganny Lekol Lasante. *Fungus* in pi dan Lekol Lasante. Zanfan pe malad, *teachers* pe malad NIHSS avek *fungus*.

Nou ki'n kit ek zot? Zot in erite parey zot dir? En problem ki zot in erite sa? Be tou sa domaz ki zot pe dir nou nou'n kit ek zot la, pa pou en kar domaz CCCL. Sanmenm sa zot pe taye zot pe dir dimoun siny isi, siny laba pou pa pourswiv Gouvernman.

Zour i a sorti ki Gouvernman ti annan leksplozif laba, dimoun i a fini sinyen, *huh?* Dimoun i a siny son nanm li. Get mannyer zot onnet! Get mannyer zot onnet avek zot pep. Zot konnen laverite en zour pou sorti. Zot konnen laverite pa kapab bare,

zot taye, zot bloke. *Anyway*, sa i zot, i pa mwan. Zot, zot koumsa. Kontinyen azir koumsa.

Mr Speaker, en pwen mon le leve la. Boner mon'n tann kot in dir ranforsi laverite. Viv dan laverite. Atas ou avek laverite. Les mwan met en laverite devan ou Mr Speaker, en.

Size i assets bann *drug dealers*. Mr Speaker, dan Lasanble le 8 Mars 2017 dan en Mosyon lo size drog, *Leader Lopozisyon* sa letan ti dir; “Get dan zafer assets. Sezi sa bann assets. Tou dimoun i konnen pour ki sa bann assets ki zot pe espere pou sezi”. 2017 sa.

2021. Le 2 dezyenm mwan 2021 dan diskour 100 zour, Prezidan Ramkalawan i dir; ‘en kantite assets in ganny mete anba sirveyans’. Ok. Nou ankor bon la. Nou ale menm.

Dan *Press Conference* le 9 nevyenm mwan 2022, Prezidan Ramkalawan i deklare; “napa naryen ki dan zot non”. Mr Speaker, sey eksplik mwan en pe la. Ki Prezidan in koze la? In koz laverite? In koz lalang? In koz verzyon?

Mon le konpran ki Prezidan in koze la. Mwan konman en imen si ou demann mwan, Prezidan pa'n koz laverite la li. Mon a repet ou, ok?

Le 2 dezyenm mwan 2021 i dir; “En kantite assets in ganny mete anba sirveyans”. Le 9 nevyenm mwan 2022, “napa nanryen ki dan zot non”. Me Prezidan in koz lalang Mr Speaker.

Mwan konman en zomn ki annan laverite lo mon kote ...

MR SPEAKER

Onorab, mon'n dir ou pa pou akiz Prezidan lalang. Mon'n dir sa avan. Silvouple.

(*Interruption*)

MR SPEAKER

Silvouple! E osi, osi. Ekout mwan Onorab. E osi, veye bann alegasyon ki ou fer ki napa laprev, ki ou pa'n anmenn laprev.

Onorab, mon pou akord ou ankor 3 minit akoz bann enteripsyon. Silvouple, konklir ou *speech*.

HON JOHAN LOZE

Mr Speaker, mon ti lo konklizyon mon *speech* mwan. Ki mon pe dir ou. Mwan konman en paran, ler mon elve mon zanfan mon elve li pou debout pour laverite.

Mon pa pou zanmen aksepte en sityasyon kot mon pou dir mon zanfan, pa dir ler keksoz i lalang, dir i laverite. Si

i lalang mon pou dir i lalang, ki i Prezidan, ki i ki lekel.

E la mon'n pa'n fer lakizasyon, mon vin ek laprev. Mon kapab soumet *verbatim* Lasanble. Mon kapab soumet *video* kot in dir sa bann keksoz.

Mr Speaker, mwan mon pa pou montre mon zanfan pou dir verzyon parey ou, ou pe dir nou isi anndan dir verzyon. Mwan mon pou dir mon zanfan, *any dimoun ki vin koz lalang ek ou*. E si ou konnen ou pe debout lo kote laverite, dir li i lalang e ou, ou pe koz laverite.

Se sa fason. Se sa bann valer. Mon pa konpran sa bann kalite travay satan ki ler en dimoun i koz lalang, ou dir li i pe koz verzyon. I pa egziste sa.

Mwan si Prezidan i lalang, mon pou dir Prezidan i lalang. E ou konnen akoz mon pe dir i lalang lo sa? Son lalit kont drog. Son swadizan lalit kont drog, in koz lalang.

(Interruption)

MR SPEAKER

Onorab, mon'n eksplik mon pozisyon. E ou bezwen, ou bezwen respekte li. Onorab, mersi pour ou ladres.

(Interruption)

HON JOHAN LOZE

Mr Speaker, ou'n donn mwan 3 minit.

MR SPEAKER

Mersi pour ou ladres. Mon pe termin...

(Interruption)

HON JOHAN LOZE

Mr Speaker, mon 3 minit?

(Interruption)

MR SPEAKER

Onorab...

(Interruption)

MR SPEAKER

Bann....

(Interruption)

MR SPEAKER

Order! Order. Manm Lopozisyon, zot anvi *walk out*, zot kapab *walk out*.

(Interruption)

HON JOHAN LOZE

Mr Speaker, be mon 3 minit mon pe demann ou? Ler ou'n dir mwan mon annan 3 minit, eski ou'n koz laverite ouswa ou'n koz lalang?

(Interruption)

MR SPEAKER

Laparol, laparol...

(*Interruption*)

HON JOHAN LOZE

Mon pe demann ou mon 3 minit, se tou.

(*Interruption*)

MR SPEAKER

Order! Order! Laparol pour Onorab Wavel Woodcock.

(APPLAUSE)

(*Interruption*)

HON WAVEL WOODCOCK

Mersi Mr Speaker. Mr Speaker, sanmenm sa ki zot ti pe rode. En leskiz pour zot *walk out* konman bann kapon, parey zot labitud.

(APPLAUSE)

HON WAVEL WOODCOCK

Akoz zot per sa 5 Onorab ki pe al koze, apre zot dernyen Manm in fer son entervansyon.

Mr Speaker, i annan en sanson ki, atraver ou, Onorab Loze en fwa ti sante dan sa Lasanble Nasyonal; ♫lalang, lalang, lalang♫. Mr Speaker, napa en Manm dan sa Lasanble

Nasyonal ki koz plis mansonz ki Onorab Johan Loze.

(APPLAUSE)

HON WAVEL WOODCOCK

Onorab Loze in koze, i pa'n dir nanryen. E dan gran parol Onorab. Gran parol ki Dr Gedeon i kontan dir; "si ou napa naryen pou dir, pa dir naryen". E se tou ki mon pou dir lo entervansyon ki Onorab Loze in fer la apre midi.

Mr Speaker, en keksoz ki'n sorti pli for dan Ladres Leta nou Nasyon par Prezidan Larepublik, Prezidan Wavel Ramkalawan, se lapel pour limite. Se en lapel pou nou travay ansanm, menm avek tou nou diverzans e lopinyon.

Swa nou lopinyon politik, relizyon ouswa oriyantasyon seksyel. I normal dan en pei pou annan diferans lopinyon. I normal pou nou pa dakor lo tou keksoz, i normal pou kritike me lesansyel se nou pa merit les nou diferans lopinyon, fer nou vin lennmi kanmarad.

Nou tou nou Seselwa e nou tou nou annan en plas dan nou pei Sesel. Sa i lespri ki nou merit annan konman en nasyon. Wi, nou tou nou annan nou lapartenans politik. Me nou pa lennmi. Sesel pour nou tou. E tou sa ki arive dan nou

pei, i annan lenpak lo nou tou irelevan si nou siport *LDS*, *SNAP*, *SUM*, *US*, ouswa sorti dan lezot parti.

Mr Speaker, dan mon lavi. Sirtou dan mon parkour politik, mon zwenn plizyer dimoun ki o konmansman zot ti get mwan konman en lennmi, akoz mon lapartenans politik.

Petet mon osi mon ti annan serten mefyans akoz mon leksperyans lepase. Me firamezir mon'n travay avek sa bann dimoun, nou'n konn kanmarad pli profon. Nou'n devlop lanmitye e respe pour kanmarad.

Annefe nou nouveau Manm, Onorab Anne Bistoquet, i enn ki mon'n anrose avek dan lepase. Sirtou lo rezo sosyal me fodre pa zanmen blyie ki a lafen dizour, sa dimoun ki ou pa dakor avek ozordi, ki i pa partaz menm lopinyon avek ou demen i kapab vin ou zammi. Ouswa demen ou kapab aprann ki ou annan en kantite keksoz an komen.

Mon konmans koumsa Mr Speaker, akoz i annan en *statement* ki mon koleg Onorab Churchill Gill in fer yer, ki'n dezapwent mwan en pe. In dir ki Prezidan pe sabotaz son pei.

I en *statement* serye. En alegasyon ki pa fonde. E i al kont sa lespri linite, dan tou

nou diverzans ki Prezidan pe demande dan nou pei. I pa fer premye fwa i fer en tel *statement*.

Apre louvertir *Passenger Terminal ERO* Praslin, i ti dir ki sa lasose pa ti merit apel *ERO*, akoz i pou anmenn divizyon lo Praslin. En *statement* ki ti ofans en kantite Pralinwa.

Mr Speaker, Onorab Gill pou rapel tre byen, ki nou ti dan en *interview* lo *SBC* ansanm, kot nou ti pe koz lo *Pierre de L'unité, Vallée de Mai*, avan ki ou ariv lo oter *Fatima*.

Kot nou ti koz lo linite ant sa 2 distrik, Grand Anse avek Baie Ste Anne. Akoz lontan sa 2 distrik pa ti manz disel avek kanmarad. Konman *MNA* sa 2 distrik, nou ti donn ponnyendmen sa zour ki ti *live*, ki ti lo *SBC*, pou demonstre sa linite.

E se sa fason ki Onorab Gill avek mwan, ti travay dan sisyenm Lasanble. Sete pour byennet Praslin. Mon ti Lopozisyon sa letan e i ti dan Gouvernman.

Mon rapel i ti rakonte . I ti rakont mwan ler bann pti papye ti sorti anba kot *Chief Whip US*, pou anvoy bann lardon lo mwan e li i ti met sa dekote. E mwan osi parey mon pa ti atak li, akoz mon ti santi e

mon ti anvi. Akoz nou ti anvi sa ki meyer pour Praslin.

Me i malere Mr Speaker, ki ozordi tousala in sanze. Kot plizyer keksoz ki mon pe tandé, menm ki Onorab Gill pe dir. i *misleading*.

Lenformasyon korek pa pe ganny donnén. Ki fer mon krwar ki ozordi bi Lopozisyon se pa pour byennet Sesel, se pa pour byennet nou zil. Me plito pou retourn o pouvwar, menm si sa ki zot dir e fer i annan lenpak negativ lo nou pei.

Mr Speaker, fodre pa ki Seselwa i blyie kot nou sorti ler *LDS* ti pran pei. E kot nou'n arive, e kot nou ete ozordi. Akoz en pandemik mondyal e fermtir plizyer erport enternasyonal an 2020. Selman 114mil 858 viziter ti antre Sesel.

Me akoz bon desizyon nou Gouvernman. Bann bon desizyon fiskal. Bann desizyon brav pandan letan *COVID*, *arrival* Sesel in gradyelman remonte depi 2024 ziska la. 182mil 849 an 2021. 334mil 552 an 2022. E 350mil879 an 2023. E sa lannen ziska Fevriye, in annan en logmantasyon 17poursan dan *arrival* touris Sesel. Nou pe fer bokou pli byen ki lannen pase.

Occupancy pandan Fevriye in pli o ki labitid. E bann letablisman touristik lo

Praslin pa pe mal fer. Nou sorti lwen Mr Speaker, e nou pou kontinyen progrese konman en nasyon.

Menm avek tou bann defi mondyal. Lager Larisi, *Ukraine*, lager Izrael avek *Hamas*, ki fer ki *Air Seychelles* nepli al Izrael. E *market* dan sa rezyon in ganny afekte. E nou'n perdi bann kliyan Israelit e *Ukrainian*.

Menm avek tousala Mr Speaker, nou pe byen debourye konman en pei. E nou lo bon semen. Sa lannen nou pe ekspekte lezot *airline* antre Sesel.

Kontrerman ki Onorab Gill in dir avantyer, ki lenflasyon in ariv 30poursan. 30poursan lenflasyon, ki en egzazerasyon. Tou statistik i montre ki Sesel i enn bann pei dan Lafrik, e menm dan lemonn, ki annan lenflasyon pli ba dan Lafrik, e menm dan lemonn antye.

Avek en prozeksyon selman 2.4poursan lenflasyon pour 2024. Sesel lenflasyon pou pli ba an 2024, ki bann gro pei parey Lanmerik ek Langleter.

Mr Speaker, fodre nou koz laverite. Onorab Gill pou dakor avek mwan ki dan sizenm Lasanble nou'n form par plizyer Komite. Nou'n *attend* plizyer *meeting* e fer plizyer vizit avek bann Minis *United Seychelles*.

Meeting apre meeting. *Masterplan* apre *masterplan*. Vizyon apre vizyon. Vizyon 2020, 2030, 2mil zanmen Mr Albert Rene. Konmsi Onorab Gill, ki'n zis lo papye. Bann promes dan vid. Bann vizyon ek plan ki ti ganny resisite sak fwa eleksyon ti pe aprose.

Mr Speaker, i annan bann promes ki ti'n ganny fer avek zabitan Praslin depi bann letan ki Mrs Mitcy Larue e defen Mr Karl Tamatave ti *MNA*. Mon rapel dan en *meeting* avek ansyen Minis Bastienne avek Komite Devlopman Lapes Praslin, ki mon ti en manm lo la.

Apre ki zot ti'n fini travay lo konsep proze lapes artizanal pour Praslin, Minis Bastienne ti tap kalot dan nou proze. E i dir ki Grand Anse Praslin pa bezwen en *ice plant*. Zis en *cold storage* nou bezwen.

Nou ava pran *ice* Baie Ste Anne pou transport dan *cold storage* Grand Anse. Ni later pa ti ankor negosye pour proze Baie Ste Anne. E menm pour proze Baie Ste Anne, zot ti dir ki zot pou bezwen *scale down* sa proze.

Mr Speaker, sa bann proze lapes ti'n sot 15an depi ki ti'n ganny promet par Gouvernman US. Zanmen mon pou bliy vizit Minis Ferrari ansanm avek SFA

an Novanm 2020. Kot i ti promet tou le de Onorab ki ti la prezan, ki i pou donn nou sa bann proze, ki lontan peser Praslin pe espere.

Boner 2022, nou ti ganny nou *ice plant* Grand Anse Praslin. 2023 nou ganny nou, nou *gear store* Grand Anse, Praslin. E ankor lannen pase Baie Ste Anne, in ganny en zoli proze lapes artizanal avek tou facilite neseser.

Eski, si Prezidan ti pe sabotaz son pei, eski i ti pou'n envestir dan tou sa proze lapes artizanal pour Praslin? Mon krwar pa Mr Speaker.

Mr Speaker, zanmen dan listwar Praslin in annan sa kantite devlopman dan lespas zis 3an lo nou zil. Lalis proze ki'n ganny fer lo Praslin i long. E i annan en gran diferans ant lafason ki bann Minis *LDS* ek bann Minis *US* in travay.

Dan sizyenm Lasamble, mon'n perdi kont kantite promes ki bann Minis in fer. Bann promes dan vid. Me ler mon get travay ki plizyer nou bann Minis *LDS* pe fer lo Praslin, mon soulaze.

Onorab Gill, in koz lo *Ile Eve* e Zil Kato Nwar. Mr Speaker, Zil *Eve* ti en dezord total, kot lamazorite later ti'n ganny partaze zis avek bann dalon ek aktivis *US*. Kot ti

annan bokou labi, *land speculation*. Mank fasilite parey delo, elektrisite, semen e fasilite ankor.

Ozordi lord in ganny mete lo sa zil. Mon remersye Minis Devika ek *ex-CEO* Ian Collie pour sa lord ki zot in mete lo sa zil.

Mr Speaker, nou Gouvernman i krwar dan aksyon. Mon pa pou zanmen bliy vizit ki Minis Derjacques ti fer Praslin kot i ti donn mwan langazman ki i pou donn nou sa *Vehicle Testing Station*, ki zabitan Praslin ti pe espere pour plis ki 15an.

Dan plis ki 3 manda, Parti Lepep, *US* pa'n kapab *deliver*. Me nou Ladministrasyon pou konplet sa proze avan 4an dan nou premye term.

Mon profite pou fer en lapel avek Gouvernman pou get dan posibilite annan en lespas o bor sa stasyon, kot *off-road driving lessons* ek *driving test* i kapab ganny fer. Olye ki tes i ganny fer kot basen naze, ki en lenkonvenyans.

Later pour devlopman Zil Kato Nwanr in al lo *tender*. E byento, nou pou vvar plis devlopman ki pou benefisyé bann zabitan Praslin. Bann swadizan, vizyon 20an, 30an Mr Albert Rene.

Si Onorab Gill i *être* fran avek son lekor, i pou rapel ki premye fwa ki Prezidan Ramkalawan ti fer vizit kot *site ERO Passenger Terminal*. Ti annan zis en langar. E Lotorite Por sa letan ti enform Prezidan, ki plan pou met fasilite an plas ti pou ganny fer dan ankor 3an. E ti napa vreman en plan konkret.

Mon ti la ler Prezidan ti donn lord pour sa proze konmanse dan 6 mwan. Proze *Terminal ERO* in konplete depi lannen pase. E lasose pe fonksyonn byen.

I annan enn de bann pti defayans ki mon'n vvar, ki mon'n adrese avek Lotorite konsernen. Tel ki problem dalo e serten sifras ki merit met cours koltar lo la. Me mon konnen ki serten sa bann problem pou ganny adrese avek proze Zil Kato Nwanr, ki pres pou demare.

Mr Speaker, nou annan en Prezidan ki proaktiv. I annan bokou konsern lo zil ki date menm depi avan mon ne. Problem lanmar, lerozyon lakot, drenaz e semen.

Mon personnelman depi ler mon'n antre dan Lasanble Nasyonal dan sizyem Lasanble, avek selman 24 *vote* an plis ki kandida Parti Lepep, *US*. E re ganny elekte dan

setenm Lasanble avek 193 *vote* an plis ki kandida US. Me non, pa par 5 *vote* dan dernyen eleksyon, parey en bann. E mon'n adres plizyer sa bann konsern dan mon distrik.

I malere ki mon pa'n ganny ase sipor dan sizenm Lasanble, pou adres plizyer size. Me mon apresye ki mon Prezidan in donn mwan sipor. Prezidan Ramkalawan personnelman in fer en vizit avek mwan e osi avek Onorab Gill dan distrik, pou regard problemm.

In menm fer *meeting* dan 26 distrik, enkli dan mon distrik, pour li konn konsern ki nou zabitant i annan. Me bann Manm US ti refize *attend* sa bann *meeting*. Zot ti kit zot zabitant anpandan.

Mr Speaker, ozordi Praslin, bokou bann pti proze ki mon'n demande parmi plizyer dan distrik Grand Anse Praslin, pe materyalize. Mon annan bann semen segonder ki mon ti'n demande depi 2017 e 2018 dan mon lalis proze distrik, anba Ladministrasyon US. Ozordi se nou Ladministrasyon LDS ki'n konmans e konplet sa bann proze.

Koltar pe ganny mete partou lo bann semen segonder dan mon distrik Grand Anse. Semen pou al kot Madanm

Marie Lablache in fini konplete. Mrs Lablache in dir mwan i annan 52an depi ler i pe esper sa semen. Sa semen pou deservi environ 11 lakaz. I osi annan faz 2, semen Adam Estate ki'n fek konplete ki i pou benefisyen dizenn lakaz.

Mr Speaker, resirfas semen Grand Anse, Praslin in konmanse. E plizyer *raised zebra crossing* in konmans ganny enstale. Mon an kontak avek SLTA pou met plis lalimyer dan distrik. Lalis, mwan avek DA, nou'n fini soumet avek SLTA.

Dan en vizit ki Prezidan ti fer pou regard bann problemm lakot Grand Anse, Praslin, Prezidan ti donn en sizesyon pou fer bann travay remedyal pou anpes semen degrengole. E osi pou anpes bann pye dibwa lo lakot tonbe ziska pli gro proze i al lo *tender*.

Ti annan bann *rock armouring* lo sa lakot, ki ti'n mal ganny fer par Ladministrasyon presedan.

Prezidan Ramkalawan ti propoze ki nou servi sa bann menm ros ki'n degrengole lo lakot Amitie, ki ti'n eparpiye partou vizavi STC, Amitie ziska Ros Korbizo - SPTC Amitie ziska Ros Korbizo, pou reorganiz *armouring* sa lakot.

Deswit aksyon in ganny pran e ozordi en gren disab pa

pe mont lo semen Ros Korbizo. Ki ennler ou a krwar ou ti lo lans ler ou ti pase oparavan.

Semen in ganny proteze ansanm avek plizyer pye dibwa. Mon zanmi e kanmarad lekol, Daniel Jessie, ki tanzantan i *call* mwan an regardan sa problemm i byen satisfe avek sa travay.

Menm zafer in ganny fer Anse Marie-Louise. Proze mazer Amitie, Ros Korbizo, ki en alokasyon R29milyon in ganny mete dan Bidze 2024, pou konmanse pli tar sa lannen. Sa proze pou fer provizyon plis lespas pour lezot devlopman.

En kantite zabitan Ros Korbizo in apros mwan e Gouvernman, pou demande pou fer bann pti *kiosk* e langar peser bor lanmer. E zot pe esper avek pasyans pour sa proze konmanse.

Lot proze ki bann pti biznes ek artis pe espere avek bokou pasyans, se proze Vilaz Artizanal Touristik, erport Amitié, ki mon'n ganny langazman Minis Devika pou konmanse sa lannen.

En proze ki depi ler Onorab Cosgrow ti ankor Minis, mon'n demande. Me, ti'n vin en proze *forgo*. Travay lo nou *Micro-Enterprise Center* kot *Ex-STC Warehouse* o bor Lekol Grand Anse Praslin Segonder, osi i dan

forecast pour konmanse sa lannen. En proze 15 a 17 *unit* pour bann pti biznes lo Praslin.

Sa osi mon'n ganny langazman *IEA* e Minis responsab pour Lenvestisman e Lantreprenarya Minis Devika, ki pou konmanse sa lannen.

Mr Speaker, proze *maintenance* e *desilting* plizyer lanmar pe al konmanse tre byento. *Desilting* e *armouring* plizyer lanmar, *Lablache Estate, West Side City*, ki pou benefisyé plizyer fanmir. Enkli Tracy Lesperance, ki sak fwa gro lapli son lakaz i inonde.

Fodore note Mr Speaker, ki lontan *armouring* ouswa miray ti ganny fer zis kot bann fanmir ki ti siport *US*. E bann ki pa siport *US*, ti ganny kit akote. Ti ganny sote.

Desilting lanmar Koko Rouz ek *armouring* osi pe al konmanse tre byento. Drenaz ek miray in ganny fer akote semen, ki pas kot Legliz *Saint Matthieu* pou al an montan *Britannia*. Kot sak fwa gro lapli i tonbe, plizyer lakour i inonde.

Bann fanmir sa rezyon. Lafanmir Pouponneau, Tamatave, Barbe ek lezot ankor, zot lakour pou ganny proteze kont inondasyon. Mon fek fer en vizit sa rezyon 2 semenn pase e bann zabitan i byen, i vreman apresye.

Mr Speaker, lot proze kapital ki depi letan Mr Rene ti'n ganny promet, se proze lakaz Mont Plaisir.

Mr Speaker, menm si teren pou fer sa lakaz i konplike, mon'n apresye sipor ki mon'n gannyen avek Minis Later, ki'n siport sa proze lakaz 8 unit, ki bokou zabitant Mont Plaisir pe espere pour bokou lannen.

Le 16 Fevriye 2024, mon ti lo sit ansanm avek bann teknisyen SIA, zofisyen *MLA* ti ek bann kontrakter ki pe *bid* pour sa proze.

Mr Speaker, mon krwar dan lazenes. E mon krwar lakle pour devlopman nou zenn e pou anpes zot tonm dan bann move frekantasyon e fleo sosyal, se sport. Sport i lakle.

Malgre plizy whole defi lo zil, ki enkli bokou facilite ki dan move leta, enkli mankman plizy whole facilite lo Praslin, Praslin i en zil ki prodwir bokou atlet. Bann atlet ekselan.

Ozordi nou annan nou 2 finalis Pralinwa. Pour *Sportsman of the Year Award* 2023 Dominic Dugasse e Nantenaina Finesse. E en finalis madanm, Angelique Adeline pour *Sportswoman of the Year Award*.

Nou annan nou en zenn windsurfer selman 14an, Jules

Kandasamy ki'n sorti 2nm dan *Junior Slalom World Cup, La Turquie*. Ki Prezidan ti'n fer li kado bann lekipman *windsurfing* modern.

Praslin i prodwir bokou atlet dan plizy whole domenn. *Water sports, judo, basketball, karate, laboks, volleyball*. E dan plizy whole lezot domenn.

E i malere Mr Speaker, ki Pralinwa in ganny tro neglize pour bokou lannen kot i konsern bann facilite sport.

Mr Speaker, koman *Chairman* Komite MYSCC ki responsab pour sport, mon'n vizit plizy whole facilite lo Mahe, Praslin e La Digue. E leta lamazorite facilite ki Ladministrasyon LDS in erite, i enpitwayab.

Dan zis 3an nou Gouvernman in anbark lo plizy whole proze pou fer renovasyon e konstrir bann nouvo facilite. Renovasyon lo *Palais des Sport*. Nouvo court tennis kot *Roche Caiman Sports Complex*. Sanz astroturf lo laplenn Stad Linite. Met nouvo track sentetik pou ranplas sa ki ti la, ti'n expire pour plizy whole lannen.

Renovasyon konplet lo Stad Linite in konmanse. Enstalasyon nouvo laponp pour basen naze. E pou annan lezot renovasyon ankor.

Mr Speaker, i pou kout plizyer milyon pou met sa bann fasilite annord. Praslin e La Digue i pli pir. Twatir lo Stad La Digue i fek ganny ranplase e Gouvernman in donn langazman pou antreprann plizyer lezot proze. Twatir lo *Palais des Sport* osi ti'n ganny ranplase, ki ti annan en gro trou ladan.

Mr Speaker, i annan en alokasyon bidzeter pour renovasyon plizyer fasilite lo Praslin avek La Digue. Praslin fodre travay renovasyon i ganny fer lo fasilite NSC o bor laplenn Grand Anse, e lo nou *Water Sports Centre*.

Mon'n demande parti demande dan 6enm Lasanble. La mon'n ariv dan 7enm Lasanble. Mon pe demann mon Gouvernman pou ed nou, ed nou atlet Pralinwa.

Mon fek pe ekout Mosyon zenn Onorab Camila Cupidon dan Lasanble Lazenes. E i kler ki se sa ki bann zenn Pralinwa i anvi vvar. Menm keksoz ki Speaker Lasanble Lazenes, zenn Onorab Said Lesperance ti dir mwan, ler nou ti ouver *Youth Service Bureau*, Grand Anse Praslin, lannen pase.

Plis fasilite *sport*. Renovasyon lo bann vye fasilite *sport*. E plis aktivite pou ankadre nou bann zenn. E osi

en fasilite enportan ki nou bezwen get ladan, se *maintenance* e renovasyon lo laplenn Amitie, Praslin.

Sa bann fasilite i enportan. Lespas kot zenn pe fer *judo* ek laboks, pa adekwa. Minis responsab pour Sport in met proze *Dojo* pour 2026. I annan plis ki en santenn *judoka* lo Praslin. Sirtou bann zanfan lekol ek bann zenn. Mon fer en pledwari avek mon Gouvernman, pou fer zot mye pou donn nou sa proze avan 2026.

Mr Speaker, dan sizenm Lasanble, mon'n fer vizit avek 2 Minis Sport. Minis Mitcy Larue ek Minis Macsuzy Mondon. Tou lede Minis ti promet pou fer en *Sport Complex, Ile Eve*. Ki sak eleksyon, *masterplan* ti ganny tire lo *shelf*. Me malerezman, apre eleksyon, ganny mete dan tirwar ziska prosen eleksyon. Zanmen nou'n vvar proze *sport complex*, en promes plis ki 20an.

Mon fer en lapel avek mon Ladministrasyon. Si en *Sport Complex* i pou kout tro bokou, ler ou pran konsiderasyon Bidze Nasyonal e tou lezot lobligasyon Gouvernman. Sey get dan posibilite pou donn nou *at least* en *indoor Gymnasium* pour *volleyball, basketball e futsal*.

Ki a fer ki serten *match* i kapab ganny zwe lo Praslin olye ki nou bann tim i bezwen al zwe tou *match* Mahe. I ava ed zot koup en pe zot kou deplasman.

Enn mon rev pour bann atlet Pralinwa, se pou nou ganny *track* sentetik. Ankor enn fwa, mon demann mon Gouvernman pou konsider sa pour le fitir.

Mr Speaker, Prezidan in anonse ki dat eleksyon pou ganny fikse dan Lalwa. Sa bann zafer Prezidan zis dizourd Lasanble pou refer Eleksyon Lasanble Nasyonal, ouswa koleksyon Prezidansyel ler i avan, pou fini enn fwa pour tou.

sizyenm Lasanble ti ganny dizourd par Prezidan Faure, avan ki nou ti'n fini nou term, an krwayan zot ti pou ganny eleksyon. Me zot ti anmas en defet kondire.

Mon'n tann Onorab Spiro koz lo serten paran pa kapab *afford* pou aste liniform ek sak pour zanfan al lekol. Mr Speaker, lekol i annan en *dedicated fund* pou ed sa bann zanfan. Sa i egziste depi dan zot Ladministrasyon. E nou Ladministrasyon in al pli lwen ki sa. Nou Ladministrasyon in garanti goute pour tou zanfan dan tou lekol Sesel. Napa zanfan ki pou reste vant vid lekol.

Mon krwar mon konpran akoz ki Onorab Spiro i koz koumsa. Sirtou par lefe ki dernyen eleksyon i ti ganny selman 36.5poursan. Dernyen Eleksyon Lasanble Nasyonal. E Onorab Naidu ti ganny 60poursan. E menm konman DA, i pa ti konnen ki ti pe passe anba son prop Ladministrasyon.

Onorab Gill in koz lo Labatwar, Cap Samy. Mr Speaker, sa labatwar ti pour Gouvernman. Ladministrasyon US ti vann sa labatwar, e apre sa menm Gouvernman ki ti bezwen re aste sa labatwar.

Mon krwar Onorab Gill i rapel tre byen ler nou ti vizit sa labatwar. Pye dibwa ti pe pouse ladan e lalyann ti'n anvaire. Mon konnen Onorab i conn lir Bidze byen e i annan en alokasyon bidzeter pour Bidze 2024, pou aste lekipman pour sa labatwar.

Leader Lopozisyon in konmans son *speech*, ki Albert Rene ti pli gran dirizan Sesel. Mon krwar in tronpe. Albert Rene pa ti pli gran dirizan Sesel. I ti plito pli gran diktater dan listwar Sesel.

Mr Speaker, i kler ki bann MNA US pa pe travay. Onorab Pillay in admet sa ler in dir ki *meeting* piblik dan 26 distrik pa'n abouti dan nanryen.

Nou bann *MNA LDS*, nou ti la dan *meeting* piblik, pe note bann konsern zabitan nou distrik. E ansanm avek nou *DA*, nou pe fer nou mye pou adres sa bann problem. E bokou in ganny adrese.

Me dapre *LOTO*, pa'n abouti dan naryen. Eski *LOTO* pe dir ki son bann *MNA* pa pe travay? Zot pa enterese avek zot zabitan?

I dir ki Prezidan Ramkalawan in anmenn plis divizyon. Ki mannyer en Prezidan ki anmenn plis divizyon Sesel, me ozordi i volonterman bann aktivis kle *US e Ex-MNAs* Parti Lepep, *US*. Ozordi in kit *US*, pe travay avek sa menm Prezidan. E plizyer i bann Manm *LDS* dan Lasanble Nasyonal ozordi.

Si Prezidan Ramkalawan ti en Prezidan divizyon, zanmen i ti pou aksepte ki Onorab Anne Bistoquet e lezot – zanmen i ti pou aksepte zot e lezot ankor dan Lasanble Nasyonal ozordi.

Prezidan Ramkalawan i en dimoun ki annan en leker pardon. I pare pou donn tou dimoun en sans. *US* zot filozofi se “ek nou, pa ek nou”.

Mr Speaker, zot in koze e plizyer entervenan in mansyonn zafer ki nou pe kraz *SBC*. Mr Speaker, mon annan devan mwan la, en *post* ki

Onorab Churchill Gill in mete lo *Facebook*.

E lo sa *post* Mr Speaker, ti seremoni 101 laniverser Mrs Joubert. E i ti pe konplent ki *SBC* pa'n montre byen son figir. E anba sa *post* Onorab Churchill Gill, Patrick Herminie, Mr Speaker, in fer en komanter anba sa *post*.

Mon pou lir sa komanter ki, *Honorable Dr Patrick Herminie* in fer. *SBC - Dokter Herminie*, en. “*SBC* i zis en pyon. En peroke lo zepol Gouvernman. Lord i sorti pli o. *This was indeed a new low. Shame on SBC. Shame on the journalist who did the editing. Shame on this LDS Government*”.

Komanter kot Mr Patrick Herminie pe ensilte bann journalis e *SBC*.

Mr Speaker, zot in fer teat lo Lopital La Digue. Menm petisyon ti ganny fer. La zot pe fer teat lo proze novo lopital. Onorab Uranie ti fer petisyon kont lopital. Dan son respons Bidze, i ti konplent ki latab drese i tro pti. La yer dan son respons *SONA*, i pe konplent ki lafnet dan lopital i tro pti. Mon krwar i pres pou li fer petisyon latab drese ek lafnet Lopital *Saint Mary La Digue*.

Me sa ki i pa dir, ler *COGA* ti vizit La Digue, *Chairman*

COGA, Onorab Lemiel ti byen kontan. Bann manm COGA i dir mwan ki Onorab Lemiel pa ti le aret koz lo sa lopital.

An plis ki sa, mon vwar drol ki Onorab Lemiel pe kraz tou proze Ladministrasyon LDS ozordi. Konman *Chairman COGA*, Onorab Lemiel in vizit plizyer proze lo Mahe, Praslin e La Digue. Apre tou sa bann vizit, in donn enn de *feedback* lo bann *assurances* dan Lasanble.

Mon'n ekout tou son *interview* lo SBC. E dan tou *interview* konman *Chairman COGA*, Onorab Lemiel in dir ki Gouvernman pe travay byen. Bann Minis pe onor zot *assurance*. Onor zot promes. Tou keksoz onor, dapre Onorab Sylvanne Lemiel.

I ti vizit proze *extension* lasose, La Digue. *Youth Detention Center* ki fek ouver Amitie, Praslin. *Vehicle Testing Station*, Mahe e plizyer lezot proze. Tousala annord! Dapre Onorab Sylvanne Lemiel. Bazar Baie Ste Anne annord! Lo SBC ti dir.

(laughter)

HON WAVEL WOODCOCK

Me zanmen, e se sa Mr Speaker, zanmen in dir naryen mal lo sa bann proze ki nou Gouvernman pe fer. Me la, i vin sant en lot zistwar.

Konmsi enn zot ansyen Prezidan; "ipokrizi i dan tou zot splander".

Ozordi US pe koz lo lalit kont drog ek reabilitasyon. Me selman, *APDAR* anba SS Honourable Dr Patrick Herminie, sa msye ti tir *APDAR* kot i ti sitye Amitie dan en Sant, e al lwe 2 lakaz pour plis ki R60mil Anse Kerlan avek enn son zwer pou swadizan tret bann *addicts*. Annou ase zwe.

Mr Speaker, US pe ekspekte nou koriz tou zot fot. Tir tou sa bann pouritir ki zot in kit deryer pandan 40an. Pey tou zot det. Enkli en det Larisi plis ki 40an pase. Aranz tou sa bann batiman ki zot in les degrengole e pouri dan zis 3an.

Ladan menm, Onorab Aglae i dir nou ki nou pe fer *maintenance* lo bann batiman ki US in fer. Be si zot ti annan en *maintenance plan* pour tou sa bann batiman piblik, nou pa ti pou bezwen depans sa ta milyon ozordi lo *maintenance*.

Nou ti pou kapab servi sa bann larzan pou fer plis fasilité enkli sa *Sport Complex* ouswa sa *indoor Gymnasium* ki mon pe rode Praslin.

Mr Speaker, dan pres 400 lakaz ki'n ganny andomaze dan leksplozyon Cascade, dan lespas zis 2 mwan, pli ki

51poursan lakaz in fini ganny aranze.

90poursan *unit* dan bann lakaz anba *PMC*, *Flat Gouvernman Cascade*, in fini aranze. Menm bann lakaz ki bann rezidan ti'n fini peye, *PMC* in aranze. Sa i enpresyonan Mr Speaker.

Konman lontan, zans la ti pou'n fini donn bal dan larzan ki sipoze ed bann viktim. Zis parey ler *Tsunami* ti tape. Larzan dan fon ki sipoze ed viktim *Tsunami*, ti ganny servi pou fer lakaz ek miray entel lo montanny. Ziska ozordi, i annan peser ki ankor pe esper masin avek bato.

Mon felisit mon koleg Onorab Monthy, pour sa konpasyon ki in montre anver son zabitan Cascade ek sipor ki'n donn zot, pou soulaz zot dan sa moman difisil.

Onorab Aglae in osi demande akoz si Prezidan pa ti demann Arab *plywood* olye manze? Olye dir mersi sa ki nou'n gannyen. In osi dir ki Port Glaud osi ti dan problemm me zot pa'n ganny gete.

Mr Speaker, ler SG US ti pe monte desann avek *plywood* dan *pickup* Brilliant, Cascade avek non bann aktivis US ekrir byen kler lo la. Akoz ki SG pa ti met non Onorab Aglae, avek enn de non son bann dimoun

Port Glaud lo la? Ou le dir mwan *US* ek son SG Onorab Cosgrow pe negliz zot prop Manm? Pa byen Mr Speaker.

Mr Speaker, Onorab Gabriel in kraz Lapolis. In koz lo 'ibou' anba nou Ladministrasyon. Me i blyie ler i tay *Arpent Vert* dan minot pe defons laport pou rod sekour avek Prezidan Wavel Ramkalawan, akoz ibou ti pe pil lo li. Onorab Arissol mon krwar ti la sa zour.

(Interruption)

HON WAVEL WOODCOCK

Si nou pou koz lo Lapolis, Larne, ibou ek *State Security* anba Ladministrasyon *US*, mon krwar mon pou bezwen ankor 30 minit pou koze. Mon krwar Mr Speaker, advise pour bann Manm *US* ki zot bezwen al *rewind* e reget *TRNUC*.

Mr Speaker, Lopozisyon pe konplent akoz *STC* in fer en profi 60milyon. *STC* i bezwen fer profi. Pli gro *middleman Capital Trading* in ganny tire. E son sef pe ganny zize Ankour ozordi.

Bann Manm *US*, zot annan lolas koz lo *STC* ozordi, kan se zot ki ti lwe en propriete, ki ti lwe en propriete avek Gouvernman pour selman R73mil. Apre re lwe sa menm propriete pour

R850mil avek STC. E pli tar, vann sa menm propriete pour R17milyon.

STCi annan plizyer fasilite pou fer, parey *cold storage* ek *warehouse*. Eski zot pou al pret larzan? Zot bezwen fer *savings*. E ou bezwen anmas larzan pour letan dir. Pou fer sir ki an ka okenn evantyalite, i annan larzan pou asir nou sekirite alimanter.

An konklizyon Mr Speaker, mon pou bezwen dir en gran mersi tou zabitant Grand Anse Praslin pour zot sipor ki zot in donn mwan konman *MNA* nou distrik.

En remersiman spesyal pour mon frer, defen Michael Jean-Louis nou *ex-DA*, ki osi en zanmi ki'n dan mon kote pour plizyer lannen. Nou apresye travay ki nou frer Michael Jean-Louis in fer dan nou distrik e nou mank li bokou Mr Speaker.

En gran mersi pour mon *Clerk Marcella Constance*, *DA Chantal Laure*, *Liaison Officer Vincent Cedras*. E tou zofisyen Gouvernman lo Praslin, pour tou zot sipor pou ed nou distrik bouz pli devan.

E nou pou kontinyen Mr Speaker, travay ansanm pour nou distrik e pour nou pei Sesel. Mr Speaker, nou pa pou zanmen les tonbe.

(APPLAUSE)

MR SPEAKER

Mersi Onorab. Laparol pour Onorab Anne Bistoquet.

HON ANNE BISTOQUET

Mr Speaker, koleg Manm Onorab, tou dimoun a lekout, bonn apre midi. A lokazyon mon premye diskour, mon anvi remersye tou dimoun ki'n siport mwan e donn mwan en mo lankourazman.

Mon vreman apresye sa lespri ankouraz en zenn madanm pou fer en kontribisyon dan devlopman nou zoli pei Sesel. Nou tou nou annan en lepase. E bokou nou nou'n aprann par nou fot.

Mr Speaker, mon lepase politik ti enn ki pa'n neseserman anmenn dibyen e lakontantman anver siporter *LDS*.

Mon pran responsabilite mon bann aksyon, akoz se sa fason ki nou ti ganny formen pou fer. Sa i mon pase. Mon'n bouz devan e rezet en politik sal ranpli avek vanzans e tre destriktif dan li menm.

Sa in pli ganny konfirmen pour mwan dan sa premye moman ki mon'n pase dan sa Lasamble. Mon pa vwar naryen konstriktif sorti kot *US*, me zis lensilt.

Ozordi mon lizye in ouver. Mon'n kit sa vilen pase. Mon en Manm *LDS* e mon determinen pou angaz mwan dan en politik pozitiv, ki pou ed nou popilasyon e nou pei ver semen progre.

(APPLAUSE)

HON ANNE BISTOQUET

Mon osi remersye *Caucus LDS* pour zot lakey. Sa dan li menm i montre ki sa *slogan* “Sesel pour tou son zanfan”, i pa zis parol, me in ganny tradwir dan aksyon.

Mr Speaker, ozordi o fon mon leker, mon senserman demann leskiz tou bann siporter *LDS*, ensi ki mon bann koleg Onorab lo sa kote latab, pour lafason ki mon'n reazir dan lepase.

(APPLAUSE)

HON ANNE BISTOQUET

Mon lans lenvitasyon pour mon bann ser ek frer ki pa ankor pran en desizyon, pou swiv mon legzanp. Pou sorti dan sa Parti *US* e zwenn sa lekip *LDS* ki pe travay pour Sesel e tou son zanfan, anba direksyon Prezidan Wavel Ramkalawan.

(APPLAUSE)

HON ANNE BISTOQUET

Mr Speaker, ozordi mon pe mars dan lepa en legzanp defen Onorab Rosie Bistoquet. En fanm for ki'n en *role model* pour mwan. Mon dir li mersi pour son kontribisyon pozitiv pour zabitan Point Larue e dan son profesyon Ners.

I napa okenn dout ki an 2025, se li ki ti pou ranport eleksyon dan sa distrik.

(APPLAUSE)

HON ANNE BISTOQUET

Mon promet li ki nou lekip Point Larue pou kontiny dan son lepa e nou pou dedye sa viktwar dan son memwar. Mersi Onorab Rosie Bistoquet.

(APPLAUSE)

HON ANNE BISTOQUET

Mon osi sezi sa lokazyon, pou felisit Onorab Rachel Spiro lo son lapwentman konman en Manm Lasanble Nasyonal. Mon swet li tou de bon.

Mr Speaker, mon salye Prezidan Ramkalawan parske pour en katriyenm fwa, in fer en vre diskour lo Leta nou Nasyon annakor avek Lartik 65 nou konstitisyon. Kot in tal devan nou nasyon, bann defi ek bann sikse.

In eksprim lafyerte ki nou nasyon i enn ki pe bouz ver pozitivite. E montre sa lespwar ki avek en tel lespri Nasyonal, pti Sesel pou kontinyen viv konman en gran nasyon egzanpler. Non selman dan nou rezyon, oubyen lo nivo Kontinan Lafrik. Me dan lemonn antye.

Linite en pep i konmans avek en fondasyon ki rekonnexion sak imen konman en frer ek en ser. E ki nou annan menm posibilite dan lavi. Mon akey lapel Prezidan pour rekonsilyasyon e linite Nasyonal. Se sa semen, ki Prezidan Ramkalawan ek lekip *LDS* i krwar ladan e pe travay dir pou fer arrive.

Dan *LDS*, nou anvi ki Sesel e Seselwa i bouz devan, malgre tou defi ki nou pei in eksperyanse. Konmision Laverite Rekonsilyasyon e Linite Nasyonal in devwal laverite.

Bi sa komite parey son non in dir, sete pou rod laverite lo bann atrosite lepase. E pou anmenn rekonsilyasyon dan nou pti pei Sesel.

Mr Speaker, konman en zenn ki ti inyoran lo bokou sa pase vreman fernwar, kasyet oubyen kouver dan bann mansonz. Ozordi mon kapab dir ki sa bann revelasyon par bann

viktim, in ed mwan sanz mon krwayans politik. E sa i enn bann rezon ki mon la kot mon ete ozordi.

Mon'n osi dekouver sa dezir profon nou Prezidan, pou anmenn linite. Kan li, konman en viktim sa sistem ki ti responsab sa bann atrosite, in debout e lo non Leta Sesel, prezant en pardon senser e solanel tou viktim e tou Seselwa.

In donn son langazman pou asire ki bann tel keksoz pa pou ariv ankor dan nou pei. I pran zis en dirizan for e kouraze pou fer sa. Sa se travay en *statement* en zonm Deta. Sa sel dirizan dan Sesel se pa lot ki nou premye Prezidan Elekte, Mr Wavel Ramkalawan.

(APPLAUSE)

HON ANNE BISTOQUET

Alor, annou mars avek li akoz nou asire ki lavenir nou pti pei i garanti e byennet bann zenerasyon demen i asire.

Mr Speaker, mon lans en lapel avek tou zenn, pou nou osi zwenn avek Prezidan Ramkalawan, e donn nou langazman ki pou kit nou pei lwen avek bann tel atrosite. E ki nou pou travay pour ki lape e limite i rennyen lo nou zil touzour.

Mr Speaker, i enportan pou koz laverite pou edik nou pep. Atraver ou Mr Speaker, Onorab Lemiel in fer en *statement* konmkwa ki Prezidan in fatige pourswiv Gouvernman dan lepase. Kot in ganny en kantite larzan nou Gouvernman e in menm asosye avek sa fame mo “*karma*”.

Mr Speaker, mon oule enform Onorab ki dan rikord Zidisyer, se selman en fwa ki Prezidan Ramkalawan, ansanm avek 12 lezot sitwayen, ti anmenn *case* konpansasyon kont Gouvernman.

Sa ti apre ki le 3 Oktob, 2006, zot ti ganny bate letan ki zot ti'n ralye kot ansyen batiman Lasanble Nasyonal, ver 10er en kar bomaten, pou siny en petisyon relye avek *Broadcasting and Telecommunication (Amendment) Bill, 2006*.

Sa lensidan ti pirman lafot Gouvernman e labi Drwa Imen. Konmisyon Ziz Riley ti dir klerman ki Leta ti responsab.

Wi, Prezidan in anmenn lezot *case* difamasyon, prensipalman kont zournal *People*. Kot in ganny tou son *case*. Se SPPF, Parti Lepep, US ki'n donn li en pe larzan akoz zot mansonz.

Mr Speaker, mon'n antann plizer Onorab lo lot

kote latab koz lo SBC. Zot in akiz Prezidan konmkwa i pe enterfer avek desizyon SBC.

Me sa bann menm Onorab, zot in oubliye ki sete Prezidan Ramkalawan ki'n donn Seselwa sa vre laliberte lekspresyon, pou ki nou sitwayen i kapab annan zot Drwa Lekspresyon ki zot ti'n perdi depi le 5 Zen 77.

De lot kote Mr Speaker, nou vwar parti minoriter *United Seychelles* an 2022, zot in anmenn 2 ka Ankour kont SBC. Sa 2 *case* se CP05 2022 e CP10 2022. Tou lede ka parmi Mr Patrick Herminie, Dirizan Parti *United Seychelles*.

(Interruption)

HON ANNE BISTOQUET

Se sa ki apel enterfer dan desizyon SBC. Le 5 Desanm 2023, Lakour ti *dismissed* sa *case*. Zot memwar i vreman kourt. Oubyen, zot kasyet laverite, avek menm zot siporter parey labitid. Dan menm fason ki zot pa pe donn kont finansyel parti avek siporter.

(Interruption)

HON ANNE BISTOQUET

Dir konbyen zot pe vann later, e kantite zot fer diverti kontan?

Mr Speaker, letan ki Onorab *Leader Lopozisyon* ti pe fer gran, gran diskour avek bann fo lenformasyon lo enn son aktivis, Veronique Adeline, mon ti ekspekte li al en pe pli lwen pou li demann en pardon sa bann manman, ki zot ankor pe esper zot zanfan, ki pa pou zanmen retournen.

(APPLAUSE)

HON ANNE BISTOQUET

Bann manman ki zot zanfan in disparet. Sa ki zot in anmans anba pon Cap Samy. Sa ki ti ganny anmare avek masin bato. Ganny brile dan *pick-up*. Sa ki ti ganny zete dan ranpar, parey nou'n antann dan bann temwannyaz devan Konmisyon Laverite.

Bann zanfan tel ki Dharmendra, Ricky Hermitte, Alton Ah-Time, Monnaie, Simon Desnousse e bokou lezot.

Pli sagrinan Mr Speaker, bann madanm Onorab lo lot kote latab, zot koz bokou lo soufrans bann manman. Mon vwar sa konman en lipokrizi. Parske zot napa okenn kouraz pou demann pardon sa bann manman ki'n soufer anba lanmen per fondater.

(APPLAUSE)

HON ANNE BISTOQUET

Onorab Spiro yer in kriye *a haut voix* ki i konpran soufrans manman. Mon ti a voudre konnen si i konpran soufrans sa bann manman, ki lavi zot zanfan in ganny koup kourt e pa pou retourne ankor.

Omwen Veronique Adeline son fanmir ti konnen kot ti ete e i ti retourne kot li. Anba Prezidan Ramkalawan, personna pa pou disparet.

(APPLAUSE)

HON ANNE BISTOQUET

Mr Speaker, mon ti a kontan felisit Gouvernman, pa zis pour proze lenfrastriktir, pour Lapolis e Lafefans. Me osi pour sa bann travay ki Lapolis e Lafors Defans pe fer sirtou pou konbat fleo sosyal, tel ki drog.

Ozordi nou vwar ki mannyer depi Oktob 2022, pli gran kantite drog in ganny sezi. E sa atraver bon korperasyon parmi tou lafors sekirite.

Malgre ki mwens drog pe antre dan nou pei, i ankor annan ki pe antre dan diferan fason. Mon swete ki zot ava idantife sa bann fason e pran aksyon neseser.

Mwan, mon enn parmi sa zenn ki kontan letan loperasyon kont drog, i anmenn sikse. Mon zwenn avek zabitan Corgat

Estate e lezot vilaz, pou dir felisitasyon nou lafors sekirite e donn tou lankourazman dan sa lalit. Nou bezwen sov sa zenerasyon e bann ki pe vini.

Mr Speaker, nou bezwen osi met lanfaz lo sa laspe prevantif, pour ki nou bann zanfan pa tonm dan bann move frekantasyon. Akoz se sa ki anmenn zot ver drog e krim. E sa i depan bokou lo paran, lo fanmir e lasosyete an zeneral.

Nou konman paran, nou bezwen annan plis kontrol lo nou zanfan. Tro souvan nou tann lanons. Lapolis pe rod tel ou tel ki'n absante kot son lakour. Annou fer sa zefor ekstra, pour ki nou bann zanfan i pa ganny distrer par bann kriminel e zot konplis.

Annou vey zot pli byen. Annou pran en pe plis lentere dan zot letid, dan zot problemm lavi. Pour ki zot pa bezwen ganny antrennen dan lavi danzere, kot nou pou vvar li tre difisil pou sov zot pli tar.

Mon solider avek tou paran, spesyalman bann zenn manman ki pe elve zot zanfan tousel. Mon swet zot kouraz.

Mr Speaker, ozordi nou vvar bokou proze lenfrastruktir in ganny antreprann pandan sa dernyen 3an anba Gouvernman LDS, avek larzan Lepep. E non

pa avek larzan US, parey zot ti oule fer Seselwa krwar.

Premyerman, atraver ou Mr Speaker, Lopital Saint Mary's La Digue, ki ti ganny inogire le 15 Out 2023. Kot laprev se portre e *video* Onorab Uranie ki ti'n asize byen konfortab parmi bann envite distenge.

(Interruption)

HON ANNE BISTOQUET

Touzour La Digue, in osi ganny novo lasose, kot Onorab Uranie i debarke byen konfortab lo la. Ankor La Digue menm, proze tretman desarz pe al terminen, e novo lekol pe byento konmanse.

Ozordi Digwa i fyier ki bokou promes plis ki 43an, in ganny delivre. Grammersi Prezidan Ramkalawan pa'n les swa swadizan petisyon kont novo lopital, fer li per.

Praslin, novo lasose, bazar, *ice plant* ek *gear store* pour peser Baie Ste Anne, in lev distrik mon nesans. E facilite Grand Anse, Praslin i fer nou fyier. Tel ki novo Stasyon pour Teste Veikil ek Baz Gard Lakot, Baie Ste Anne, in donn novo facilite enportan Praslin.

Devlopman *Ile Eve*, kot apre tou sa bann lanons lannen promes, se zis ozordi ki

lenvestiser in ganny en *lease* e zot proze pe konmanse. San oubliy Proze Kato Nwanr, ki byento pou fer Baie Ste Anne en vre sant komersyal e biznes.

Mr Speaker, annou pa oubliy bann proze resirfas semen ki'n konmanse Grand Anse, Praslin e byento pou bouz Baie Ste Anne, pour latansyon Onorab Churchill Gill.

Tou sa in ariv dan sa kourt peryod letan. Prezidan Ramkalawan ek son lekip in fer nou fyer. Onorab Woodcock in fer nou fyer. Onorab Porice in fer nou fyer.

(APPLAUSE)

HON ANNE BISTOQUET

Sa mon apel travay en Gouvernman serye e devoue pour son pep.

E la mon sezi loportinite pou felisit Gouvernman pour sa novo *Youth Offenders Facility* ki ti ganny inogire par Prezidan e Minis Fonseka le 5 Fevriye, 2024.

Avek sa novo facilite, mon swete ki lasosyete i ava osi ed nou bann zenn ki'n pran en move direksyon. Pou redrese e re-debout ankor, pou fer en vre kontribisyon dan nou sosyete. An menm tan ki zot fer zot paran e zot lekor fyer.

Mr Speaker, mon kontan pou aprann ki finalman Lotorite konsernen pe adres sa sityasyon laplenn Amitie, ki mon Onorab koleg Woodcock in koz lo la. Laplenn Amitie i inonde a sak fwa lapli i tonbe.

Labaz sa problemm i senpleman akoz Gouvernman US ti *encroach* later prive, letan zot ti fer sa an 2006. Me la tou keksoz pe bouze e koriz bann fot. E apre Federasyon Foutbol anba Proze *FIFA* pou okip sa stad. Se sa travay en Gouvernman ki enterese avek lazenes.

Mr Speaker, Onorab Lemiel ek son lekip in eksprimen ki napa naryen pozitiv ki'n ganny fer pandan 3an. An plis ki sa, mon koleg Onorab Larue in mansyonnen, mon oule enform Onorab Lemiel, ki menm zour ki i ti eksprim son fo analiz, Mardi le 26 – le 27 Fevriye, 2024, SLTA ti *tender* proze Semen Lafous, ki pou benefisyе bann fanmir Quilindo, Annette, Rachel e Dorothee.

Pli tar semen *Grand Riviere* osi pe al lo *tender*. Sanmenm rezulta letan ou pa konekte e ou pas ou letan fer fo propagann. Bann lezot proze dan Anse Royale pour lenformasyon Onorab Lemiel.

Pavement dan proze *West Coast* in byen avanse ant Legliz Anglikan ek Legliz Katolik devan *Beach Park*. Proze Drenaz avan Laferm Matombe ziska bor lanmer, in preski konplete.

Government House pe esper lokater sorti, afen ki sa proze i a kommanse. E sa pou anmenn desantralizasyon servis Gouvernman. Dan Bamboo, proze *Land Bank* in kommanse. Akoz *moratorium* lo kas lateras an Desanm ek Zanye, Gouvernman pa ti kapab fer bokou pou annan 60 kare later pour zabitan.

Proze lakres mon'n ganny enformen par Lotorite, ki sa proze pou konplete an *May, 2024*. Travay in fini rekonmanse. E sa *weekend*, premye letaz pou'n fini ganny penn. E Lendi, bann *scaffolding* pou ganny tire.

I drol ki Onorab pa kapab anmenn sa imilite pou rekonnet sa travay ki Prezidan Ramkalawan pe fer, e zis met latansyon lo regar Prezidan.

Mr Speaker, ozordi nou annan en Gouvernman ki malgre bokou defi, pe vwar tou fason pou adres Sistèm Lasante Sesel. Ki konpri bann problemm lasante ki egziste, ensi ki en pli bon servis. Mon'n ganny dir ki mazorite nou

problemmlasante i relye avek obesite ek lalkol.

Parey nou konnen, Prezidan in lans en kanpanny pour lalit kont obesite. E ozordi nou vwar ki diferan lenstitisyon e landrwa travay pe fer bann programm.

A sa pwen, mon felisit bann group endividé dan kominote pou ofer bann servis ki kapab kit nou sitwayen *fit* e an bonn sante. Pou mansyonn detrwa Mr Speaker, mon felisit Barnsley e Coach Stephen kot *Musclemindz Fitness*. Rodney Henriette kot *Motivation Gym*, La Digue. *Kilo Game*, Cyril Rabat kot *Fitness Xtra Gym*, Praslin. Ensi ki tou lezot.

Mon osi felisit Collin Rath, ki'n fek lans son biznes *Eat Right Seychelles* lo Facebook, kot i ofer servis bann manze vreman an bonn sante.

Konman en zenn, mon fyier letan mon vwar lazanes pe pran ka pou mentenir en bon lasante. Dan agrandi kantite e kalite servis ki nou ofer, Prezidan in kree en komite teknik e en komite *fundraising* pour nouvo Lopital Sesel, ki nou anvizaze fer a lavenir.

Konman en Manm sa komite, mon oule remersye Prezidan pour en tel linisyativ, E osi felisit nou Chairman Mrs MacGregor e tou lezot manm,

pour sa travay ekselan ki nou pe fer.

Mr Speaker, defi nou sistenm lasante i pa enn ki nouvo. Ankor enn fwa, mon demande, ki i annan en nouvo lapros kot travayer i donn tou sipor dimoun ki bezwen sa servis lasante. Annou asiste piblik e non pa fer zot fristre. Spesyalman, dan bann senp servis.

Mr Speaker, lasante i pa en servis pou fer politik oubyen pou zwe avek. Bann tel konportman e performans i inakseptab. Atraver ou Mr Speaker, mon ti a voudre fer en demann avek Onorab Spiro, pou konsey son bann dimoun pou aret enterfer dan travay bann travayer lasante.

Mr Speaker, Onorab Algae in konplent mankman Dokter dan Lopital Sesel. Mon respons pour Onorab i senp. Dir Dokter Fanny, aret asiz dan Maison du Peuple dan *Press Conference*, kan i sipoze pe travay.

(APPLAUSE)

HON ANNE BISTOQUET

Mr Speaker, lo size Servis Piblik, mon salye Ladministrasyon LDS pou met an plas en sistenm *appraisal* pour trezyenm mwan saler, kot

anplwaye i bezwen akonplir serten lekspektasyon.

Tro bokou letan nou'n vwar ki i annan bokou travayer i fer louvraz zot kanmarad, e tou i benefisy'e egalman. Sa i inakseptab.

Mon osi lans en lapel avek bann anplwayer pou silvouple, donn zot anplwaye bann lekspektasyon ki tonm dan zot responsabilite.

Mon'n ganny serten konplent ki i annan serten anplwaye e *supervisor* ki siport Lopozisyon, ki pe viktimiz zot anplwayer ki siport *LDS*.

La mon profite pou demande, ki en lenvestigasyon i ganny fer pou regarde, si vre *IOT* ti fer *appraisal* pour son travayer Seselwa. E ki si i pa'n fer ki parey Lalwa i demande, zot ganny zot trezyenm mwan antye ki zot merite.

Mr Speaker, atraver ou, Onorab Spiro in kriy byen for "si en Prezidan i kapab enterfer dan Servis Piblik?" In menm demann Prezidan pou demisyon.

Be Onorab, se Prezidan Ramkalawan ki responsab pour Ladministrasyon Piblik. Alor, i annan tou drwa pou li enterfer dan bann problemm ki pe afekte Ladministrasyon Piblik, tel ki *service delivery*.

E Prezidan in selman donn son lopinyon plis ki 3an ki in o pouvwar. Konpare avek dan lepase, kot bann dirizan ti enterfer e konmans pouz dimoun premye zour ki zot ti pran lofis. Deza, pa zot in fini dres lalis dimoun, ki swadizan zot pou pouse an 2025 dan zot rev.

Sa lespri vanzans e viktimizasyon ki zot pe vin avek, kot zot menm maltret bann *PS, CEO* ek teknisyen Seselwa, pa pou anmenn zot lwen.

Mr Speaker, tou sa Onorab lo lot kote latab in koz tre for ki zot konpran soufrans travayer. Mon oule dir sa pep Seselwa, pa tonm dan zot latrap. Akoz leokri ti laba dan Maison du Peuple.

Sekreter Zeneral Parti *US* ti anbet son bann travayer laba e fer zot siny Kontra *Service Provider* kot sa bann travayer ti bezwen pey tou *tax* e pansyon zot menm, san okenn kontribisyon parti.

(Interruption)

HON ANNE BISTOQUET

Listwar in repet son lekor. Letan ki Gouvernman ti donn 10pourasan logmantasyon, sa parti ti refize donn zot travayer en logmantasyon.

An dizan ki zot napa larzan. E ki si ti donn pli ba poursantaz, petet zot ti a gannyen. Kan i annan serten ki pe byen pase e pe donn bal *First Class* ek *VIP* lo larzan parti.

(laughter)

HON ANNE BISTOQUET

Seselwa, eski sanmenm sa bann dimoun ki zot kapab krwar ladan? Mon mesaz pour zot se, annou koste ansanm avek Prezidan Ramkalawan pou pran swen avek nou menm e avek lezot.

Mr Speaker, nou pe pas dan en kriz klimatik. Pli ale nou vvar plis tanpet, gro divan, lanmer mont pli o e linondasyon, deboulir ros e lezot dezas.

Dezas le 7 Desanm dan nor i laprev sa fenomenn global. Sa osi, i anmenn mwan Praslin e La Digue, kot lerozyon lakot an rezulta pli o mare, in montre son vre lenpak.

Mon felisit Prezidan, Vis-Prezidan, mon 2 koleg Onorab Porice e Onorab Woodcock. *Liaison Officers* e sa tim Lotorite Distrik ki ti mont Praslin le 23 Zanvye, pou vvar lenpak lo nou bann semen lakot.

Kot selman dan 3 zour, travay ti'n konmanse dan mazorite sa bann landrwa.

Aksyon in fini vin dezyenm non Ladministrasyon LDS. Lo La Digue, reabilitasyon Anse Severe pe kommanse tre byento. E tou preparasyon pe deza ganny fer.

Nou stratezi adres sanzman klima i enn ki enportan. Mon salye zefor Sesel, ki a sak fwa nou partisip dan bann *forum* enternasyonal e some lo sanzman klima e devlopman soutenab, Prezidan Ramkalawan i touzour pe pouse. Pour ki tou Lorganizasyon Miltilateral e Lorganizasyon Finansyel Enternasyonal ki anba kontrol pei was, i sanz zot mekanizm finansman. Pou permet bann Pti Leta Zil, enkli ki Sesel, pou annan akse avek finansman konsesyoner. Savedir, kot lentere i ba.

Son *leadership* i ozordi ganny rekonnnet e i ganny aksepte konman en sanpyon pour lanvironnman. Mr Speaker, mon profite pou dir ki menm isi lo Mahe, bokou pe ganny fer pou adres size *flooding*. Travay in ganny fer avek sikse Anse Boileau, Anse a la Mouche, Au Cap, Anse Royale, Pointe Larue, dan Victoria e lezot landrwa.

Pour Point Larue, mon konnen ki i annan ankor proze ki pou ganny fer pou tir delo.

Spesyalman letan i annan gro lapli e lanmer i mont an menm tan. Gouvernman pe travay.

Mr Speaker, atraver ou mon anvi dir Onorab Gabriel, ki problemm avek semen Adela napa naryen pou fer avek Gouvernman. Me avek kontrakter.

E lazans *SIA* pe al termin son kontra imedyatman, e en nouveau kontrakter i ava ganny apwente. Pa trakase, semen pou ganny fer, menm san ou sipor Onorab. Me zis ou kritik.

Mr Speaker, Prezidan in zwenn ansanm avek mazorite Seselwa pou partaz lakonplisman Sesel. Pou fer ankor bokou pli byen lo Lendeks Persepsyon Koripsyon, kot nou'n ganny klase konman pei ki'n fer pli byen dan Lafrik.

Parey mon 2 koleg Onorab Romain e Samynadin ti'n dir yer. An 2019 e 2020 anba ansyen Ladministrasyon, nou ti 27enm. Selman 1an ki LDS ti antre dan Ladministrasyon an 2021, Sesel ti fer en gran amelyorasyon pou arriv 23enm.

E 2an pli tar, nou fer ankor en lot lakonplisman. Kot nou'n sorti 20enm dan 180 pei. Sa i vedir ki depi larive LDS dan Ladministrasyon, Gouvernman Sesel i annan en gran amelyorasyon dan lalit kont

koripsyon dan Gouvernman, ensi ki dan Sekter Prive.

Mr Speaker, konman en zenn, mon pli pare ki zanmen pou ede kontinyen konbat koripsyon. I annan sityasyon ki Lepep in konnen e i annan ki pa ankor ariv devan sa pep, pou zot konpran kwa vreman ki sertern ti a pe fer.

Enn fwa pour tou, tou sa ki pour Lepep Seselwa, pou bezwen retourn pour sa pep. E sa ki koupab, aksyon apropriye pou bezwen ganny pran kont li.

(APPLAUSE)

HON ANNE BISTOQUET

Mr Speaker, koripsyon i anpes devlopman ekonomik. E i fer nou popilasyon soufer. Nou tou ansanm enkli bann zenn, e tou travayer, nou bezwen debout for kont koripsyon. Mon ankouraz ACCS dan sa gro latas ki i annan pou akonplir. E nou pou siport tou son aksyon.

Mr Speaker, mon felisit Ladministrasyon LDS ki'n fer sir ki dan letan difisil, kan nou ti pran pei an 2020, zanmen Gouvernman in manke pey nou det.

Dan sa moman difisil, Ladministrasyon LDS in kapab sov *Air Seychelles* ki i ti pe tenir lo en bren difil. E nou'n les li

anvole. Se sa ki nou apel en Gouvernman responsab.

Mr Speaker, an Oktob 2020, Parti US ti oule ki Gouvernman i ranpli en goni ki zot menm zot konnen zot ti'n koup tou fon. Me par kont, Gouvernman LDS in kapab ranplas sa goni defonse.

Mr Speaker, mon'n atann koz lo balans lot kote latab par Onorab Loze. Mon sizer avek Onorab Loze, si i vreman oule en balans dan sa Lasamble, vi ki nou annan bokou plis Manm, pou li fer en fotokopi sak zenn.

(laughter)

HON ANNE BISTOQUET

Mr Speaker, mon terminan an dizan mersi LDS pour sa travay ekselan ki nou'n fer, malgre sityasyon in fer li vreman difisil. Zis mazinen, si nou Ladministrasyon ti'n pran laba dan botan, ki zistans nou ti pou ete ozordi?

Mon enplor avek pep Seselwa, espesyalman bann zenn, pour nou reste pozitiv e touzour viz ver sikse. Se selman atraver pozitivite ki nou kapab enspir linite e viv dan en sosyete prospere.

Annou konman Seselwa, montre lemonn antye, ki malgre nou bann divers krwayans, nou tou nou kapab viv dan larmoni

e dan lape. Annou fer Sesel sa pti bizou, sa *melting pot* egzanpler dan lemonn.

Koste ansanm lazernes Seselwa, e annou siport sa ki byen e sa ki bon, ki Prezidan Sesel Mr Wavel Ramkalawan e son Ladministrasyon pe fer. E annou swiv sa bon semen ki in met nou pei lo la.

Avek sa Mr Speaker, mon asir pep Seselwa ki ansanm avek bann koleg e mazorite pep Seselwa, nou pa pou zanmen les tonbe. Mersi.

(STANDING OVATION)

MR SPEAKER

Mersi. Mersi Onorab. Bon, nou a pran poz la. I reste nou 3 entervenan. Nou a repran repons 4er.

(BREAK)

MR SPEAKER

Nou a kontinyen, laparol pou Onorab Philip Monthy.

HON PHILIP MONTHY

Mersi Mr Speaker. Bonn apre midi Mr Speaker. Bonn apre midi tou koleg Onorab, tou zabitan Cascade. E pli presizeman tou bann zabitan Petite Paris, *Brilliant* ki'n ganny afekte avek sa leksplozyon le 7 Desanm.

Mr Speaker, zanmen mon pou bliy sa Dimans granmaten le 25 Oktob 2020, apre ki rezulta eleksyon ti'n fini anonse kot mazorite Seselwa ti'n desann an gran nomm son lavey pou vote e tir sa ansyen rezim koronpi ki ti'n la pou leternite ti pe selebre.

Enn mon zabitan ki ti la ti dir mwan, ti dir mwan "travay i komanse la". Mon ti reponn li Mr Speaker, mon ti dir li "wi, e mon'n pare". E travay in la *comme* dir marmay. E parey Prezidan Ramkalawan in fer resorti dan son Ladres, travay pa fer nou per Mr Speaker.

(APPLAUSE)

HON PHILIP MONTHY

Akoz se pou sa rezon ki Lepep Seselwa in swazir pou tir sa bann abizer pouvwar ki ti la, e met zot konfyans dan LDS.

Me Mr Speaker, pou mwan se pa lakantite travay ki mon annan pou fer ki sa pli gran defi dan sa pozisyon koman Manm Lasanble Nasyonal pou mon distrik Cascade.

Akoz mwan depi marmay nou'n konnen kisia travay dir. Mon pli gran defi parey mon'n toulstan fer remarke, se pou kapab asize la anndan pandan 3 zour, e pou ekout sa bann Manm minoriter koze. E sa Mr

Speaker i menm reaksyon sorti kot plizyer dimoun la deor ki swiv Lasanble.

Me diferans se ki zot, zot kapab sanz *channel*, ferm zot radyo oubyen pez *mute*. Me malerezman nou la anndan nou pa kapab fer sa, e nou bezwen sibir sa bann atrosite verbal. E zot, ler i zot trou pou asize ekout nou zot rod en leskiz pou zot kapab *walked out* parey la apre midi zot fek fer.

(APPLAUSE)

HON PHILIP MONTHY

E sa lannen ankor Mr Speaker, i pa'n en leksepsyon. Sa kantite lanmertim negativite e mansonz ki'n ganny senmen ler sa bann Manm i sorti dan sa parti negativite in koze.

In pour ankor enn fwa de plis montre nou kwa ki vre zot lentansyon e stratezi travay koman en Lopozisyon. Mon konnen ki zot novo dan sa rol Mr Speaker. E mon ti a espere ki apre 3an ki zot in dan Lopozisyon, zot ti'n kapab devlop serten sans matirite e anfen komans delivre zot manda koman en vre Lopozisyon responsab e serye.

Me sa parey nou'n vwar i pa'n leka, prenon kont zot move performans koman en Lopozisyon mon pou sizere ki

olye anvoy swiv en *crash course* dan *leadership Abu Dhabi* parey sa group CEO fek fer. E ki'n fer partou ek zot fermal ziska in fer zot maltret sa bann pov *public servant*. Mwan mon pou sizere ki Prezidan Ramkalawan i fer zot mont *State House 2* fwa par semenn, ler napa Lasanble. E i donn zot lesson lo ki mannyer en vre Lopozisyon i devret pe ranpli son responsabilite.

(APPLAUSE)

HON PHILIP MONTHY

Omwen ler zot a retour la dan sa Lasanble, zot a kapab dir ki zot bann Manm Lopozisyon kalifye. Pou kapab fer sa travay ki zot pe sey fer depi premye zour sa 7eme Lasanble ti fer son premye sesyon, me ki zot pe malerezman *fail mizerableman*.

Mr Speaker, mon'n osi pandan sa detrwa zour depi ki deba lo Leta nou Nasyon in komanse kapab obzerv reaksyon detrwa endividé lo rezyon sosyal, ki ti swadizan dapre zot bann gran siporter *LDS* dan dernyen eleksyon, pe donn zot reaksyon lo diskour Prezidan Ramkalawan.

Dapre zot tel parey sa bann la anndan dan lot kote latab, *LDS* in *fail* sa pep. *LDS* in abandonn son manda, ledikasyon pa bon, lasante pa

bon, pri lavi i sitan o, Prezidan ek bann Minis pa pe travay.

An dot mo naryen pa bon dan sa pei, e pei pe kontinyelman al dan move direksyon. Zot dir ou pei pe al dan move direksyon selman Sesel i kontinyelman bouz devan, e fer progre menm fas avek sa bann defi ekstern ki nou napa kontrol lo la.

Sa bann profet negativite parey mon apel zot. I dir ki koripsyon pa konnen ki pou fer avek anba nou ladministrasyon.

Selman Mr Speaker, Sesel i fek amelyor son pozisyon lo Lendeks Persepsyon Koripsyon, *Transparency International* sorti 36 pou ariv 20eme. En pozisyon ki zanmen sa parti US in deza kapab reisi fer pandan sa 40 ekek lannen ki zot in la o pouvwar.

Selman zot annan lolas vin koz lo koripsyon anba Ladministrasyon LDS. Onorab Aglae, mon pa konnen si mon devret dir atraver ou vi ki i pa la Mr Speaker. Dan son pa tro konnen ki poudir parey son labitud, i dir pou li si ou 20eme savedir i ankor annan koripsyon. Pa i fer ou riye sa.

Denmark i klase premye, e *Ferland* 2eme avek en score 90 ek 87 respektivman i montre ou

ki zot osi zot pa'n score 100 pwen.

Me ki sa klasman i montre ou? I montre ou ki sa Gouvernman *LDS* in pran sa size koripsyon serye, tel parey sa lalit kont drog danzere. E menm si ou pa kapab elimin li dan son totalite, me travay pe ganny fer pou ki o tan ki posib sa bann move pratik i ganny elimin.

Sa menm Onorab Aglae, li menm li apre i dir *LDS* pe met tro bokou kondisyon pou ed dimoun. E ki zot ler zot ti la, zot ti ede san kondisyon. Sa kondisyon Onorab? Sa i en reset pou ki koripsyon i pran plas. I pa drol alors ki zot in kapab fer disparet \$50milyon dan segonn.

E sa ki fer ou riye ankor Mr Speaker, pli boner li menm li i dir i demann son lekor si larzan *tax* pe byen ganny zere anba ladministrasyon *LDS*. Me zot ki nou pe servi?

Bann profet negativite i dir ki lasante pa bon ditou. Me malgre mon pou bezwen admet ki i annan plizyer defi pou sirmonte dan sa domenn, me sa blyie Mr Speaker i bann problem ki nou'n vin zwenn la.

Me kantmenm ki nou'n vwar? Nou'n vwar en nouveau lopital ganny konstri dan en lespas letan rikord lo nou pti zil

La Digue, apenn 3an ki sa Gouvernman in o pouvwar. En promes ki Digwa ti'n perdi lespar lo la. E ki zot in dir nou la? US i sel opsyon pou Sesel.

Lasante pa bon e pei pe al dan move direksyon. Selman travay pou rod finansman pou konstriksyon en novo lopital isi Mahe in fini demare. E avek lagras Bondye byento kondisyon travay nou bann profesyonnel lasante e konfor nou bann pasyan i ava amelyore. E tou lezot defi dan nou sistem lasante a ptitapti komans ganny adrese.

Bann profet negativite i dir ki pri lavi pe tous plafon e nanryen pa pe ganny fer. Selman nou'n vwar pri lo plizyer komodite esansyel ganny redwir konsiderableman, e plizyer ankor pou byento vin ganny azoute lo sa lalis Mr Speaker.

Me byensir pri fuel ler i monte deor, nou osi isi nou bezwen sibir sa bann sok. Akoz dernyen fwa ki mon ti verifye, Sesel pa ankor dekouver petrol Mr Speaker. Si pri transportasyon i monte, nou osi isi nou pou bezwen anmas sa reperkisyon. Akoz nou depaen preski antyerman lo lenportasyon.

Me Mr Speaker, sa ki zot pa dir pep Seselwa se ki nou to

lenflasyon in kontinyelman reste ba depi apre peryod *COVID*. Enn bann rar *success stories* ler ou pou konpar avek sa o nivo lenflasyon mondyalman. E pa fini, menm fas a sa kantite defi ki nou koman sa Pti Leta Zil nou fer fas avek. Akoz en senp pti sok ekstteryer i poz en danze pou nou lekonomi prenon kont nou depandans lo lenportasyon.

Me ki nou pe vwar? Sesel i ganny klase 4eme dan Lafrik par Labank Devlopman Afriken koman bann pei ki ekspekte annan en to lenflasyon pli ba an 2024.

E en pti leksplikasyon sa mo lenflasyon an term senp Mr Speaker, menm si mon pa en ekonomis. I tou senpleman vedir, sa ki arive ler pri komodite e servis i ogmante, ki fer ki pouvwar aste en endividé i vin pli mwens akoz i pou bezwen en pe plis larzan.

Me sa Gouvernman *LDS* in reisi met sa anba kontrol pou zisteman protez nou bann sitwayen ki pli vilnerab. E nou pa'n fer zis sa, nou'n kapab osi dapre mwayen Gouvernman donn 10poursan logmantasyon saler bann travayer Sekter Piblik.

E sa Mr Speaker, i gras a travay ki sa lekip kot Minister Finans anba direksyon Minis

Hassan in fer. Kot bann Polisi Monneter byen kalkile e efektiv in ganny met an plas, olye zis depans larzan an bonnavini parey *US* ler zot, zot ti la zot ti abitye fer.

Sa bann reisit Mr Speaker, sa bann fo profet negativite, pou sey tou pou fer Seselwa pa vvar. Akoz sa in annan en lefe pozitiv pou ede mentenir en nivo akseptab lo pri lavi Sesel. E sa i enportan ki Seselwa i konpran e i note Mr Speaker.

Me eski i annan ankor pou fer, pou fer desann pri lavi? Wi Mr Speaker, byensir. Me i enportan pou nou pep komans apresye sa ki'n ganny fer e zefor ki pe kontinyelman ganny fer pou amelyor kondisyon lavi nou pep.

Akoz ler nou pe dir pri lavi i o Sesel, mazinen ki si sa Ladministrasyon pa ti pe delivre prenon kont tou sa ki pe arive an se moman dan lemonn, mon demann mon lekor ki kalite difikilte Seselwa ti pou vvar li ladan.

E mon pou al pli lwen, mon pou demande ki kalite difikilte Seselwa ti pou vvar li ladan si par maler zot ti'n met *US* o pouvvar an 2020. Ler ou get sa kalite larzan ki sa Ladministrasyon pe bezwen peye pou bann gasi ki zot in kit deryer, *La Misere* mwan menm

mwan mon'n ganny afekte depi se pa ki lannen nou ankor pe espere. La mon krwar sa Gouvernman *LDS* ki pe al fini pey konpansasyon.

PUC, Mr Alain St Ange, *fungus* e la resaman nou bezwen al pey en det \$6 milyon Larisi. Enn det ki'n la depi bann lannen 80. Ou demann ou lekor ki kalite gasi zot ti pou pe fer la konmela si zot ki ti pe asize anler *State House*.

Ler nou pe koz lo det Mr Speaker, anba Ladministrasyon Prezidan Ramkalawan nou det in sorti 64.6poursan pou ariv 60 poursan 2023. Eski sa i en pei ki pe al dan move direksyon sa?

Mr Speaker, Onorab Uranie in dir ki zot koz bokou lo zot kote latab, e ki zot koz sa ki fer sans. Mon pou dakor avek li ki zot koz bokou. Sa tou dimoun i konnen. Me lo sa bout koz sa ki fer sans sa Onorab mon dezole pou dezapwent ou, ni mwan, ni mazorite Seselwa pa pou dakor avek ou.

Onorab si mon ti annan plis ki 30 minit pou koze, mon ti pou eksposz tou sa bann mansonz ki zot in vin koze la depi Mardi. Pou montre Seselwa ki zot in vreman napa naryen konkret pou dir.

Parey sa zafer 7an Prezidan pe vin prolongz son

manda pou 7an. Kote ki sa in ganny mansyonnen dan diskour Leta Lanasyon Prezidan Mr Speaker, pirman mansonz.

Tel parey ler son sef la anndan ti dir ki transpor ti ganny divert lo *runway* pou premye fwa dan listwar Sesel. Dan zis sa *statement* Mr Speaker, in annan 2 mansonz, akoz sa in deza arive anba zot Gouvernman. E transport pa ti pas lo *runway*.

En lot ti dir ki *LDS* nou pou ziz ansyen Prezidan Michel ler nou vin o pouvwar e la nou pa pe fer naryen. Me pa i ti parmi pou vot kont dan sa sisyenm Lasamble. Ler Onorab Larue ti anmenn en Mosyon pou amann sa parti nou Konstitisyon, lo imilite Prezidan.

E la ki nou annan mazorite absoli Mr Speaker, sa lamannman parey Prezidan in anonsé pe al ganny fer. Tel parey Prezidan Ramkalawan in anonsé dan son Ladres *SONA*.

Zot in sitan napa nanryen pou dir Mr Speaker, ki Onorab Aglae li menm in admet ki in bezwen ekout sa *speech* 2erdtan ekek ki Prezidan in fer 2 fwa. In sey rod lipou lo lezar Mr Speaker, me malerezman pou li mon pa tro sir si in zwenn okenn.

Onorab Gabriel in sipliy avek nou pou aret met politik dan tou keksuz. Selman i ti parmi bann ki ti aplodi ler enn zot aktivis ti pe ankouraz zot bann siporter pou al fer politik dan landrwa travay dan enn zot bann *meeting*. E sa politik dan travay Mr Speaker, zot pe fer. Apre ler aksyon i ganny pran zot kriy viktimizasyon.

Mr Speaker, mon'n deside pou en bon parti mon diskour la apre midi pou repas lo sa ki'n ganny dir pou fer nou pep vvar se ki se zans in bit vre. E nepli annan nanryen pou ofer sa pep, apart zis mansonz, negativite e politik bon marse.

Tel parey nou'n tann koz lo limite, se Onorab Lemiel ki'n koz lo limite. I byen, me sa ki pa byen se bann menm dimoun ki pe pres limite se zot menm bann pli gran arsitek divizyon.

Zot menm zot ki zot bann *leaders* in touzour servi divizyon politik koman zot stratezi prensipal pou diriz sa pei, depi ki zot ti vol pouvwar an 1977.

Diviz sa pep dan 2 group ek nou pa ek nou, kot sa travay ti ganny fer dan distrik dan sa ki zot ti apel biro brans sa letan. E la Mr Speaker, sa nouveau zenerasyon ki la i vin koz lo limite. Selman zot osi zot fer tou le kontrer Mr Speaker.

Kote zot lespri linite ti ete? Sa linite ki zot pe koz lo la, ler zot ti deside antre dan mon distrik Cascade apre leksplozyon *CCCL* pou vin profit lo soufrans mon bann zabitan *Petite Paris* e *Brilliant* pou vin fer zot bann politik sal, zis pou esey score bann pwen politik.

Sa mo linite pa ti egziste sa zour? Ziska avek *plywood* zot ti vin fer politik. E sa i fors mwan pou demann zot oli zot lanmour prop Mr Speaker? Eski koson in manze? *Come* dir mon defen gran manman.

Zot ti'n devret omwen annan sa kouraz e grander lespri koman bann swadizan *leaders* e apre tou, koman bann koleg *MNA* pou montre zot solidarite, prenon kont lanpler sa catastrof Mr Speaker.

Si zot ti vreman anvi Pratik linite e solidarite olye zis koz lo la. Zot ti ava omwen swazir pou met nou diferans politik 2 kote pou sa moman letan. E inifye nou zefor pou vvar ki mannyer ansanm parey enn zot moto lepase ti dir "*Together*" nou ti pou kapab travay pou soulaz soufrans bann zabitan *Brillant* ek *Petite Paris*.

Me pou dir laverite Mr Speaker, zot aksyon pa'n sirprann mwan. Akoz nou tou nou konnen ki politik e laswaf

pouvwar in anvair zot nanm. E se sa ki'n pouz zot pou ofer led zis zot siporter olye ed nenport zabitan ki ti dan bezwen.

Organiz protestasyon olye fer bann viktim konpran ki pei pe fer son mye pou ede fas a lanpler en tel kalamite e ki i enportan pou montre gratitud pou sa ki pe ganny fer.

Mank respe pou sa fanmir ki ti pe anter zot ser defen sa zour zis akoz zot laswaf pouvwar. Pas partou rod dimoun pou vin koz mansonz lo *camera*. Call serten zabitan pou sey fer zot vin kritik Gouvernman, e dir en bann mansonz ki lakaz zot manman pa pou ganny aranze, e en bann lezot kalonmni ankor. Tou sa bann dimoun in *call* mwan in dir mwan egzakteman kwa ki zot in dir. Lekel ki ti *call* zot.

Servi serten zabitan san zot konsantman dan zot dan zot bann *video* mansonz kot sa fanmir ti bezwen *call* zot, e menase pou pourswiv zot.

Mr Speaker, sa bann zans in fer en kantite avek sa catastrof le 7 Desanm. E mon pou dir ki zot in menm fer tro bokou. E la mon pou dir Onorab Aglae atraver ou Mr Speaker, ki se pa sa Gouvernman *LDS* ki'n *fail* zabitan Cascade. Me se ou, ek

ou parti ki'n *fail* sa bann zabitan.

(APPLAUSE)

HON PHILLIP MONTHY

Olye zis asize kritike, kontribye zis R200 mil dan sa Fon le 7 Desanm ou parti ti'n kapab fer bokou plis ki sa si vreman zot ti annan zentere Seselwa a ker.

Lakonpannyen *Airtel* in volonterman swazir 3 lakaz anba dan Parson pou zot repare. Sa menm Parson *Estate* ki zot sef in mansyonnen la anndan. Kot zot kontan ale pou fer zot politik e kot zot ti menm dir ni en vot mon pa pou gannyen. E la mon pou dir zot byen kler Mr Speaker, tat zot dilo!

(APPLAUSE)

HON PHILLIP MONTHY

Sa led lakonpannyen *Airtel* Mr Speaker, in ede pou fer travay bouz pli vit, e pou sa mon remersye zot Mr Speaker.

Koman en parti ki'n fek anmas plizyer milyon avek lavant bann propriete ki zot in akimile zot ti'n kapab omwen swazir zot osi detrwa lakaz. Menm si zot ti a swazir serten zot bann siporter *hardcore*, me omwen zot ti ava pe ede fer zot par pou repar sa bann lakaz.

Me Mr Speaker, parey nou konnen kot larzan i konsernen sa bann zans i serye. Parey Onorab Bistoquet fek fer nou rapel pli boner.

Zot koz zoli parol, me ler pou zot met zot larzan kot zot labous i ete. Oubyen Onorab, labous kot larzan i mete, ki mannyer i dir sa? Mon'n en pe bliye. Zot *fail* sa pep e, *fail* zot detrwa siporter Petite Paris ki zot in kapab ede Mr Speaker.

Mr Speaker, mwan koman *MNA* distrik Cascade, sa distrik kot mon'n grandi e ki mon kontan bokou. Mon larm in koule dan sa 3er bomaten.

Wi mon reste Anse Royale. Mon'n kit Anse Royale 3er ekek bomaten mon'n ariv Cascade mwan. Ler mon ti debout devan lakaz Mrs Dolores Larue e pe get lo mon kote gos pou vwar lakaz defen Roland ki ti zis en ta debri.

E lo mon kote drwat mon ti vwar lafanmir Ah-Koon pe regard zot lakaz kot zot in pas tou zot lavi ki ti'n pratikman detri. Sa bann moman pou mark mwan tou mon lavi, tel parey tou bann viktim ki ti pe dormi trankilman dan konfor zot lakaz pou zot osi ganny marke pou lavi. Akoz sa soufrans ki zot in pas ladan i tro bokou Mr Speaker, e zot pa'n demande.

A en serten moman ou ti krwar ou dan en rev, akoz en tel sityasyon ziska prezan zabitan Petite Paris e Brillant ti'n vwar zis dan film. Me Mr Speaker, nou'n gard nou sanfrwa e travay in ganny fer pou ki nou kapab soulaz soufrans nou bann zabitan.

Tou bann lazans Gouvernman konsernen, in lo teren depi premye zour. Sa bann marmay *planning* ki deswit in komans fer bann vizit. *Local Government*, bann DA enkli mon DA Cascade.

Mon bann aktiv, mon *clerk*, SIA ki ziska prezan lasyet Mr Jitesh Shah e Mr Keith Arnephy i ankor plen. Bann NGO ki'n vin ede, bann kontrakter ki'n vin ede lo komansman lo en baz *pro bono*.

Bann zabitan Cascade ki'n vin aport zot led, Lapolis, lasante e sa plizer biznes e volonteer ki'n vwar li zot devwar pou aport zot kontribisyon a sa moman, olye zis asize kritike.

Lo lapar tou zabitan Cascade mon remersye zot o fon mon leker Mr Speaker.

(APPLAUSE)

HON PHILLIP MONTHY

E mon pa pou bliy mon bann koleg MNA Mr Speaker, ki zot sipor e led in donn mwan sa

lafors pou kontinyen sa travay difisil. Son Sanmdi plizer zot ti vin ede pou vizit bann zabitan pou kapab donn zot, konn zot bann bezwen.

E parmi, parmi Mr Speaker, ti mon ansyen koleg MNA defen Onorab Rosie Bistoquet. Ki ti la li osi ozordi, sa zour pou ede parey son labitud. Mersi Onorab, kot ou ete mon krwar ou bezwen pe tann mwan.

E napa okenn mon koleg Mr Speaker, ki ti dan en lenz politik parey li sa parti US ti fer preski 3 semenn pli tar. Abiye an rouz kot zot bi sete pa pou vin ede, me pou profit lo en sityasyon dezas pou vin rod *mileage* politik lo soufrans bann zabitan.

Mr Speaker, Prezidan Ramkalawan in lo teren depi premye zour e ansanm nou'n vizit plis ki en karantenn lakaz, kot parfwa ziska 8er diswar nou'n devan laport zabitan.

I pa drol Mr Speaker, menm apre pas partou dan distrik ek en portvwa konmsi pe vann karang pou fer dimoun desann. Olye 10 mil dimoun parey zot ti dir, zot ti ganny apenn en santenn dimoun dan zot swadizan demonstrasyon kot laplipar sete bann dimoun lezot distrik ki ti vini pou vin fer ta bel.

Sa travay Cascade Mr Speaker, in en travay lekip depi lo komansman. E menm si en kantite in ganny fer, kontrerman an sa ki sa parti US i oule fer nou krwar travay i kontinyen.

Ler US pe dir sa Gouvernman *LDS* in *fail* zabitan Cascade, mon pou dir zot sa. Dan 177 *flat PMC* ki ti'n andomaze 175 in fini ganny repare. E zabitan pe reste kot zot dan zot lakaz, menm si i annan detrwa pti rektifikasyon pou fer.

Dan 364 lakaz prive andomaze 193 in fini ganny angaze par lazans konsernen. E travay in fini konplete lo 47 lakaz, sa zis dan 2 mwan edmi Mr Speaker.

E la mon pou profite pou lans ankor en lapel avek okenn zabitan ki lakaz pa ankor ganny repare, pou rod zot kontrakter. E si zot pa konn okenn, pran kontak avek nou e nou a fer zot ganny bann kotasyon pou domaz ki zot lakaz in sibir e Gouvernman i peye pou reparasyon ganny fer.

Sa i fer travay bouz pli vit. Nou pa anvi e i pa lentansyon pou kit personn deryer pe enport ou lopinyon politik Mr Speaker.

(APPLAUSE)

HON PHILLIP MONTHY

20 lakaz pe al bezwen ganny demolir e rekonstri. E tou sa bann *homeowners* in fini ganny angaze. *Ceiling* ki Gouvernman in mete, se R1 milyon. Travay dan sa laliny, avek sa 20 *homeowners* in byen avanse Mr Speaker.

98 demann pou *sliding doors* ek lafnet, ladan 95 in fini ganny aprouve pou peyman. Mon konnen i annan serten zabitan pe esper en repons, mon'n lyez ek *SIA*, plizyer sa bann kotasyon i kot Finans.

Tre byento laprouvassyón i ganny donneñ e peyman i a ganny fer. En pti gin pasyans ankor silvouple.

R21milyon75mil sorti dan fon lazans proteksyon sosyal in ganny peye ek 843 endividé koman en led pou ed zot redrese dan sa moman difisil. Eski sa i en Gouvernman ki'n *fail* son zabitan sa?

Me parey nou konnen i reste ankor en kantite lakour pou fini ganny repare, e se sa ki US pe fer politik avek. Lekel sa Gouvernman ki pou kapab repar 500 ekek lakaz dan 2 mwan edmi? Zot? Kekfwa Mr Speaker, si zot al tir zot sorsye dan kaso laba, zot a kapab fer li.

Sa i zis en lekspektasyon ki pa realis, e mwan mon an kontak ek mon zabitan depi premye zour Mr Speaker. E mon konn zot soufrans. E mwan osi mon pe esper sa zour ki zot lavi i retourn parey i ti ete avan. Akoz osi lontan ki zot lakaz pa ankor repare, mon telefonn i kontinyen sonnen tou le 5 minit. E mon travay i vin pli difisil. Me avek lagras Bondye Mr Speaker, Cascade pou refer.

Ler mon pe terminen lo sa size CCCL, mon annan sa pou dir. Depi premye zour Mr Speaker, mwan mon'n sibir plizyer lensilt osi byen ki Prezidan. Kot ennler ou a krwar nou ki'n mont anler CCCL pou al met sa bonm ki Onorab Lemiel in koz lo la.

Me sa i pa'n en problem pou mwan, akoz mon mars mon latet anler dan mon distrik mwan Mr Speaker. Mon pa fer *photoshoot* sak fwa ki mon ed en zabitan.

Akoz si mon ti fer sa, *Facebook* ti pou deborde. Me ki mon pe demande, se ki osito ki posib Lotorite konsernen, i devret donn nou en *update* lo lenvestigasyon ki pe ganny fer. Akoz mon bann zabitan i merite sa bann lenformasyon. E zot bezwen ganny dir lekel ki responsab pou boulvers zot lavi anba lao.

E kot sa ki'n ganny trouve responsab, zot a bezwen ranpli zot lobligasyon anver sa bann zabitan. E kot si i neseser pou pey domaz, domaz i a bezwen ganny peye.

E la Mr Speaker, mon pou profite pou koriz en fo lakizasyon ki Onorab Cosgrow in fer. Gouvernman pa pe fer zabitan siny okenn kontra ki pe dir zot pa pou ganny dwa pourswiv Gouvernman, si zot pran larzan.

Sa kontra i pou reparasyon lakaz, me pa pou konpansasyon. Si apre ki lenvestigasyon in terminen, i montre ou ki se ki Gouvernman ki responsab, Gouvernman i a ganny pourswiv si i annan domaz pou peye Gouvernman i a pey domaz sa bann viktim. Annou aret *mislead* sa bann zabitan.

(APPLAUSE)

HON PHILLIP MONTHY

Mr Speaker, menm si sa sityasyon CCCL in pran presedans lo travay dan distrik, travay pou enplimant lezot proze distrik i kontinyen.

Pou sa lannen nou annan en lalis 13 pti proze distrik, ki konpri 6 proze semen. E plizyer ladan bann zabitan pe espere depi en leternite. Plizyer *bin*

site, drenaz e foot path, outdoor play facilities e lalimyer kot i manke ankor e nou'n deza met en kantite. Me mon enplor bann zabitan si i annan okenn landrwa dan zot sou distrik ki mank lalimyer pran kontak ek nou, fer nou konnen.

Mon pou lans en lapel Mr Speaker, avek serten zabitan pou azir konsyansye e donn *wayleave* kot neseser pou ki nou a kapab enplimant serten sa bann proze pou soulaz soufrans nou bann ser ek frer.

I annan plizyer proze semen nou anvi fer, me *wayleave* i en *issue* e sa bann proze pa kapab demare san sinyatir sa bann *homeowners*. *Resurfacing* bann semen segonder i kontinyen, e sa lannen nou sipoze fini *resurface* tou sa ki pa ankor ganny fer.

Sa pti laplenn anler *upper Cascade* kot marmay ti zwe foutbol dan labou in preski konplete. Nou demann sa bann zenn pou zis annan en pe pasyans esper zerb byen pran avan zot a kapab komans servi.

Laplenn Anse des Genets Mr Speaker, Phillip Monthy pa'n pran okenn laplenn Anse Des Genets, Phillip Monthy pe repar sa laplenn Anse Des Genets ki zis zerb ti ganny koupe avan eleksyon e fer politik avek. Byento zot pou

vwar en diferans avek sa laplenn anler Anse Des Genets.

Proze semen anler anba tanmaren Petite Paris pe al komanse. E sa proze drenaz ki nou'n fer pou annan son dezyenm faz, e deza menm si delo in antre dan lakour en madanm akote. Sa drenaz ki nou'n fer pre R100 ekek mil in ede pou minimiz lenpak ki sa *flooding* in annan lo sa lakaz Mr Speaker.

Travay lo sa *32-unit mid-range condominium*, anler kot masin koltar ti ete pe al demare. E dezyenm faz proze *social housing* Vilaz Zanblon pe al osi komanse. 2 blok *flat* kot vilaz *ex SLTA* pe al ganny en novo kous lapentir. Kantite pe arrive dan Cascade Mr Speaker. E sa san bliy konstriksyon nou novo Sant Kominoter ki zabitan in espere pou plis ki 10an.

Mr Speaker, sa ki mon'n pas ladan dan sa bann dernyen mwan ki'n pase in fer mwan en keksoz. Tou sa lensilt, mansonz lo *Facebook*, blanm e menm menas. San pran kont sa kantite travay ki'n devan nou kot si ou pa ti solid, ou ti pou kapab tonbe.

Tousala in fer mwan en keksoz, in fer mwan vin pli for ki zanmen. E in donn mwan...

(APPLAUSE)

HON PHILLIP MONTHY

E in donn mwan rezon pou kontinyen travay dir pou mon bann zabitan e mon distrik, e pou touzour, e touzour fer mon mye pou fer sa ki byen.

Mon apresye sa kantite lapriyer ki plizyer mon bann zabitan sak fwa zot zwenn mwan zot dir mwan zot pe fer pou mwan. E sa bann osi ki *text* mwan bann mo lankourazman. Parey koze i dir “*who God bless, no man curse*”.

E se sa ki donn mwan lafors pou kontinyen e inyor tou sa bann tapaz initil e *teat* ki pe pase otour mwan. Ler mon ti deside pou zwenn politik, mon ti fer li akoz mon ti krwar dan prensip sa zom ki pe asize anler *State House* e dan sa parti ki apel *LDS*.

Mr Speaker, mon krwayans dan sa bann prensip pa'n sanze. Me o kontrer in vin pli for, pli for e determinen pou ede fer mon par pandan sa moman ki gran met in met mwan la lo sa later pou fer sa diferans.

E lalit kont sa bann fo profet ki oule vin abiz konfyans sa pep. Vwale pa en opsyon, akoz bann fo profet pe veye e fer tou pou derout nou. Pou zot

kapab sant laglwar apre lo lasyer sa pep.

Ozordi in plis ki zanmen pou tou sa ki'n lalit pou sanz en sistenm ki'n fer sitan ditor sa pep pou nou renouvre nou langazman. E kriy byen for, ki nou pa pou zanmen, e zanmen les tonbe! Mersi Mr Speaker.

(APPLAUSE)

MR SPEAKER

Mersi. Mersi Onorab. Mon a pas laparol Onorab Gervais Henrie.

HON GERVAIS HENRIE

Mersi pou laparol Mr Speaker. Bonn apre midi tou dimoun, espesyalman zabitan Mont Buxton.

En pei dinamik e konplike ki'n akonplir bokou malgre bann defi. En landrwa kot nou bezwen gard limite, e kot napa diskriminasyon. Menm ler nou pti, me nou en dirizan dan lemonn.

3 fraz Mr Speaker, mon'n note dan mon *diary* lo paz Zedi 22 Fevriye. Sa 3 fraz i parol Prezidan Larepublik Mr Wavel Ramkalawan ki rezim son evalyasyon lo Leta nou Nasyon.

Sa diskour pou mwan ti en lapel, en lenvitasyon, en propozisyon e en provokasyon limazinasyon Lepep Seselwa.

En lapel pou nou vin ansanm koman en nasyon.

En defi pou limazinasyon en nouveau zenerasyon Seselwa pou komans de nouveau koman en pei. E transform nou menm koman en pep. En refleksyon o profon, 2an avan nou selebre nou 50eme lanniverser Lendepandans an 2026. Lo nesesite annan en lanbisyon Nasyonal.

En lanbisyon ki menm ler nou pti, nou kapab vin en gran nasyon. Malerezman Lopozisyon komansman par zot dirizan isi anndan, e lot laba deor pa'n konpran en sou mesaz Prezidan. Ouswa zot telman visye, ki zot determinen pou anbet e konfiz Seselwa.

Mr Speaker, pou nou koman en pti pei vin en gran nasyon i pa konplike nou senpleman bezwen travay ankor pli dir.

Disi lannen prosen nou pou'n viv en kar sa syek ki nou ladan. E pour sa prosen 75an, ki mannyer nou pou anmenn nou lavi pou nou grandi ansanm koman en nasyon. Si nou napa en lanbisyon, ki pou arive avek nou legzistans koman Seselwa? En nouveau zenerasyon Seselwa dirize par lazences, fodre zanmen les sa lapel vin en slogan dan vid.

En pti pei ki en gran nasyon i en lanbisyon nasyonal anbisye. Me si nou tou nou koste, travay ansanm ver sa misyon tou fasad Sesel pou sanze pou le meyer.

Sesel an 2024 i annan bann konponan esansyel dan son devlopman pou batir lo la pou fer nou vin sa gran nasyon. *LGB*, in rezim sa byen letan i ti rapel nou ki nou annan en demokrasi vibran, en lekonomi solid e en Gouvernman angaze.

Me mon krwar ki pli gran aki ki nou annan koman en pei an se moman, se en Gouvernman ki pe promouvwar lide, Sesel pou tou son zanfan.

Sa i en filozofi profon kot *LDS* pe anmenn en transformasyon, dan ki tou dimoun i ganny rekonnet e ganny menm loportinite. Ou pe ganny envite pou vin parti solisyon, olye lakoz plis problem.

I en lapel pou responsabilite e ou volonte pou deservi ou pei. Akoz ler en keksoz i pou ou, ou pran swen avek li, ou protez li e servi li byen.

Sesel i ou pei, e Prezidan i oule ki ou pran swen avek li pa zis pou ou me osi ou zenerasyon fitir. Sa filozofi i egalman enportan, akoz i vedir ki bann drwa parey Drwa Rasambleman

e Laliberte Lekspresyon, sekirite pei e bann benefis ekonomik avek sosyal pou nou nasyon i ganny prezerve.

Eski nou pran kont Mr Speaker, ki mannyer sa prensip, Sesel pou tou son zanfan, avek ladopsyon sa prensip, nou'n reisi elimin doktrin ek nou, pa avek nou.

E osi sa enfame *security clearance* kot lapartenans politik ti determinen si ou ganny akse avek lasistans e servis Leta. Ler nou konstat bann pozisyon e stati Sesel lo plizyer lendeeks enternasyonal, nou dwatet annan tou rezon pou selebre e apresye lefe ki nou reputasyon pe deza grandi koman en gran nasyon.

Lo Lendeeks Persepsyon Koripsyon nou 20enm, gal pou gal avek Langleter e *La France* 2 pwisans Eropeen ki'n koloniz nou.

Lo Lendeeks Developman Imen nou dezyenm pei Afriken lo sa lalis.

Nou paspor i an se moman klase 25enm pli pwisan dan lemonn, kot Seselwa i kapab antre san viza dan 155 destinasyon.

Lo rapor demokrasi 2023, Sesel i liste koman le sel demokrasi liberal dan rezyon Sib Saharan, e klase 35enm parmi 139 pei.

Lo Lendeeks Laliberte Imen 2023, Sesel i 40enm ki menm pozisyon *Singapore* i ete. E sa i osi premye dan Lafrik.

Global Finance Magazine an Zanye sa lannen, ti klasifie Sesel koman pei pli ris lo Kontinan Lafrik. E ki osi annan pli o *GDP* lo sa kontinan.

Tousala i montre klerman ki koman en pti pei, nou pe fer bokou pou nou vin en gran nasyon. Kondir mon frer Onorab Zialor, sa i pozitivite. Sa i lapresyasyon Lepep Seselwa Mr Speaker.

Letan mon konstat sa levantay topik Prezidan in aborde, mon vwar i determinen pou fer nou reflesir lwen. E enfliyans en transformasyon profon dan striktir sosyal, politik e ekonomik Sesel depi la konmela menm.

Si mon fer en tourdorizon sa bann size, i enkli leksplikasyon lo ki si sa Gouvernman?

Nesesite kree bann lenstitisyon ki for.

Lapel pou nou popilasyon konn eksprim son lopinyon.

Rekonnet nou drwa koman en sitwayen e aksepte ki i vin avek responsabilite.

Pledwari pou rezet koripsyon, pou adopte kiltir travay koman premye pa dan lavi. Pou pa servi drog koman

en eleman politik, pou adopte laverite koman en pilye gouvernans. Pou rezet politik popilis e adopte prensip kritik, kritik konstriktiv.

Finalman, pou nou tonm dakor ki malgre pti ki Sesel i ete, nou kapab vin en gran dirizan dan lemonn. Pou mwan sa konversasyon ki'n komanse isi anndan Zedi pase, pe met fondasyon lo en nouveau model Gouvernans dan nou pei e sa i fer mwan eksite.

Pou tro lontan nou'n annan en kiltir polarizasyon, ki bann kote ki opoze in vwar koman bann lennmi ki fodre ganny eliminien.

Sa in afekte nou demokrasi e lepanouisman koman en nasyon. Ozordi nou pei i dezespere pou vin ansanm, lo bann size ki konsern legzistans nou nasyon dan en lemonn globalize. Tel ki ladefans nou pei, nou relasyon enternasyonal, kestyon sanzman klima e proteksyon nou lanvironnman.

Nou demann pou ladopsyon Lendeks Vilnerabilite avek Milti-dimansyonnel Lekonomi Ble, leksplorasyon petrol pou nonm enn de. Sa bann size i konsern nou lavenir koman en nasyon e legzistans nou pep. Diskour lo Leta Lanasyon Prezidan ti premye

depi ki Komisyon Laverite Rekonsilyasyon e Linite Nasyonal (*TRNUC*) ti prezant li rapor an Avril 2023.

Nou'n antann sorti kot Sef Deta, lo lapar leta Sesel leskiz solannel e santiman profon regre. Silans Lopozisyon par kont, i tro for pou nou pa tandé. Sinifikasyon e leskiz Leta lo nou lagrandisman koman en nasyon, fodre nou pa souzestim li.

I pe ofer nou en sans pou re-egzamin listwar nou pei. Sel opsyon pou Sesel, se asire ki zanmen ankor Leta i responsab pou detansyon ilegal san reprezantasyon legal.

Legzil forse e deportasyon aletranz, mert, lasasina, e disparisyon. Akizisyon ilegal propriete avek later, vyol, tortir, bate e arselman politik.

Ganny refize loportinite, ledikasyon avek lanplwa. Entimidasyon e labi pouvwar an bonn a vini par Larne, Lapolis e bann zofisyen sinyor dan Gouvernman a tou nivo.

Mr Speaker, enn bann sekter ki fodre atantiv avek nou lanbisyon nasyonal se nou Sekter Lanplwa. Mon oule felisit sak Seselwa ki leve tou le bomaten e travay dir pandan en lazournen. Wi, sa felisitasyon i pou ou ki travay

konsyansyezman parey Lartik 40 nou Konstitisyon i demande.

Felisitasyon sak travayer Servis Piblik, bann dan Sekter Prive e osi paraetatik. Bann dan lorganizasyon non-profitab e osi relizye dan bann Lenstitisyen Konstitisyonnell, san oubliy bann ki *self-employed*.

Travayer i zwe en rol enstrimantal pou asir progre kontinyel dan lekonomi nou pei. Letan Prezidan i enform nou avek lafyerte ki nou lekonomi in grandi par 3.3poursan an 2023.

Tousala in vin akoz kontribisyon sakenn de nou ki pe debourye. Mon anvi pran en moman e fer ou realiz ou lenportans pou nou pei. I enportan nou fer sa akoz wi mon krwar letan Prezidan i koz lo sabotaz ouswa trenn lipye dan travay, sa danze i touzour la.

Dabor mon oule dir ou mersi, pou travay ki ou fer toulezour. Sa i bann latas ki enportan pou protez sekirite nou pei avek nou lafrontyer. Pou ki nou bann zanfan, bann dimoun aze e group vilnerab i resevwar lasistans e sipor neseser.

Ki servis delo, elektrisite, telekomunikasyon e transpor i kontinyen fonksyonnen. Ki nou

pei i annan sekirite alimanter, lasante e ledikasyon nou pep i devlop plis, ki lape avek sekirite i rennyen dan nou kanton.

Me pli enportan ki nou kontinyen viv dan en leta normal ki malgre son grander e pti popilasyon, larestan lemonn i vwar li *cool* pou Sesel form par zot frekantasyon.

Pour bann travayer Servis Piblik spesifikman, ozordi i annan legzistans en klasifikasyon lefikasite bann Gouvernman atraver lemonn ki en site web apele theglobaleconomy.com i pibliye anyelman.

Lo son dernyen piblikasyon 2022, Sesel i klase 46enm parmi 193 pei. E sa i met nou 2enm dan lefikasite gouvèrnans lo Kontinan Lafrik. Sa i dir nou ki lespas i la pou fer ankor progre e amelyor lefikasite nou Servis Piblik ki kapab amelyore atraver *training* kontinyel.

Lo sa note Mr Speaker, mon ti a kontan dir avek en serten Onorab dokter konn tou. Ki napa naryen mal pou kontinyelman ranforsi nou konesans e nou'n ganny nouvo bagaz.

(APPLAUSE)

HON GERVAIS HENRIE

Dan lavi ou toultan pe aprann, napa naryen dezoner ladan. Sa ki mal, se ki ler ou krwar ou pe abes Gouvernman ou pe osi maltret personnelman sa bann PS avek CEO.

Letan mon regard sa group 27 dimoun ki ti al *Abu Dhabi*, laplipar zot ti dan bann o pozisyon depi ansyen Ladministrasyon. Alor akoz zis 3an apre ki US in perdi eleksyon, ou vire e kestyonn konpetans sa group dimoun.

Eski ou'n pran kont ki parmi ti menm annan ki ou ansyen Prezidan ti oule apwent koman Minis? Ou latak lo sa group dimoun pa ti neseser e apropriye. Anka ou'n blyie an 2007 ti annan *Seychelles Young Leadership Program*, ki ou parti ti servi pou recruit MNA ladan.

Servis Piblik i en zengredyen esansyel dan tou sikse e febles Sesel koman en Leta. Akoz tou keksoz ki annan pou fer avek devlop pei, e delivre servis ek popilasyon i depan lo performans travay bann fonksyonner piblik. Letan ou'n swazir pou vin travay dan sa sekter, eski ou konsyan ki ou'n fer li pou ou kapab form parti masin ouswa leker nou Lenstitisyen Leta?

Se sa ki fer ou travay nob, se sa rezon akoz *public service* i enportan. Parfwa Servis Piblik i

pri dan bann batay politik e ou kapab trouv sa, pa zis. Me nou koman politisyen nou pe senpleman ankouraz zot pou fer plis inovasyon, vin pli kreativ e fasilit bann devlopman dan lavi nou bann voter.

Sa ki'n ganny konfyen bann pozisyon dirizan, i devret pe angaz zot avek bann partener e konvenk zot travayer pou fer plis avek mwens reponn bann demann pli vit, fer zot servis pli soutenab eksitera.

Avek en popilasyon ki pli byen enformen, Seselwa pe ekspekte plis avek sa Ladministrasyon ki zot in fer konfyans dan dernyen eleksyon pou delivre a zot bezwen dan en fason pli byen e pli efektiv.

Koman parti sa transformasyon ki LDS pe anmennen, nou pou kontinyen siport e akonpanny nou Servis Piblik. Me fodre zot osi zot sezi sa ki pe arive.

Mr Speaker, nou pa pou fer parey Lopozisyon, kot nou pou kadase, maltrete e abes bann travayer Servis Piblik ki leve tou le bomaten al debourye.

Legzanp fason ki zot tou zot in reazir avek nou Sekter Lasante. Wi i annan bann defi ki fodre nou adrese seryezman koman en Lenstitisyen Nasyonal.

Me nou pa abese, akoz apre tou se nou bann *partner*, nou bann fanmir, nou bann zanmi, nou bann ansyen koleg lekol, nou bann vwazen e nou bann voter. San oubliy dimoun ki reste dan bann distrik ki nou reprezante isi anndan ki travay dan sa bann lenstitisyon.

E ki mannyer ou ekspekte poudir ekspekte santi zot koman imen letan nou tann sa bann kalite komanter sorti lo kote Lopozisyon, avek lo lasante. Kan sa bann dimoun zot dan *care business* depi bomaten pe sov lavi. Sa bann kalite komanter i pa ti apropriye e vreman abes Seselwa.

I mon swe Mr Speaker, pou vvar Gouvernman adopte plis bann platform nimerik pou ofer servis adopte meyer sistem komunikasyon, pou pas lenformasyon avek lepep. Servi plis rezo sosyal, pou angaz avek sitwayen. Kontinyen devlop bann zouti zesyon performans pou mezir e amelyor kalite Servis Piblik. Envestir ankor plis an term teknozi, lantrennman e resours imen dan bann sekter kle parey ledikasyon, lasante, sekirite, lanvironnman, lagrikiltir avek lapes parmi lezot.

Ler nou ofer sa bann kritik konstriktiv, sa pa ditou en litani problemm. E i lwen avek

sizesyon Lopozisyon ki en konplent lo linefikasite Gouvernman.

Koman bann dirizan dan kominote, nou pe senpleman rekonnet ki nou sosyete i ankor lwen avek perfeksyon. Me nou partaz swe nou Prezidan kantmenm nou pti. Wi, nou kapab vin en gran nasyon.

Mr Speaker, si nou fran avek nou lekor, depi eleksyon Oktob 2020 Ladministrasyon Prezidan Ramkalawan pa ankor ganny sa *luxury*, parey nou dir an Angle pou li gouvern pei avek lavites ki li i ti a anvi e osi avek mwayer ki ti a posib.

Akoz? Nou'n ganny elekte dan milye pandemik COVID-19. Konmsi sa kriz lasante piblik pa ti ase. Nou'n vvar 2 lager deklare sak kote nou e zekli bann gro zarm lour avek leksplozyon *bomb* in sekwe nou pti lekonomi.

Pou azout disel dan nou blesir, bann rebel *Houthi* sorti *Yemen*, in deside donn zot bal dan Lanmer Rouz. Leksplozyon le 7 Desanm kot CCCL, Petite Paris, Cascade ki US pe dir ti en bonm ti konpletman enprevi.

Me Prezidan Ramkalawan, in pran sa bout responsabilite dan en fason brav. Avek pros R50milyon, in deza ganny angaze e sa sonm pe kontinyen ogmante. Mon frer Onorab

Monthy, in osi prouve ki Cascade in byen swazir li koman MNA. E mon dir li felisitasyon, pou son travay dir.

(APPLAUSE)

HON GERVAIS HENRIE

Zis parey Onorab Arissol, Onorab Esparon, e Onorab Hoareau zot in fer byen dan nor Mahe.

(APPLAUSE)

HON GERVAIS HENRIE

Congratulation brothers and sister.

Leritaz parti SPUP, SPPF, Parti Lepep, avek US koman non selman bann move dimoun. Me osi bann move peyer i partou kote. E se nou Ladministrasyon ki pe bezwen finaliz konpansasyon PUC lo Praslin. Ki ziska prezan R11.3milyon in ganny peye.

Fungus kot Bibliotek Nasyonal ki ziska prezan R32.2 milyon in ganny peye. Kontaminasyon delo La Misère ki ziska prezan R39milyon in ganny peye, e ankor 39 in ganny prevwar - 39 milyon in ganny prevwar pou peye.

Masin koltar Petite Paris, ziska prezan 1.9milyon in ganny peye. E total Mr Speaker,

i fer R123.4milyon an konpansasyon ki'n ganny peye. Sa i ekivalan 120 *mid-range condos*, 3 lasanm ozordi ler nou pe koze.

Me nou bezwen osi pa oubliy ditor ki US e bann Ladministrasyon avan in fer en group dimoun dan nou soryete. Ki Komisyon TRNUC in dir serten i merit ganny konpansasyon.

Nou'n osi zwenn difikilte finansyel lakonpannyen Aeryen Nasyonal Air Seychelles ki ti dwa *Etihad* \$70milyon Ameriken. Me parey mon konan dir, anba LDS sa pei pa'n koule e i pa pou zanmen koule.

Ozordi lakonpannyen Air Seychelles pe kontinyen *flight the Creole Spirit*. Felisitasyon e remersiman spesyal pou tou sa ki ti enplike dan sa negosyasyon.

(APPLAUSE)

HON GERVAIS HENRIE

Mon pa pou kapab termin sa lalis leritaz det san mansyon bann *loan* ki Ladministrasyon lepase in pran e pa'n zanmen re peye.

Ozordi zenerasyon 40an, ki yer Onorab Labrosse ti pe koz lo la avek lafverte. Me ki pa ti ankor ne ler *loan* ti pran pe bezwen osi re pey *loan* Larisi, ki

date an 1980 e *loan* Lalibi date 1981.

Finalman, i annan sa problemm drog ki'n anzandre dan nou sosyete, e pe afekte lasante nou pep, devlopman, lape, avek sekirite dan nou pei.

I akoz tousala e lezot defi ankor, ki lezot MNA in fer resorti ki nou paradi i ankor lwen avek perfeksyon. Me ou ankor viv dan en pei kot ou annan lespas e drwa pou eksprim ou mekontantman avek serten Polisi Gouvernman ouswa menm aksyon, kondisyon ekonomik pei e bann size sosyal.

Me ou bezwen fer li. Sa ki nou'n ekspekte, ou fer li avek responsabilite.

Pou ou ki ti vot pou sanzman, mon priye ki ou'n sezi sa mesaz e pare pou donn son mesazer en sans. Mon promet ou ki i pe dousman, dousman transform Sesel dan en novo lepok pou vin en pei ki pli byen ganny gouvernen. Kot drwa sitwayen pe ganny valorize pou permet nou lekonomi kontinyen fleri pou asir byennet nou pep.

Letan nou ti tik anler an 2020, e vot pou sanzman ki sa ti vedir? La ki sanzman in arive, nou pa kapab reste a lekar. Krwaz lebra e konplent lo *Facebook*, fer *video* e komans vwale lo nou prensip. Nou'n

lager pou sa moman, alor nou annan en devwar e en responsabilite soutenir sa sanzman. Viv sa sanzman, ankouraz sa sanzman, konpran sa sanzman, e selebre sa sanzman.

(APPLAUSE)

HON GERVAIS HENRIE

Nou parti i annan en striktir, e nou touzour pe kominke lo fason pou rezourd problemm e amelyor sityasyon.

Si ou ankor krwar dan en meyer Sesel koman en aktivis sanzman, ou bezwen kontinyen milite ki sak sitwayen i garanti son plas dan Sesel. Ou bezwen ed li realize ki Sesel i pou li, pou batir. E pou li pou zwir.

Annou rapel parol ansyen Prezidan Ameriken Barrack Obama ki ti dir e mon site "sanzman pa pou arive si ou esper en lot dimoun, ouswa en lot moman. Se nou menm ki nou ti pe espere, se nou sa sanzman nou pe rode".

Nou koman bann aktivis sanzman nou bezwen sezi lenportans nou rol dan lakonplisman nou lanbisyon nasyonal. Akoz malerezman nou annan en Lopozisyon ki nou nepli kapab kont lo li pou nanryen, Mr Speaker.

Ozordi *taxpayers* Seselwa pe peye pou legzistans en Lopozisyon ofisyel, me nou pa pe ganny valer pou larzan. *They are not the real deal.*

Dan lespas 2 semenn zansla in *boycott* 2 fwa. Be nou bezwen koup lapey en kou mon krwar. Zot konfize lo lekel ki vre Dirizan Lopozisyon, Onorab Pillay ouswa Dokter Herminie? Zot napa okenn Polisi alternativ. Zot al lo *Facebook* e vvar ki bann dimoun ki ti siport *LDS* an 2020 pe koz lo Trete *WHO*, koup pye dibwa Beau Vallon, touy lisyen eran. Zot anmase anmenn isi anndan e dir nou se sa Leta nou Nasyon.

Zot napa respe pou personn enkli Prezidan, Mr Speaker, nou Lasanble Nasyonal, Sistem Zidisyer, Kominote Kor Diplomatik e lentelizans Lepep Seselwa.

Zot azanda se politik popilis, fer per, propaz fo lenformasyon e mansonz. Zot dir nou pri lavi pe pet plafon. Levidans i montre ki an Desanm 2020, to lenflasyon ti 8 poursan. Ozordi i 4.2 poursan, ki 4enm pli ba lo Kontinan Lafrik.

Zot dir Gouvernman pa efikas. Solman sa Gouvernman in tir Dolar sorti R21.00 e Euro R26.00 an Desanm 2020, e fer

desann pou ariv R14 e R15 respektivman an Fevriye 2024.

Zot dir Gouvernman pa pe travay. Solman sa menm Ladministrasyon in redwir to mank lanplwa ant Desanm 2020 a Fevriye 2024.

Zot dir Gouvernman in *fail* pou elev nivo gouvernans, selman laprev i ki Sesel i enn bann pei dan lemonn zot zeson son marse karbiran pe pli byen ganny zere malgre lager *Ukraine*.

Pri lo laponp i stab ant R20 a R21 konpare avek laplipar pei Eropeen ki par lao R25 e menm ziska R35 Lanorvez. Nou'n fatige avek sa politik kot politisyen i mazin zis eleksyon.

Nou'n vvar Onorab Pillay vin avek en diskour konpanny, olye fer refleksyon lo lavenir nou nasyon. Erezman sa 10 diskour tir li, in fize avek zot parey zot bonn dan tant vakwa.

Sa kalite Lopozisyon i danzere pou Sesel. E sel opsyon e pou tir zot net lo lasenn politik an 2025.

(APPLAUSE)

HON GERVAIS HENRIE

Mr Speaker, mon pe envit zabitan Mont Buxton pou zwenn mwan. E ansanm nou a transform sa pti distrik dan

milye Mahe, koman pli zoli vilaz dan Sessel.

Mon dir vilaz akoz Mont Buxton napa mazorite bann lenfrastriktir ki tou lezot distrik dan pei i annan.

Mont Buxton nou napa lekol, klinik, kordgard, legliz, simityer, laplenn foutbol apard en vye biro Ladministrasyon Distrik. Nou napa lans, nou pa bord ek lanmer. Me nou labote naturel, i aki presye ki nou kapab retir bokou benefis lo la.

Mont Buxton i ofer meyer vi Victoria avek Nor Mahe. I annan en koleksyon santye fantastik dan montanny e son proksimite avek Victoria i rann li parfe pou touris e Seselwa sorti aryer, fer bann *cultural walks*, ki an retour i kapab enspir en levantay bann pti biznes kot lakour otour distrik.

Mon envit ou eksplor sa lide. E ansanm annou reve ki mannyer nou kapab fer Mont Buxton vin pli zoli vilaz dan Sessel. Malgre son volante, Lotorite Distrik pa kapab transform laparans Mont Buxton koman en zoli vilaz lo li tousel.

I bezwen sipor tou zabitan pou gard lapropte, viv dan leape aret fer vandalizm, mentenir bon vwazinaz. Elimin labi sibstans, selebre leritaz ek tradisyon, promouwvar lespri

volontarya e ankouraz lespri sportif e konpetitiv.

Si nou sezi loportinite, e devlop nou prop lanbisyon pou Mont Buxton nou ava pe fer nou par pou kontribye dan lanbisyon nou nasyon pou fer Sesel vin en gran nasyon.

Koman en *MNA*, an 2023 in annan en kantite proze mon'n inisy'e enplimante. An kolaborasyon avek *Mont Buxton Community Association* e biro Ladministrasyon Distrik an plis ki sa R740mil ki'n vote dan proze kominoter.

Atraver sponsorship *Lions Club*, *Lions Seychelles* en *bus shelter* in ganny konstri dan sant Mont Buxton ki'n permet distrik fer en lekonomi R150mil dan son alokasyon bidzeter 2024.

Nou'n enstal 10 ban kot bann *bus stops*, atraver distrik pou en sonm R44mil. Nou'n enstal bann siny direksyon kolore, pou en sonm R30mil. Nou'n komans enstal siny ki endik non bann *housing estate*.

Nou'n demar proze *Little Book House* avek lide enstal en pti bibliotek kot tou le *7 housing estate* dan distrik.

Nou'n komans netwayaz pou konstriksyon bann pti zarden piblik dan omwen 5 kwen distrik. Larzan pou tou sa bann proze pa sorti dan pos

taxpayers Mr Speaker. Me plito kontribisyon ki mon lofis an kolaborasyon avek *Mont Buxton Community Associations* in fer.

Mon profite pou remersye tou dimoun ki'n dan en fason ouswa en lot ed mwan. E mon envit larestan popilasyon Mont Buxton pou zot osi aprose, e donn en koudmen.

Mon donn mon langazman pou mwan kontinyen travay avek lekol *La Rosiere*, *Belonie*, Larivyer Anglez bann diferan lazans parey Lafors Defans Sesel, Servis Tenny Dife avek sovtaz. Lotorite Por, Lotorite Prizon pou met lapropte dan distrik.

Mr Speaker, mersi pou ou ki'n ekout mwan. Me avan mon konklir mon oule demann ou ankor enn fwa. Ki kalite Sesel ou anvi viv ladan a lavenir? Bondye in met 2 swa devan ou. Lo en kote i annan en parti ki anba son Ladministrasyon depi 1977 ziska 2020, in koz manti avek nou.

In vol propriyete sitwayen e osi leta, san oubliy bann byen larzan ki'n disparet atraver vol. Nou bann frer ek ser in ganny viktimize - (pardon). E diskrimin kont. In ganny bate, tortire, e touye, ganny anvoye an egzil pardfors e ganny detenir ilegalman.

Sa parti ozordi pa onte ki tousala in pas anba zot bann Ladministrasyon dirize par 3 ansyen Prezidan. E zot vin dir nou ki zot sel opsyon pou Sesel.

Lo lot kote i annan *LDS*, ki pe dir ou son vizyon pou Sesel i enkliziv. Kot tou dimoun i annan en par ladan, zis regard nou *Caucus* dan *Lasanble Nasyonal* nou reprezent sa zoli diversite Sesel.

(APPLAUSE)

HON GERVAIS HENRIE

Nou pe promouvwar responsabilite endividyle e kolektiv. Nou Gouvernman i atantiv e i reponn, nou pe pran bann desizyon e fer aksyon. E finalman nou Gouvernman i travay dan en fason efikas e efektiv.

Ki kalite Sesel ou oule, i depan lo si ou'n antann sa mo ki Bondye in soufle dan ou zorey. E sa mo se "transformasyon".

30 apre ki Bondye in teste pasyans, rezilyans, lafors, kouraz e determinasyon Prezidan Ramkalawan. Finalman i pe beni e delivre Sesel ver en nouvo komansman.

Me nou parkour ver en nouvo lorizon i fek komanse, e Bondye i ankor pe fassonn nou.

Avek en langazman pozitiv de lapar nou tou pou transform nou prop lekor, nou fanmir, kominote e pei mon konvenki ki sel opsyon pou Sesel vin en gran nasyon se avek *LDS*. Mersi Mr Speaker.

(APPLAUSE)

MR SPEAKER

Mersi. Mersi Onorab. Laparol pou Onorab Sandy Arissol.

HON SANDY ARISSOL

Mersi Mr Speaker. Mr Speaker, Manm koleg Lasanble *LDS* ki la prezan ki ankor pe travay, *staff secretariat*, tou zabitant Bel Ombre.

I en plezir e en loner pou ganny sa privilez anba en sistenm zis, drwat ek tou laliberte pou mwan kapab adres zot ozordi san okenn lafreyer.

Mon anvi, menm si bann kapon zot in taye. Mon anvi reasir tou bann Manm *US* Mr Speaker ki'n koze, ki pou napa personn lo *LDS*, dan *LDS* ki pou *resign*.

Zot ava pile, sote, gonfle, ronfle parey zot labitud, ziska zot glob i ava pete. Mon anvi profite pou felisit tou Manm *LDS*, pou zot diskour emouvan, pozitiv e ankourazan.

Zot in kapab adres bann konsern fran, san lafreyer, fer propozisyon e ankouraz pozitivite dan zot kominote.

Pli enportan, zot in ekrir zot prop *speech* zot menm e zot in lir li, tou sa ki zot in ekrir zot menm.

Mr Speaker, Oktob 2020 Seselwa ti pran en desizyon nob e zis. Seselwa ti donn *LDS* en gran mazorite dan eleksyon, en parti ki konpri plizer pti parti. Dimoun avek plizer kalite, differan lide, e en melanz kouler ek ras, differan relizyon. Linite dan diversite parey *motto* nou Lasanble i dir nou.

Sa sanzman! Sa linite! Sa i sa novo Sesel, sa i en meyer opsyon pou Sesel. Seselwa ti'n anvi en keksoz differan, en keksoz novo, en Prezidan elekte non pa en Prezidan koudeta ek disan. Pa en Prezidan pas baton, me enn ki ganny elekte par plis ki 55 poursan vot. Non pa 5 vot parey Roche Caiman ek son *MNA* in gannyen.

Letan i pe dir poudir zabitant Seselwa pe kriye, tir Ramkalawan Roche Caiman. Bannla pe dir zet li dan bin listwar ek son 5 vot e tir li.

Sa parti ki ti dan Lopozisyon, sete *LDS* ki ti pe fer bann propozisyon konkret sa letan, ti pe adres vre defi ki ti pe

partisip dan devlopman son pei. E ti pe siport Sesel ek bann Lalwa ki meyer pou son prop pep. Sa ki apel pozitivite.

Nou ti en Lopozisyon ki ti an konsiltasyon ek Gouvernman lo bann desizyon, parey piratri, lalit kont drog e bon Gouvernans. *LDS* sa letan koman en Lopozisyon serye nou ti pe kontribye pou sa pep ek nou pei.

Alors Seselwa ti met konfyans dan sa lekip, e met nou dan Gouvernman pou dirize, defann e protez sa pep. E Seselwa ti'n zet *SPUP*, *SPPF*, Parti Lepep, en group bandi bann move dimoun dan bin listwar.

Zot ti elekte lekip solid, determinen e pare pou anmenn Sesel dan en lot nivo. Sel meyer opsyon pou Sesel, se avek *LDS*.

(APPLAUSE)

HON SANDY ARISSOL

Ozordi nou vvar nou dan Lasanble, avek 2 parti politik. Nou lo kote *LDS* ki ankor pe travay ozordi e en lot US bann kapon ki'n taye.

En parti ki'n ganny akize pou disparisyon, mert, vol, koripsyon, entimidasyon, mansonz, e rikord met bonm. Vann zarm *Marlo* pou touy fanm ek zanfan. Vann nou

passport avek bann bandi, e la nou'n ganny konfirmasyon labitud bonm kot CCCL. Finalman zot in ganny akize pou sorselri. Vre larivyer i sivre kolin, mon bann zanmi.

Sa parti ki ti vin dan nou Lasanble zot koz lo viktimizasyon politik. Lekel parti ki ti entrodwir *security clearance*, pou anpes plizyer fanm ek zonm ganny en plas travay dan son prop pei.

Siporte par bann administrater distrik sa letan. Apre Onorab Spiro i ava vin koz lo sa msye tousel ek sa madanm Belonie ki napa en non. *Too little too late* Onorab Spiro! Ou'n ganny defet dan dernyen Eleksyon St Louis byento pou ganny en lot defet. Ou avek ou parti nou pou apel zot bann *United Siro*.

Sa menm parti ozordi ki vini ki koz lo la mor lafen, e zanfan pe soufer. Zot fer onte e kanmi e zot ava ganny kouraz ek lolas pou vin donn nou lesson. Zot letan in fini, Seselwa i nepli kontan zot, zot nepli krwar dan zot, sa vre leta nou pti pei.

Viktimizasyon, zot tou dan sa Lasanble zot fanm, zot zanfan, zot mari, zot manm fanmir ki travay dan Gouvernman i ankor pe travay

apre 4an. I apel viktimizasyon sa?

Sa parti i vin dan nou Lasanble Mr Speaker, e zot koz lo figir Prezidan. Me get sa ki pe koz lo figir Prezidan, get son figir li menm li. Menm neve i vin koz lo diagnosis ki dok-tonton in donn li lo Prezidan.

Parti ki vin koz lo linite, kestyon ki ou demande oli linite parmi zot menm? Letan zot ganny plezir dan rikord enn zot frer Onorab Aglae apre ki i ti'n dir i annan en laferm e parwaz son *recording* partou lo son plantasyon. Linite sa?

Sa menm Onorab Aglae ki'n fatige dir nou pep pe mor lafen, zanfan pe dormi vant vid. I dir nou olye pran manze ek *UAE*, akoz nou pa ti pran tol ek dibwa. Non! Ki ou ganny en konpran avek se zans Mr Speaker?

Later *US* in ganny vann, en bann in konn son pri. En bann i konnen kote larzan in ale, en lot bann in ganny *commission* akoz li ki'n byen negosye. Detrwa pe mirmire akoz li i pa'n ganny nanryen. Be eski linite menm sa?

Letan zot vin fer protestasyon Cascade, e ou get bann ki ti la, napa enn bann dimoun Cascade. Zis bann ki'n ganny promet plas Minis, Anbasader, Sekreter Deta, en

bann ek plakar, en bann pa vin ek plakar. En lot group li i refize partisipe, akoz i pa'n ganny propoze dan okenn pozisyon.

Bann ki'n vini pe mazin *caviar* ek *champagne* alor zot pran plas devan. Eski i apel limite sa? Zisteman lo linite, mon anvi demann zot ozordi. Oli Onorab Simon Gill ki ti kontan koz lo “*together*”? Ki ti'n travay dir pou met zot tou kot zot ete ozordi. Eski linite sa?

Letan en bann i pres linite, en lot bann i dir, si ou sey bar nou, zot pou ganny vwar dan en rigol anba en pon. Eski sa i apel limite sa? Sa en menas, en vre larogans.

Prezidan Ramkalawan zanmen in menas, oubyen met okenn dimoun dan okenn rigol. Sa larogans ki Onorab Lemiel ti pe koz lo la Mr Speaker.

Letan lafouy i ganny fer, en lili *king size* i ganny vwar dan en biro. I ti pe partaz linite ek lekel lo sa gro *king size* li? Manman odyo. Mon poz sa la touzour.

Sa se leta nou pei ek leta sa parti fatige ki apel *US*, bann kapon ki'n taye la apre midi. Sa menm parti ki'n fer Seselwa fristre, i vini e dir nou dimoun i fristre. Wi Mr Speaker, Seselwa i ankor fristre. Mon a dir zot akoz Seselwa i ankor fristre.

Akoz Seselwa in vot pou en sanzman, e Prezidan Ramkalawan in kit tou *SPPF* dan zot pozisyon kot zot ankor pe travay. Sa i fer Seselwa fristre, akoz i annan en bann zot pe fer sabotaz.

Fistrasyon lopital, Minister Lasante sel sanzman ki'n annan Mr Speaker, se zis Minis ki'n sanze. Tou larestan *staff* ki nou'n vin zwenn la, i ankor la.

Alor sa ki *US* ti pe dir nou, se tou bann *staff* ki zot menm ki ti apwente, se sa bann *staff* ki pe fer lopital sal? Sanmenm sa bann *staff* ki pe vol dra? Sanmenm sa bann *staff* ki pe fer laliny long? Sanmenm sa bann *staff* ki pe ganny blanmen akoz napa spesyalis ek dokter?

Wi i annan. Zot in koz lo latizann, bann Manm parti *US* in koz lo latizann manke. Lekel ki ganny peye kot Lopital Victoria Sesel pou fer vin latizann? Lekel li sa dimoun?

Eski i asire ki poudir i annan ase lopital dan *store* - latizann dan *store*? Lekel li ki pe fer sabotaz e kre fistrasyon avek latizann? Ti ava bon pou Minister Lasante gete, akoz se sa ki bann *US* in koz lo la.

Mwan mon profite Mr Speaker pou dir mersi tou travayer lasante, mersi pou zot lakey ek zot servis. Menm

dantis kot Trwa Zonn ozordi i komans vwar pasyan depi 6er bomaten. Mersi pou sa dantis.

Ozordi napa okenn dra ki manke Mr Speaker, akoz pou premye fwa, anba en nouvo Ladministrasyon i annan stok dra dan Lopital Sesel.

APPLAUSE

HON SANDY ARISSOL

Tou *ward* enkli *theater*, i annan zot stok dra ozordi. Mersi bann *staff* Minister Lasante, kontinyen sa bon travay menm avek tou sa bann defi ek e tou sa bann lensilt ki bann Manm parti *US* in fer lo zot.

Letan sa nanryen fer *Le Niole* pe kol *sticker* lo baro ek miray dimoun, i krwar popilasyon pa konn li. Sanson i dir, "si ou siny Barreau, pa marye avek en lot dimoun ki siny Bacco. Akoz ler i pou ankoler i pou devis ou baro".

(Laughter)

HON SANDY ARISSOL

Letan dokter i sorti i kit pasyan lo *ward* Mr Speaker, i al ekout Lasamble dan loto, oubyen i al *meeting* grigri. Sa osi i en fistrasyon ki son bann koleg dan lopital pe eksprimen.

Fistrasyon wi. I annan parmi bann *staff SBC*. Letan zot

vwar bann *post* dekourazan par US, ki Onorab Woodcock in koz lo la, ki Patrick Herminie in fer. I pe reve pou li vin Prezidan li. I dir kot SBC zis en pyon, bann peroke lo zepol Gouvernman, lord i sorti pli o. E i ganny lolas dir avek SBC ‘shame lo zot’, Mr Speaker.

Mon en sel keksoz ki mon anvi dir avek SBC, ki mon vot pou zot Bidze. Mon anvi en reportaz balanse. Ledikasyon ek lenformasyon ki korek pou mon distrik ek Lepep Seselwa. Fer zot lenvestigasyon, fer resers apre konpare.

Retournen donn nou bann bon *feedback* ek rezulta. Legzanp lanmar ki zot in koz lo la, apre konstriksyon retournen get sa lanmar, redonn nou en *feedback* lo sa lanmar parey zot in fer avan konstriksyon in ganny fer Mr Speaker.

Letan Patrick Herminie i dir, ‘shame lo SBC’, mwan mon anvi dir avek Patrick Herminie Mr Speaker, ‘shame lo ou menm ou’, Dokter Patrick Herminie. Ou ti dir nou ou pou konstri 2 sant *detox* pandan 4an ki ou’n la. Selman ou pa’n fer nanryen, apart *enjoy* ou lekor dan *business class*, monte desann marse ek sekirite akote ou.

Si ou antre dan en *lift*, napa en *staff* ki annan drwa antre dan menm *lift* avek ou

akoz ou tro gro. Oli sant *detox*? Napa Mr Speaker, *shame* lo li!

Selman in sarye manze koson dan transpor Leta, sa in fer! Me Gouvernman LDS anba gidans Prezidan Ramkalawan dan 2an, konnen ki nou’n fer nou? En Lopital La Digue Mr Speaker, in ganny konstri.

Library Nasional, Lekol NIHSS e lezot proze. Me par kont, sa i zis travay pandan 2an. Lopital La Digue, MNA Rocky Uranie i kanmi pou aksepte e pou li dir mersi lo non son zabitan.

O kontrer i desann, i dir ek ou Klinik Mahe, dimoun pe met laliny. E i ganny lolas dir poudir *x-ray* pa pe marse. Si i ti konn leta son distrik, e avek sa novo lopital i ti a konnen poudir *x-ray* i deza an fonksyon Mr Speaker.

Sa i en opsyon meyer, opsyon pou Sesel, en zom ki delivre me pa zis koze. I fer aksyon e rod solisyon pou son pep. Sel opsyon pou Sesel, se pa lot avek LDS Mr Speaker.

(APPLAUSE)

HON SANDY ARISSOL

Letan Lopozisyon pe asiste Lasanble, zot pa asiste Lasanble zot *boycott*, zot *walk out* parey zot pe fer la. Pa fer okenn propozisyon, zis zot

matter of privilege, point of order. E zot ganny zot full saler ek zot 13enm mwan an plen.

Sa osi i fer Seselwa fristre Mr Speaker, e zot anvi met *US* dan bin listwar. E la zot pe demande ki sa bann saler i ganny koupe, akoz zot in refize reste pou zot fini travay.

Fistrasyon? Letan goute ti ganny promet e gro goute in manz tou goute, e zot menm zot granmersi Gouvernman *LDS* ki'n asire ki tou zanfan i ganny en *breakfast* ozordi ek dezennen pour nanryen, e pou toulstan.

Sa i en bon opsyon pou Sesel Mr Speaker, se avek parti *LDS*. Letan Gouvernman *LDS* in ogmant tou bann *weight* kot *Welfare* in ogmante, pou met plis larzan dan pos sa enn ki pli vilnerab, spesyalman bann zanfan. Sa en opsyon pou Sesel, se *LDS*.

Letan *URS* in frenmen pou asire ki tou zenn i dan en lanplwa formel e serye pou li ganny tou bann benefis ki vin avek, olye pri anpandan avek en *scheme*. E personn pa ankor mor lafen ziska ler nou pe koze. Sa en Gouvernman ki serye. Sel opsyon pou Sesel, se avek *LDS*.

Letan nou annan dezas dan nou pei, e Gouvernman *LDS* i vini e i asiste tou fanmir san eksepsyon. Me non pa

parey bann ki ti pe partaz *plywood*, avek non lo la, zis kot bann manm *US*.

Sa i fer lapenn, ziska dan dezas, zot fer triyaz Mr Speaker. Sa pa apel linite sa, i apel vorasite, napa konpasyon. E sa definitivman ou pou mor lafen, oubyen ou pou ganny vvar dan en rigol parey zot koz lo la.

Sa pa en opsyon pou Sesel ditou Mr Speaker. Parey sa menm parti degize ki'n vin *US*, in kit tou zenn Bel Ombre avek plizyer det. E la nou'n tann det Larisi, Praslin, Zimbabwe, *fungus*, La Misere, det kriyote koudeta.

Sa i en vre lenfirmite ki Onorab Wallace Cosgrow ti pe koz lo la. Det avek Larisi Mr Speaker, i pli vye ki Onorab Audrey Vidot e menm laz avek Onorab Egbert Aglae.

Sa menm Onorab Aglae, ki'n konplent sipor Port Glaud. I pa'n ganny personn, pa'n get li, pa'n siport li. Me lekip ti Cascade Onorab Aglae, atraver ou Mr Speaker. Zot in bliy ou. *Plywood*, tou *plywood* ti al Cascade. Dokter Fanny ti pe partaz dipen Bel Ombre, ni en pake dipen i pa'n anvoy pou ou.

Me eski koman en pti pei nou fer li tousel? Pou pey konpansasyon zabitan Bel Ombre? Eski bann zenn Bel Ombre ki ti touy dimoun, ki

pa'n touy dimoun ki pou bezwen peye? Eski larzan ki nou ti kapab donn travayer koman logmantasyon ki nou pou bezwen servi pou pey konpansasyon?

Eski logmantasyon 3enm az ki nou pou bezwen servi pou pey bann det ki *US* in fer? Eski sa larzan ki nou bezwen pou anvoy plis nou bann zenn etidye aletranze, ki nou pou bezwen servi pou pey det?

Eski sa bann zenn zot koupab? Akoz zot ki pou bezwen pey krim parti *US*, kan i annan zot ki pa ti ankor ne? Eski parti *US* pa devret *commit* son lekor pou li vann tou son bann *assets* ki in akimile. Bann later ki zot fek vann pou milyon.

Kestyon ki zot devret dir nou, oli sa bann larzan? Lekel ki'n gannyen? Lo ki kont in ale? Bann pti bout later partou, partou. Bann biznes ki zot annan.

Eski i normal ki bann zenn ki fek komanse dan lavi, zot ki'n travay dir etidye byen. E zot in komans travay e se zot ki bezwen pey det depans *US*, pou kontinyen zot - *US* zot pou kontinyen akimil larises Mr Speaker.

Eski pa nou devret komans ek sa lasistans ki *US* i gannyen koman en parti politik? Apre nou sezi e vann

tou sa bann *assets* malaki ki zot in gannyen, enkli zonm lib. Nou a komans ganny en larzan, nou a met dan en fon e nou ava annan en komansman. E pou sa rezon Mr Speaker, sa Eleksyon 2025, *US* pa kapab retourn o pouwar.

Zot in kit pei avek bokou soufrans, kalamite, kantite det ki pa'n peye. E se pou nou, e se nou bann zenn ki pou bezwen regle sa bann kont. Sa parti politik zot devret ganny diskalifye pou partisip dan okenn eleksyon Sesel.

(APPLAUSE)

HON SANDY ARISSOL

Parski zot annan rikord move gouvernans, move performans, e move zesyon en pei pou 43an. Sa nou devret annan en *referendum*, Onorab Cosgrow, bann move dimoun en group bandi ki zot ete.

Nou pei in refer, nou'n sorti lwen. Se pou sa rezon nou koman en pti nasyon nou bezwen travay. Pour ki nou zanfan ek nou pti zanfan, pa ganny menm fardo letan nou ale. Sa i leta nou pei ozordi. Si ou anvi travay, ou pe travay.

Si ou anvi asize, sa i ava vin ou swa. Travay i annan e pou kontinyen annan, ou ki

deside kwa ki ou anvi pou ou lekor.

Lasistans sosyal dan dernyen konpanny, nou ti ganny dir ki *LDS* si i vin o pouvwar pou arete. Tou Seselwa pou mor lafen, zanfan pa pou al lekol. Ozordi ek lafyerte, tou bann lasistans sosyal in ganny revize, in ganny ogmante apre plis ki 10an.

Nou bann dimoun aze osi zot vilnerab Mr Speaker, zot al dan menm magazen, zot servi menm larzan. E parfwa se zot ki okip en pti zanfan ki son paran in mor, swa dan sibstans.

Alor mon enplor mon Gouvernman pou revwar, rode ki mannyer nou soulaz nou bann *stars and moon* ki'n kontinyen priye pou nou pei ek nou zabitant. Sa i leta nou pei anba Ladministrasyon *LDS*, dirize par Prezidan Ramkalawan ki nou annan konfyans ladan.

Nou'n zwenn *COVID* koman en pei kot Dolar ti R21. Ozordi Dolar i R14 Mr Speaker. Sesel in brav e asir en lekonomi performan.

Ouer nou erport, touris in desot plafon, lekonomi performan. Menm in kapab donn en pti mwenza travayer, ogmant bann lasistans.

Sa ki pli enteresan pou note, ziska prezan Sesel ek

Seselwa pa'n perdi en sou. Tou larzan Lepep Seselwa pe ganny zere, dirize byen ziska prezan. Sa Leta nou Nasyon Mr Speaker, anba *LDS*.

Atraver lekonomi, Gouvernman, atraver Egzekitiv in met lord, in propoze, in egzekite. E Lasanble Nasyonal in aprouv Bidze, e in sirveye ki larzan in byen ganny depanse. En lebra Gouvernman in travay dan limite ek en lot lebra Gouvernman, e sa in anmenn sikse e devlopman pou nou pei.

Amelyorasyon dan lavi nou pep, sa i en laprev kler ki letan nou travay pou menm direksyon i aport benefis. Nou'n zwenn en kof vid. Me in re-asiste - in re-aziste. Konsilte, rode ki mannyer Sesel i retourn lo bon semen ek en bon disiplin fiskal.

Ozordi Sesel nou fyier, kot nou'n sorti lo bann *blacklist*. E Sesel in ganny konfyans internasyonal avek son bann partener. Ek nou *passport* ki for internasyonalman sa osi in over laport pou envestiser e asir nou bann Seselwa plis sipor an term *visa* e vwayaz. Sa i Leta nou Nasyon, nou sel - en sel opsyon ozordi.

En Gouvernman ki'n ekoute, performan e in delivre nou koman en pei. Prezidan Ramkalawan in zwenn kalamite

dezas dan nor ek leksplozyon Cascade. Mon anvi felisit mon frer Onorab Monthy pou ou kouraz, devosyon e komitman anver ou distrik.

(APPLAUSE)

HON SANDY ARISSOL

Ou pa pou zanmen kapab fer plezir tou zabitant, be ou'n zwenn batenm dife. Ou'n seye, ou'n vizite, ou'n ede e ou'n fer tou ou mye.

Sa ki pli enteresan se ou'n partaz avek tou zabitant. Ti napa kouler politik, ou'n sey ou mye pou ed tou dimoun. E felisitasyon pou bann zabitant ki'n osi ed zot lekor.

Bel Ombre mon anvi dir mersi tou zabitant ki'n desann ki'n ede, ki'n donn en sipor pou asiste en lot son frer oubyen son ser. Mersi pou zot devosyon, zot kouraz e zot lwayote anver nou kominote.

Dan lespri pozitivite ki nou Prezidan in koz lo la. Mersi zabitant Bel Ombre. Ki Bondye i kontinyen zet en regar lo nou koman son distrik prefere ek bann zoli dimoun, e ki nou reste pozitiv.

Mon vin isi ozordi, pou ranpli mon devwar konstitisyonnel e delivre mon diskour lo Leta nou Nasyon. Les mwan dir zot ki Bel Ombre i

solid, pa borde. Ki Sesel i solid e lo bon semen. Nou pei i dan bon lanmen e pe bouz dan bon direksyon.

Letan mon isi devan pe adres zot, mon konvenki ki Sesel e lavenir nou pei i lo bon semen anba gidans nou Prezidan ek lespri pozitiv.

Seselwa mazin byen nou pei in refer, nou sorti lwen. Se pou sa rezon nou koman en pti nasyon, nou bezwen travay pour ki nou zanfan ek nou pti zanfan pa ganny menm fardo letan zot vini.

Atraver lekonomi Gouvernman atraver Egzekitiv in met lord Mr Speaker. E pour sa mon kontinyen dir mersi pou tou lespri pozitivite dan mon distrik, ki ou US, ki ou LDS.

Mersi pou legliz ki'n donn nou later pou fer *proper siding* pou bis, pasaze ek en pti promenade pou nou zanfan pa ganny tape.

Mersi pou tou zabitant ki'n donn zot later pou fer trotwar pou zabitant. Mersi Mr Rodney, pou met nou bann peser anba ou lezel koman *Chairman Lasosyasyon*.

Mersi Agnes Arthur, pou ede *être* nou *Chairperson Lasosyasyon Dimoun Aze*, pou zwenn zot, gid zot e kontan zot.

Mersi pou nou pti *library* ki nou fek ouver Mr Speaker,

avek led madanm Elienor ek tou lezot dimoun ki'n donn nou liv.

Mersi msye ek madanm Tirant ki'n ofer zot landrwa koman en Klinik *Emergency* pou zabitan Bel Ombre.

Pli spesifikman Le Niole, kan zot ti kapab fer bokou plis larzan. Me zot in mazin Sesel. Mersi ankor.

Mersi Dokter Alvina ek ou Klib *Young Explores* pou kit nou zanfan dan pozitivite. Lalis i long, Bel Ombre nou lo semen pozitivite. Mersi tou zabitan Le Niole pou zot konprenezon ek pasyans pou sa travay ki pe ganny fer.

Semen i frenmen wi, i en konvenyans pou sa *carer*, pou sa dimoun aze ek son apwentman, zanfan lekol ek tou paran. En leskiz ankor. Me sa travay i bezwen kontinyen pou amelyor fasilite ek lavi nou zabitan. Mersi ankor.

Plizyer proze ki ti'n dormi in konplete sa lannen. Nou 3enm proze lakaz Mr Speaker, 3enm proze lakaz byento en novo blok 16-unit pou asiste, tou sa ki bezwen ganny asiste.

Pou ou ki'n peye, pou ou ki'n en aplikian pou plizyer lannen. Me pa akoz ou'n siport mwan, ou'n mars ek mwan ki ou bezwen pas devan tou

dimoun. Non Mr Speaker, pa li pozitivite sa.

Zoli renovasyon lo *bedsitter Corsaire*, konplete. Zoli blok flat *Corsaire*, konplete. *Fencing* avek baro byento pou arive pou zot sekirite ek *privacy*. I fer nou 3enm proze dan 3an, nou pe netway lalis pou ou ki'n lo la pou plizyer lannen, e ou pe fer ou kontribisyon.

Semen kot lafanmir Belle, konplete. Semen ki konekte Le Niole ek Beau Belle, *proper* peron ek *railing*, konplete. Byento lalimyer Mr Speaker.

Proze trotwar *Fisherman's Cove* ziska Lekol Bel Ombre, konplete. La byento en proper *siding* ek *bus stop* ek en pti *walkway* pou bann zanfan pas anler san okenn danze.

Nouvo *bin site* plizyer landrwa Mr Speaker, konplete. Resirfas semen, konplete. Byento nou pe anmenn li *Kashugi, Canada* ek Le Niole. Lalimyer nou'n ganny ankor 50 Mr Speaker.

Alor mon lans en lapel avek zabitan, propoze kote zot krwar i manke e kote zot bezwen atraver Ladministrasyon Distrik. Tou distrik i ganny en Bidze, swa pou lakaz, semen e lezot.

I annan en konpanny sorti kot US ki nanryen pa pe arive. Mon pa kapab fer nanryen, zis

pou fer zabitant fristre e kit zot distrik an aryer. Pa les sa arive, frer ek ser Seselwa.

Si i pa anvi travay, i pe fer sabotaz zet li dan bannann e vot pou *MNA LDS* dan lot eleksyon.

(APPLAUSE)

HON SANDY ARISSOL

Ki i ava annan zorey Minis ek Gouvernman, e ki i ava fer travay pou tou dimoun. San kit personn, ouswa distrik deryer parey leka dan distrik Bel Ombre.

Tou dimoun ki anvi ganny ede Bel ombre laport i ouver, zis fer konnen, vin devan. Mon limero telefonn i ankor parey pou plis ki 25an.

Sak fwa i annan randevou Mr Speaker, mon pa donn randevou pou fer klinik. Mwan ki al kot zabitant Bel Ombre pou plis ki 4an. E sa lannen i pou mars parey.

Pa blyie tou dimoun dan distrik pe ganny larzan pou son distrik. I enportan ki ou *MNA* i travay, menm sa *MNA* parti *US*.

Alors si i pa kapab travay mon repete, tir li e les *LDS* travay. Sel opsyon pou Sesel Mr Speaker 2025 se pa lot ki avek *LDS*.

Mon profite pou dir mersi tou zabitant distrik. Mersi pour zot lakey, zot resepsyon, zot

konsey ek zot lapriyer. Mersi pou ou Mr Speaker, pou ou sipor, pou ou gidans Lasanble Nasyonal avek tou manm secrétariat.

En mersi spesyal, pour mon *Caucus* ki'n fer travay ekselan pou nou komanse e parey nou dir a sak fwa nou fini nou *Caucus meeting*. Nou dir, "LDS Sesel e nou pa pou zanmen les tonbe" ! Mersi bokou Mr Speaker.

(APPLAUSE)

MR SPEAKER

Mesi Onorab. E mersi tou bann Onorab pou zot lentervansyon. E avek sa nou'n termin respons lo mesaz lo Leta Lanasyon. Nou adjourn Lasanble e nou a repran travay Mardi le 5 Mars, 9er bomaten. *Adjourn*.

ADJOURNMENT